

Rõmãn

Pawre kot Rõm kãm Jejus kõt hkwỳjê hwỳr kagà nê mênh

Kagà ja na pre Pawre hipêx. Kêp Jejus nhỹ hã mẽ ahkre ho pa xwỳnh na pre. Na pre hte mry kà ho ixkre nhỹpêx nê mẽ kãm ho wênê ho mẽ hkõt pa pê mẽ piitã mẽ kãm Tĩrtũm kapêr jarênh o pa. Tã krĩ pê Rõm kamã mẽ kot Jejus kõt amnhĩ xunhwỳr xwỳnhjê hwỳr kagàja nhỹpêx nê mẽ hwỳr kumê. Kormã ma mẽ hwỳr mõi nê mẽ omunh kêt ri.

Nê Jejus kêp Tĩrtũm mã tanhmã mẽ pajarênh to xwỳnh ã nhũm pre mẽ kãm harê nê hã kagà. Jejus kot mẽ pahte amnhĩ tomnuj pãnhã mẽ panê htyk jakamã na hte Tĩrtũm mẽ pahte hkõt amnhĩ xunhwỳr ã mẽ pahpumu nê Jejus kukwak ri mẽ pahte amnhĩ to mex xwỳnh ã mẽ pajarê.

Nê Tĩrtũm Karõ nhỹ hã mẽ kot amnhĩ nhỹpêx nyw nê hamaxpêr nyw o pa hã nhũm Pawre mẽ kãm karõ nê hã kagà. ã na pre mẽ kãm mẽmoj jarê nê hã kagà anê. Nê hã kagà ho:

1 1Pa Rõm nhõ xwỳnhjaja? Xà mẽ amex? E ot pa mẽ awỳr kagà nhỹpêx nê kumê. Tĩrtũm na pre mẽ akaxyw ixãm. Ixte mẽ amã Jejus kot tanhmã mẽ panê amnhĩ nhỹpêx to hã harênh o ri ixpa kaxyw. Na pre ixpê Pawre hã ixpumu nê ixãm. Jakamã na pa ã mẽ awỳr kagà nhỹpêx nê mênh anê. Ixte Jejus nhỹ hã mẽ ahkre ho ri ixpa xwỳnh na pa. Na pa hte kãm tanhmã amnhĩ nhỹpêx to ho ri ixpa. Tã ã mẽ awỳr kagà nhỹpêx nê mênh anê.

2Amnepêm na pre Tĩrtũm nhỹ hã kapêr jarênh o ri mẽ pa xwỳnhjaja mẽ pakukamã mẽ panhĩgêjtê mã Jejus kukamã tanhmã harênh to ho ri pa. Nê mẽ kãm kapêr jarênh o mẽ hkõt pa nê mẽ kãm:

—Koja nhỹrmã Tĩrtũm mẽ pahpiitã mẽ panê tanhmã kot amnhĩ nhỹpêx to mã xwỳnh mẽ nhũm mẽ hpiitã hprĩ hã harênh ma nê omu. Anê.

Nhũm prem ã Jejus kukamã mẽ kãm harênh anhỹr o ri mẽ hkõt pa. Tĩrtũm kapêr ã kagà htũm kamã harênh xà hkõt tanhmã mẽ kãm harênh to. 3Tĩrtũm Kra Jejus Krisja na pre mẽ kãm harênh o ri mẽ hkõt pa. Mẽ

panhõ Pahihti na. Kêp Tirtũm Kra htã na pre mẽ pahpyrà nẽ ĩ ho amnhĩ nhĩpêx nẽ wrỳ nẽ katorxà nhõxà hkre rũm kato. Jakamã kêp Tirtũm Kra pix kêt mãânẽn katorxà hkõt kêp higêt Tawi hkanrêhã htãmnhwỳ.

4Kêp Tirtũm Kra htã nhũm prem axtem nẽ tanhmã hamaxpêr to nẽ kupĩ. Nom nhũm Tirtũm kêp amnhĩ Kra hã akupỹm ho htĩr. Jakamã na pu htem harênh ma nẽ kãm pajamaxpêr o:

—Jeus kêp Tirtũm Kraa. Mẽ kot kêp hpĩr tã nhũm akupỹm ho htĩr. Jakamã nhũm Tirtũm pyrã nẽ hihtỳx o hihtỳx. Anẽ.

5Tã ã Tirtũm kot Kra nhĩpêx anhỳrja ri na mãânẽn pa ixto mex nẽ mẽ akaxyw ixãm. Jakamã na pa hte ma krĩ piitã hkõt mẽ kãm tanhmã Jeus Kris jarênh to ho ri mẽ hkõt ixpa. Ijaew mã nẽ Ijaew kêt xwỳnhjê mã. Mẽ kot harênh mar nẽ amnhĩ kaxyw kãm hamaxpêr nẽ kapêr kõt pix mã amnhĩ nhĩpêx mex kaxyw. 6-7Nẽ mẽ apê Rôm nhõ xwỳnhjaja. Na ka prem Jeus kõt amnhĩ xunhwỳ nhũm Tirtũm ja hã mẽ apumu nẽ mẽ ato hkra nẽ mẽ apê Jeus mẽ wa hkwy hã mẽ ajarê. Mẽ ate hkõt amnhĩ nhĩpêx kaxyw nhũm pre ã mẽ ajarênh anẽ.

Tã ot pa kagã nhĩpêx nẽ mẽ awỳr mẽnh kaxyw. Tirtũm kot mẽ ato hkra xwỳnhjê hwỳr. Tirtũm kãm mẽ ajapêê.

Na pa hte mẽ ato mẽ panhĩpêêxã maati Tirtũm mẽ Pahihti Jeus Kris wa hwỳr rãhã ri ixpa. Nẽ mẽ ato wa hwỳr o:

—Kwa kêr ka wa Rôm kamã war akrajê pumunh mex nẽ mẽ kutã anojarêt rãhã nẽ. Kê mẽ hamakêtkati nẽ àmnhĩx ri tanhmã amnhĩ nhĩpêx to ho ri pa. Anẽ.

Pawre kot Rôm nhõ xwỳnhjê pumunh prãm ã amnhĩ jarênh

Atrẽ 28.15-16; Rômãn 15.22-29

8Nẽ na ka prem amnhĩ kaxyw Jeus Kris mã ajamaxpêr nẽ hkõt amnhĩ xunhwỳ nhũm krĩ piitã hkõt mẽ pa xwỳnhjaja mẽ ajarênh ma. Nẽ mẽ ate amnhĩ nhĩpêx nyw ã mẽ ajarênh ma nẽ axpẽn mã tanhmã mẽ ajarênh to ho pa. Nẽ mẽ ajarênh o:

—Kwa na xep Rôm kãm mẽ hkwyjaja amnhĩ kaxyw Jeus mã hamaxpêr tỳx nẽ. Nẽ hkõt amnhĩ nhĩpêx mex rãhã ho ri pa. Anẽ.

Pa ã mẽ kot mẽ ajarênh anhỳrja ma nẽ ixkĩnh tỳx nẽ. Nẽ Tirtũm mã mẽ anhỹ hã ixkĩnh ã amnhĩ jarênh o ri ixpa. 9Na pa hte mẽ ato hwỳr rãhã ho ri ixpa. Nẽ nhỹri mẽ kãm Tirtũm Kra Jeus kapêr jarênh o ri ixpa nẽ mẽ amã ijamaxpêr nẽ mẽ ato kuwỳ. Nẽ tanhmã Tirtũm mã amnhĩ nhĩpêx to ho ixpa pê mẽ amã ijamaxpêr nẽ mẽ ato kuwỳ. Tirtũm kot ja hã ixpumunh mex. 10Na pa hte tanhmã kãm amnhĩ jarênh to kaxyw nẽ mẽ akaxyw amnhĩ to kuma nẽ kãm:

—Pa Tirtũm? Na pa ra inhmã ma Rôm wỳr inhmõr nẽ kamã akõt ixkwỳjê pumunh prãm tỳx kumrêx. Xã kot ka tokyx mẽ hwỳr inhmẽ nà? Anẽ.

11Na pa ra inhmã mẽ awÿr inhmõr prãm tÿx nê. Na pre Tirtũm Karõ tanhmã ixkrã hto pa ÿ hã kapêr ã kagà mar tÿx nê. Nê hkõt mẽmoj mex pumunh rax nê. Tã ra inhmã ma mẽ awÿr inhmõr nê amnhĩ xô ri mẽ amã harênh prãm nê. Mẽ ate inhmar nê aprĩ hã Jejus Kris kõt amnhĩ xunhwÿr tÿx nê hkõt amnhĩ nhĩpêx mex rãhã ho ri apa kaxyw. 12Kot paj nhÿrmã ma mẽ awÿr mõ. Nê mẽ awÿr pøj pu mẽ axpên pumu nê pahkĩnh nê. Mẽ pahte amnhĩ kaxyw Jejus Kris mã pajamaxpêr mex o papa hã axpên pumu nê pahkĩnh nê. Nê mẽ pahpiitã hkõt amnhĩ nhĩpêx mex o ri papa.

13E ixkwÿjaja. Xatã ixte mẽ awÿr ixkrã htã nhũm mẽmoj xatã tanhmã ixpê àmtàr to pa kormã jar ixpa. Nom kot paj nhÿrmã ma mẽ awÿr mõ. Mẽ ate ja hã inhmar kaxyw na pa ã Tirtũm noo mã mẽ amã amnhĩ jarênh anê. Na pa pre krĩ hkwÿ kamã mẽ apê Ijaew kêt xwÿnh kwÿjê hwÿr ixpa. Nê mẽ kãm Jejus kot mẽ panê tanhmã amnhĩ nhĩpêx to hã harênh o ri mẽ hkõt ixpa. Nhũm mẽ hkwÿjaja inhma nê hkõt amnhĩ xunhwÿ. Ja kaxyw na pa inhmã ma mẽ anhõ krĩ hwÿr inhmõr prãm nê. Mẽ akwÿjaja kot ixkapêr mar nê mẽ apyrà nê Jejus kõt amnhĩ xunhwÿr kaxyw. 14Na pre ra Tirtũm ixte kapêr o mẽ ajahkre ho ixpa kaxyw mẽ piitã mẽ kaxyw ixãm. Tanhmã ri mẽ kute xwÿnhjê kaxyw. Mẽ kãm ma ho mẽ pa xwÿnhjê mẽ mẽ kãm ma hkêt o mẽ pa xwÿnhjê mã. Nê mẽ kot kagà pumunh xwÿnhjê mẽ mẽ kot kagà pumunh kêt xwÿnhjê mã. Mẽ piitã mẽ kaxyw na pre ixãm. Ixte mẽ kãm Jejus kot tanhmã mẽ panê amnhĩ nhĩpêx to hã harênh o ri mẽ hkõt ixpa kaxyw. 15Jakamã na pa ra inhmã mẽ apê Rõm nhõ xwÿnhjê hwÿr inhmõr prãm nê. Ixte mẽ anhõ krĩ kamã mẽ piitã mẽ kãm ja jarênh o ri ixpa nhũm mẽ kot inhmar nê mẽ pahpyrà nê Jejus kõt amnhĩ xunhwÿr kaxyw.

Jejus kot mẽ panê htyk ã harênh

Sikũn Ximotre 1.6-12

16Nê Jejus kot mẽ panê htyk ã harênhja ãm hãmri na. Harênhja mex o mex. Na htem kuma nê kãm hamaxpêr nê amnhĩ kaxyw hkõt hamaxpêr nê hkõt amnhĩ xunhwÿ. Hãmri nhũm Tirtũm ja hã mẽ omu nê mẽ nê mẽ kot amnhĩ tomnuj o hapêx pa nê mẽ ho hkra. Nom mẽ ixpê Ijaew nhõ xwÿnhjê pix kêt. Mãänêñ mẽ apê Ijaew kêt xwÿnhjaja nhũm kãm mẽ pajapê ho axpên pyrãk. Jakamã na pu htem Jejus kõt amnhĩ xunhwÿ nhũm Tirtũm ja hã mẽ pahpumu nê mẽ pahto hkra. Ja kaxyw àhpumunh tÿx o àhpumunh tÿx. 17Ãm mẽ kot amnhĩ kaxyw Jejus mã hamaxpêr xwÿnh pixjaja na hte mẽ ho hkra. Kapêr ã kagà htũm kot tanhmã ja jarênh to nê harênh kot:

Na hte Tirtũm mẽ kot amnhĩ kaxyw Kra mã hamaxpêr ã mẽ omunh xà hkõt mẽ ho hkra nhũm mẽ amnhĩ kaxyw kãm hamaxpêr rãhã ho pa. Jao ra ô ri tãm amnhĩ nhĩpêx o pa. Anê.

Mê pahpiitã mẽ pahte amnhĩ tomnuj xwỳnh ã mẽ pajarênh

Atre 14.15, 17.22-29; Apokarip 9.20-21

18Nê mẽ kot amnhĩ tomnuj o ri mẽ pa xwỳnhjaja na hte Tĩrtũm axtem tanhmã mẽ harênh to. Na htem Tĩrtũm kapêr ma nom amnhĩ tomnuj gryk ã ãm kuma. Nê mẽ hkwỳjaja kot kapêr mar pymaj kapêr õ ho mẽ kêp àmnàr rãhã ho ri pa nhũm Tĩrtũm ja hã mẽ omu nhũm ja kêp omnuj nê. 19-20Te mẽ kot Tĩrtũm kot amnhĩ nhĩpêx ã omunh kêt pyrãk o amnhĩ nhĩpêx tã mẽ kot omunh mex. Tĩrtũm kot mẽmoj to kator krax rũm ra kot mẽ pamã amnhĩ to amnhĩrit mex. Pu mẽ pano ho omunh kêt tã no ãm kot amnhĩ nhĩpêx kôt ra kêp Tĩrtũm ã omunh mex nê. Nê kêp mẽmoj piitã ho kator xwỳnh ã omunh mex nê. Nê mex o mex ã omu nê hihtỳx o hihtỳx hã omu. Tĩrtũm kot amnhĩ nhĩpêx kot amnhĩrit mex nhũm mẽ kot omunh mex tã hkôt amnhĩ xunhwỳr kêt nê. Nê axtem nê hamaxpêr o:

— Tk. Tĩrtũm kot inhmã amnhĩ to amnhĩritre hã kot pa kêt ri hkôt amnhĩ nhĩpêx. Kot pa inhno ho omu nê rĩ kormã hkôt amnhĩ nhĩpêx japêr. Anê.

Ra mẽ kot amnhĩ nhĩpêx ã omunh mex tã ri ã hamaxpêr anê. Jakamã nhũm Tĩrtũm tee ri ja hã mẽ omu nhũm ja kêp omnuj tỳx nê. 21Mê kot amnhĩ nhĩpêx ã omunh mex tã amnhĩ kaxyw tanhmã kãm hamaxpêr hto hkêt. Rỳ arĩ hamaxpêr japêr nê kãm:

— Nà Tĩrtũm. ãm hãmri amex kumrêx. ãm amex o amex. Apê Tĩrtũm ã ãm apixi mex kumrêx na ka. ãm hãmri na ka hte mẽ ixto mex o apa.

Anhỳr o amnhĩ kaxyw kãm kapêr kêt nê. Nê ãm htỳx tanhmã hamaxpêr punuj to pix o ri pa. Te kamàt kô kamã ri mẽ pa xwỳnhjê kot amnhĩ nhĩpêx pyrã nê mẽmoj mex pumunh kêt nê.

22Mê kot àhpumunh tỳx ã amnhĩ to jarkrar o ri pa htã no ãm te mẽ hkrã kanhĩn kêt nê mẽ hamaxpêr kêt pyrãk o amnhĩ nhĩpêx. 23Jakamã na htem amnhĩm mẽmo karõ nhĩpêx. Mẽmo htyk mã xwỳnhjê hõ karõ nhĩpêx. Tanhmãn panhĩ karõ rỳ mẽmo mry karõ rỳ mẽmo kuwênh karõ. Rỳ mẽmo kagã karõ nhĩpêx. Hãmri nê ho õ sãnti nê te ri ho Tĩrtũm nhĩpêx pyrãk o hipêx. Jao hpar pê hkõn krã ho rôròk nê amnhĩ to kuwỳ nê kãm amnhĩ jagrer pê kãm mex o mex ã harê. Tĩrtũmja sãnti rom htĩr o htĩr tã nhũm mẽ axtem nê sãnti gryk ã hkaga nê ã amnhĩ nhĩpêx o pa anê. 24Jakamã nhũm tee ri ã mẽ kot amnhĩ nhĩpêx anhỳr ã mẽ omu nê amnhĩ pyrã nê mẽ hkaga nê ãm mẽ omu. Jakamã nhũm mẽ ãm amnhĩ krã hkôt tanhmã ri amnhĩ tomnuj to ho pa. Nê axpên kãm ri tanhmã hpijaam kêt to. ã na htem htỳx ri amnhĩ tomnuj anhỳr o pa.

25Tĩrtũm kapêrja ãm hãmri htã nhũm mẽ axtem nê te amnhĩ pum rênh pyrãk o hipêx nê kãm hamaxpêr kêt nê. Nê hpãnhã ri mẽ hêx xwỳnhjê kapêr pix ma nhũm ja te mẽ kãm mex pyrãk. Na htem ã amnhĩ

nhîpêx anê hãmri nê axtem nê Tirtũm kot mẽmoj nhîpêx pix parpê rôrôk nê amnhĩm mex o mex ã harê. Nom kot hipêx xwỳnh Tirtũm parpê mãn ã amnhĩ nhîpêx anhỹr kêt nê. Nom kot mẽmoj nhîpêx xwỳnhhta mex o mex jakamã koja mẽ kot hkôt amnhĩ nhîpêx xwỳnhjaja jajê rom kãm mex o mex ã harênh tũm rãhã ho ri pa. 26No mẽ kot amnhĩ tomnuj xwỳnhjaja na hte Tirtũm amnhĩ pyrã nê mẽ hkaga nhũm mẽ htỳx amnhĩ krã hkôt ri tanhmã amnhĩ tomnuj to ho ri pa. Jao mẽni hkwỳjaja axtem nê axpên gryk ã mjên kaga nê axpên nhĩõ ho mjên. 27Nhũm mẽmy hkwỳjaja mãânên axtem nê amnhĩ kwỳjê my gryk ã hprõ kaga nê axpên nhĩõ ho hprõ. Na htem ã axpên kamã hpijaam kêt o pa anê. Mỳrapê koja mẽ à pix kãm amnhĩ xà htỳx kamã hamak o pa. 28Na htem amnhĩ tomnuj gryk ã Tirtũm mã hamaxpêr kêt nhũm tee ri amnhĩ tã mẽ omu nê hamaxpêr o:

— Mẽ kãm amnhĩ tomnuj pix prãm jakamã kwãr mẽ mãmrĩ ã amnhĩ nhîpêx anê. Kot paj axte ja nê tanhmã mẽ kãm ixkapêr to hkêt nê. Anê.

Jakamã nhũm mẽ arĩ htỳx ri amnhĩ krã hkôt tanhmã amnhĩ tomnuj to ho ri pa rãhã nê.

29 Hãmri nê mẽmoj punuj pix mã hamaxpêr.

Nê kãm amnhĩ mex pix prãm mã hamaxpêr.

Nê kãm axpên tomnuj pix prãm.

Nê mẽmoj tã axpên kãm gryk pix prãm.

Nê mẽ kãm axpên par pix prãm.

Nê mẽmoj tã ri kãm axpên mã àkjêr prãm.

Nê mẽmoj tã kãm axpên mã hêx prãm.

Nê kãm axpên kaxyw tanhmã hamaxpêr punuj to pix prãm.

Nê kãm tanhmã axpên to kapêr punuj to pix prãm.

30 Nê kãm mẽmoj tã axpên to hêx pix prãm.

Nê kãm Tirtũm prãm kêt o ri pa.

Nê mẽmoj tã axpên mã àkjêr o ri pa.

Nê mẽmoj tã amnhĩ to jarkrar rãhã ho ri pa.

Nê tanhmã amnhĩ tomnuj to pix kukamã hamaxpêr. Nhũm mẽ katorxà nê mẽ hipêêxà tee ri ja nê tanhmã mẽ kãm kapêr to no nhũm mẽ mar kêt kumrêx.

31 ã mẽ kot amnhĩ nhîpêx anhỹr o ri mẽ pa xwỳnhjaja na hte Tirtũm kãm mẽmoj mex nhũm mẽ kêp omnuj nê nhũm Tirtũm kêp mẽmoj omnuj nhũm mẽ kãm mex nê. Nê axpên mã mẽmoj tanhmã ho hã amnhĩ jarênh tã ho anhỹr kêt nê. Nê axpên kãm ukaprĩ ho ri pa hkêt nê.

32 Tirtũm kapêr ã kagà htũm kot tanhmã mẽ hkukamã mẽ harênh to nê mẽ harênh kot:

ã mẽ kot amnhĩ nhîpêx anhỹr o ri mẽ pa xwỳnhjaja koja mẽ nhỹrmã ty hãmri nê amnhĩ xà htỳx kamã hamak rãhã ho ri pa ho pa. Anê.

Nhũm mẽ kot amnhĩ tã ja mar tỳx tã aa amnhĩ tomnuj kaga hkêt nê. Arĩ ã amnhĩ nhĩpêx anhỹr o pa rãhã nê. Nhũm mẽ hkwỳjaja mẽ kot amnhĩ tomnuj ã mẽ omu nê mẽ uràk nê ã amnhĩ nhĩpêx anhỹr o ri mẽ hkôt pa nhũm mẽ amnhĩ pyrà nê mẽ omu nê hkĩnh nê. Na htem ã amnhĩ nhĩpêx anhỹrja gryk ã Tĩrtũm kaga nhũm tee ri amnhĩ tã mẽ omu nê amnhĩ pyrà nê mẽ hkaga nê ãm mẽ omu. Jakamã nhũm mẽ amnhĩ tomnuj tỳx pix rãhã ho pa.

Mẽ kot amnhĩ tomnuj xwỳnhjê hkukamã mẽ harênh

Matêwre 7.1-5; Sikũn Tesarôn 1.6; Eprêw 9.27; Sikũn Pêtre 2.4, 3.7;

Jutre 6.14; Apokarip 6.15, 20.11

2 1Nê kot ka mẽ atõ ã mẽ kot amnhĩ tomnuj anhỹr xwỳnhjê kot amnhĩ nhĩpêx ã mẽ harênh ma nê ã ajamaxpêr anê nê ajamaxpêr o:

—Tk. Mẽ kot amnhĩ tomnuj pix o ri pa xwỳnh kênã. No pa na ã ixte amnhĩ nhĩpêx anhỹr o ri ixpa hkêt. Mẽ kurom ixte tãm amnhĩ nhĩpêx o ri ixpa xwỳnh na pa.

Anhỹr o amnhĩ jarê. Kwa nà mẽ ã ajamaxpêr anhỹr kêt nê. Mẽ pajaxwỳja na pu htem tõhã mẽ uràk nê tanhmã amnhĩ tomnuj to. Tã ka mẽ ã mẽ kot amnhĩ tomnuj ã mẽ harênh anê nê te ka ate amnhĩ jarênh pyràk. 2Tĩrtũm kapêr ã kagã htũm kot mẽ kot amnhĩ tomnuj o ri mẽ pa xwỳnhjê jarênh kot:

Mẽ kot amnhĩ tomnuj mỳrapê koja mẽ nhỹrmã amnhĩ xà htỳx kamã hamak rãhã ho ri pa. Anê.

ãm hãmri ã mẽ harênh kot anhỹr. 3Mãn ka mẽ atõ tanhmã amnhĩ kukamã ajamaxpêr to nê ajamaxpêr o:

—Nà koja Tĩrtũm nhỹrmã amnhĩ nê kuwy hwỳr mẽ kot amnhĩ tomnuj xwỳnhjê rê. No pa koja hwỳr inhmênh kêt nê. Anê.

Kwa mẽ ã ajamaxpêr anhỹr kêt nê. Kot ka mẽ ã amnhĩ kukamã ajamaxpêr anhỹr tã tõhã mẽ uràk nê tanhmã amnhĩ tomnuj to. Jakamã koja Tĩrtũm mẽ uràk nê hã tanhmã mẽ ato. 4Kot kaj mẽ atõ tanhmã amnhĩ tomnuj to hãmri nê ãm ja hã amnhĩ pumu nê ajamaxpêr o:

—Ixte amnhĩ tomnuj xwỳnh tã na hte Tĩrtũm ja hã ixpumu nê ãm ixpumu nê hã tanhmã ixto hkêt nê. Kêp mẽ ixkamã ukapĩrĩ xwỳnh jakamã na hte gryk tokyx anhỹr kêt nê. Jakamã kot paj arĩ tanhmã amnhĩ tomnuj to ho ri ixpa nê aa jam inhũrer kêt nê. Tĩrtũm kot ja hã tanhmã ixtore kaxyw hã.

Anhỹr o ajamaxpêr. No ãm ja kot anhỹr kêt. Na hte Tĩrtũm kormã amnhĩ tã mẽ pajamã. Mẽ pahte amnhĩ tomnuj kaga nê hpãnhã hkôt amnhĩ xunhwỳr kaxyw na hte kormã amnhĩ tã mẽ pajamã. Jakamã na kormã tanhmã ate amnhĩ tomnuj tota ã tanhmã ato hkêt nê.

5Mẽ akrã hihtỳx jakamã mẽ amã hkôt amnhĩ xunhwỳr prãm kêt. Na ka htem tanhmã amnhĩ tomnuj to pix kukamã ajamaxpêr o ri apa. Nê

gaa nê ra anhÿr kumrêx. Nhũm Tirtũm tee ri ja hã mẽ apumu nhũm ja kêp omnuj tÿx o mō. Jakamã koja nhÿrmã tanhmã mẽ ajarênh to nê gryk tÿx kãm tanhmã mẽ atomnuj tÿx to. Âm hãmri na hte mẽ pahte amnhĩ nhĩpêx ã mẽ pahpumunh xà hkôt ahpÿnhã tanhmã mẽ panhĩpêx to.

6Koja nhÿrmã mẽ pahpiitã kormã mẽ pahtir ri mẽ pahte amnhĩ nhĩpêx ã mẽ pahpumunh xà hkôt tanhmã mẽ panhĩpêx to. Mẽ kot amnhĩ to mex o ri mẽ pa xwÿnhjaja nhũm mẽ ho mex nê. Nê mẽ kot amnhĩ tomnuj o ri mẽ pa xwÿnhjaja nhũm mẽ homnuj nê. Koja nhÿrmã mẽ pahpiitã mẽ pahto hpimràatã ã mẽ panhĩpêx anê. 7Mẽ kot hkôt tãm ri amnhĩ nhĩpêx o pa pê kãm Tirtũm kot amnhĩm mẽ mex ã mẽ harênh prãm xwÿnhjaja koja nhÿrmã amnhĩm mẽ mex ã mẽ harê. Hãmri nhũm mẽ kuri htir tũm nê hkĩnh nê mex kumrêx nê pa ho pa. 8Nom mẽ kot amnhĩ mã pix mã ri hamaxpêr o ri mẽ pa xwÿnhjaja. Nê mẽ kot tanhmã amnhĩ tomnuj to gryk ã Tirtũm kapêr kaga xwÿnhjaja koja kãm mẽ hkĩnh kêt nê tanhmã mẽ homnuj tÿx to. 9Mẽ kot amnhĩ tomnuj xwÿnh piitã koja mẽ nhÿrmã amnhĩ xà htÿx kamã hamak rãhã nê pa ho pa. Ijaew kumrêxjaja nê hpãnhã Ijaew kêt xwÿnhjaja nhũm mẽ amnhĩ xà htÿx kamã hamak rãhã nê pa ho pa. Mẽ kot amnhĩ tomnuj tÿx o paja mÿrapê.

10No kêt tãm mẽ kot amnhĩ nhĩpêx xwÿnhjaja koja Tirtũm mẽ ho mex rax rãhã ho pa ho pa. Nê amnhĩm mẽ kot amnhĩ to mex xwÿnhjê hã mẽ harê. Nê tanhmã mẽ ho mex to nhũm mẽ kamã amnhĩ krit nê pa ho pa. Hamakêtkati nê hkĩnh nê àmnhĩx ri pa ho pa. Ijaew kwÿ kumrêxjaja nê mãânên Ijaew kêt xwÿnh kwÿjaja nhũm mẽ mex nê hamakêtkati nê hkĩnh nê àmnhĩx ri pa ho pa. 11Koja Tirtũm nhÿrmã ahpÿnhã mẽ pahte amnhĩ nhĩpêx ã mẽ pahpumunh xà hkôt tanhmã mẽ pajarênh to pê tanhmã mẽ panhĩpêx to. Mẽ ixpê Ijaewjaja nê mẽ apê Ijaew kêt xwÿnhjaja nhũm ã mẽ pahpiitã mẽ panhĩpêx anê.

12Amnepêm na pre finat Mojes mã tanhmã kapêr to nhũm kuma nê ô ri hã kagã hpa. Mẽ ixpê Ijaew ri na kapêr ã kagãja. Ra mẽ ixte mar tÿx jakamã koja mẽ ixtō ra kapêr mar tÿx tã hkôt amnhĩ nhĩpêx kêt hãmri nhũm Tirtũm tee ri amnhĩ tã omu nê ã amnhĩ nhĩpêx anhÿrja mÿrapê nhÿrmã ma mẽ kot amnhĩ xà htÿx kamã hamak tũm xàta wÿr kumê. Kot kapêr mar tÿx tã hkôt amnhĩ nhĩpêx kêt mÿrapê nhũm ã hipêx anê. No kêt mẽ apê Ijaew kêt xwÿnhjaja mẽ ixkĩnhã mẽ ari Tirtũm kapêr ã kagã hkêt jakamã koja mẽ ate kapêr nhĩrôp mẽ akuhê hã mẽ apumunh kôt tanhmã mẽ anhĩpêx to hkêt nê. Koja hpãnhã mẽ ate tanhmã amnhĩ tomnuj to ho apa mÿrapê mẽ kot amnhĩ xà htÿx kamã hamak o pa tũm xàta wÿr mẽ arê.

13Na hte mẽ kot kapêr mar ã mẽ omunh xà hkôt amnhĩm mẽ kot amnhĩ to mex xwÿnh ã mẽ harênh kêt nê. Âm mẽ kot kapêr kôt amnhĩ nhĩpêx ã mẽ omunh xà hkôt pix mã na hte amnhĩm mẽ kot amnhĩ to

mex xwỳnh ã mẽ harẽ. 14No mẽ hkwỳjaja kormã kot kapẽr mar kêt tâ te ra mẽ kot mar mex pyrãk o amnhĩ nhĩpêx. Jao amnhĩ krã hkôt tãm ri amnhĩ nhĩpêx kurê kumrêx. Te kot Ijaew pyrã nẽ Tĩrtũm kapẽr mar tỳx nẽ hkôt amnhĩ nhĩpêx o ri pata pyrãk. 15Na htem amnhĩ krã hkôt tanhmã amnhĩ nhĩpêx mex to. Te Tĩrtũm kapẽr kot mẽ hkrãm gjêx pyrãk o amnhĩ nhĩpêx o pa. Jakamã tee ri tanhmã amnhĩ tomnuj to hã amnhĩ pumu nẽ hkaprĩ nẽ. Nẽ tãm amnhĩ nhĩpêx ã amnhĩ pumu nẽ hkĩnh nẽ.

16Tã koja nhỹrmã Tĩrtũm Jejus Kris mã anẽ nhũm kuma hãmri nẽ mẽ piitã kormã mẽ htĩr ri tanhmã mẽ kot amnhĩ nhĩpêx to hã mẽ omunh xà hkôt tanhmã mẽ harẽnh to. Nẽ mẽ hamaxpẽr kôt mẽ omunh mex xà hkôt tanhmã mẽ harẽnh to. Mẽ papajaja mẽ pahte axpẽn jamaxpẽr kôt axpẽn pumunh kêt tâ Jejus kot mẽ pajamaxpẽr kôt mẽ pahpumunh par.

Tã na pa hte mẽ kãm Jejus kot tanhmã amnhĩ nhĩpêx to hã harẽnh o ixpa pẽ ã mẽ kãm ixujarẽnh anhỹr o ri ixpa.

Pawre kot hkwỳjê mã kapẽr

Rômãn 3.19-20

17Nẽ ixpyrà nẽ mẽ apê Ijaew kwỳjaja na ka mẽ axtem nẽ Ijaew kêt xwỳnhjê mã tanhmã amnhĩ to jarkrar o ri apa nẽ mẽ kãm:

—Nà mẽ ixpê Ijaew ri Tĩrtũm kapẽr ã kagà jakamã ãm mẽ papxipixjaja na hte Tĩrtũm amnhĩm mẽ inhmex ã mẽ ijarẽ. Nẽ ãm mẽ papxipixjaja na hte mẽ ixto hkra. 18Nẽ mẽ papxipixjaja na mẽ ixte Tĩrtũm kãm hprãm xà hkôt mẽmoj pumunh par nẽ mẽ kot amnhĩ to mex xà pumunh par nẽ mẽ kot amnhĩ tomnuj xà pumunh par. Mẽ apê Ijaew kêt xwỳnhjê rom mẽ ixte mẽmoj piitã omunh par kumrêx. Anẽ.

19-20Nẽ amnhĩ jarẽnh o:

—Nà te mẽ ixpê mẽ nohkre xwỳnhjê pa hã mẽ hamỳnh nẽ ri mẽ ho ixpa xwỳnh pyrãk. Jakamã Ijaew kêt xwỳnh pẽ htỳx ri mẽ pa xwỳnhjaja na pa htem mẽ kãm Tĩrtũm kapẽr tũm o mẽ ahkre mex o ri ixpa. Kormã mẽ kot hprĩ hã mar kêt jakamã na pa htem ho mẽ ahkre ho ri mẽ hkôt ixpa. Mẽ kurom mẽ ixte mar par kẽnã.

21Anhỹr ã amnhĩ jarẽnh nẽ mẽ ate kapẽr o mẽ ahkre ho apa htã hkôt amnhĩ nhĩpêx kêt nẽ.

Nẽ mẽ ate mẽ kot axpẽn pẽ àhkĩnh nẽ mẽ hkurê htã no ãm mẽ kamjaja axpẽn pẽ axàhkĩnh o ri apa.

22 Nẽ mẽ amã sãnti hkĩnh kêt ã amnhĩ jarẽnh tã axtem nẽ hwỳr agjê nẽ hpar pẽ kàxpore nhĩkwỹ xwỳnh o axàhkĩnh o ri apa.

Nẽ mẽ kot axpẽn prõ ho amnhĩkati nẽ mẽ hkurê ho apa htã mẽ kamjaja ã ri amnhĩ nhĩpêx anhỹr o ri apa.

23 Nẽ mẽ ate Tĩrtũm kapẽr ã kagà mex o mex ã harẽnh tã hkôt amnhĩ nhĩpêx hkêt nẽ. Jakamã nhũm mẽ akwỳjaja ja hã mẽ apumu nẽ mẽ apyrã nẽ Tĩrtũm ã hpijaãm kêt o pa.

24Tirtũm kapêr ã kagà htũm kot tanhmã mẽ ate amnhĩ nhĩpêx ã mẽ ajarênh to nê mẽ ajarênh kot:

Mẽ kêp Ijaew kêt xwỳnhjaja na htem Ijaew kot htỳx ri amnhĩ nhĩpêx o ri mẽ pa hã mẽ omu nê mẽ ỹ hã tanhmã Tirtũm o kapêr punuj to ho ri pa. Anê.

25Mẽ pahpê Ijaew na pu htem mẽ pahkrajaja mẽ hapôx kôt kormã mẽ hkryre ri pu htem mẽ kêp mẽmy kwrỳt kà jakà. Finat Mojes kot Tirtũm nhỹ hã mẽ panhĩgêjtê mã hã karô xà hkôt na pu htem ã mẽ hipêx anê. Mẽ pahte Tirtũm mã mẽ pahkrajê nhôr ã amnhĩ to amnhĩrit kaxyw. Jakamã na pu htem arĩ Mojes kapêr kôt ã mẽ hipêx anê nhũm Tirtũm kãm ja mex nê. Nom kot pu mẽ kapêr kwỳm ri tanhmã amnhĩ nhĩpêx to ho papa nhũm ja kêp omnuj tỳx nê hãmri pu mẽ tee ri mẽ pahkrajê my kwrỳt kà jakàr kaprỳ. Na hte Tirtũm ã mẽ pahkrajê nhĩpêx anhỹr ã mẽ pahpumunh kôt amnhĩm mẽ pamex ã mẽ pajarênh kêt nê. Nom mẽ pahte kapêr kôt amnhĩ nhĩpêx mex o papa pê mẽmy kwrỳt kà jakàrja nhũm kãm mex nê. 26Ijaew kêt xwỳnhjaja kot ã mẽ hkrajê nhĩpêx anhỹr kêt tã ra mẽ hkwỳjaja Tirtũm kapêr ma nê hkôt amnhĩ nhĩpêx o ri pa. Jao te mẽ kot amnhĩ my kwrỳt kà jakàr pyràk o amnhĩ nhĩpêx. Jakamã nhũm Tirtũm ja hã mẽ omu nê mẽ kãm:

— Nà ãm hãmri. Mẽ ate amnhĩ my kwrỳt kà jakàr kêt tã mẽ apê ixkra na ka mẽ. Anê.

27Mẽ kot amnhĩ jakàr kêt tã Tirtũm kapêr kôt amnhĩ nhĩpêx mex o ri pa nhũm amnhĩ tã mẽ omu nê mẽ arom amnhĩm mẽ kot amnhĩ to mex xwỳnh ã mẽ harê. Mẽ kot amnhĩ jakàr kêt tãã.

No mẽ kajaja mẽ ate Tirtũm nhỹ hã Mojes kapêr ã kagà mar tỳx tã hkôt amnhĩ nhĩpêx kêt nê. Ja mỳrapê koja ja hã mẽ apumu nê Ijaew kêt xwỳnhjê kĩnhã mẽ ate amnhĩ tomnuj xwỳnh ã mẽ ajarê. Ra mẽ ate amnhĩ jakàr tã mẽ ate amnhĩ tomnuj xwỳnh ã mẽ ajarê.

28Nê kot ka mẽ atô tanhmã amnhĩ to jarkrar to nê amnhĩ jarênh o:

— Nà ixpê Ijaew jakamã na hte Tirtũm mẽ kot inhmy kwrỳt kà krãhyr kôt ixto kraa. Anê.

Nom xà na hte Tirtũm ã mẽ pahte amnhĩ nhĩpêx anhỹr ã mẽ pahpumunh kôt mẽ pahto hkra? Nà kot anhỹr kêt. Na htem ãm htỳx ã amnhĩ to jarkrar anhỹr kaprỳ ho pa.

29Nê Tirtũm Karô kot mẽ hkarô mã gjêx xwỳnhjaja kêp Tirtũm kra jakamã na htem Tirtũm kãm hprãm xà hkôt amnhĩ nhĩpêx. Nom ri amnhĩ krã hkôt tanhmã amnhĩ nhĩpêx to ho pa hkêt nê. Rỳ htỳx hamaxpêr o:

— Nà kot paj Mojes kapêr ã kagà hkôt amnhĩ nhĩpêx nhũm Tirtũm ja hã ixpumu nê amnhĩm inhmx ã ijarê nê ixto hkra.

Anhỹr o hamaxpêr kêt nê. Na htem hamaxpêr o:

— Nà ra Tirtũm Karô kot ixkarôm àr jakamã ixpê hkra nhũm

amnhĩm inhmex ã ijarẽ. Jakamã kot paj ãm kôt pix mã ri amnhĩ nhĩpêx o ri ixpa rãhã ty. Kwãr mãmrĩ ixkwỳjaja amnhĩm inhmex kêt ã ijarẽ. Anẽ.

Kêr ka mẽ ã ajamaxpêr anhỹr o ri pa. ã mẽ hamaxpêr anhỹr na mex o mex.

3 1Nẽ mãn ka mẽ ra tee ri tanhmã amnhĩ kukamã ajamaxpêr to nẽ ajamaxpêr o:

—Kwa mo kaxyw na pa ixpê Ijaew? Mon pa pre we ixpê Ijaew kêtêr hkêt nẽ? Mẽ kêp Ijaew kêt xwỳnhjaja kot amnhĩ jakàr kêt tã nhũm Tĩrtũm mẽ pahpyrà nẽ mẽ ho hkra. Anẽ.

Kwa mẽ ã ri ajamaxpêr anhỹr kêt nẽ. 2Mẽ pahpê Ijaew na pre Tĩrtũm Ijaew kêt xwỳnhjê rom mẽ pahto mex rax nẽ. Na pre amnepê mã mẽ panhĩgêt mã tanhmã kapêr to. Mẽ pahpiitã mẽ pahte mar nẽ hkôt amnhĩ nhĩpêx kaxyw. Nom Ijaew kêt xwỳnhjê nhĩgêt mã ã kapêr anhỹr kêt nẽ. ãm mẽ pahpê Ijaew nhĩgêt pix mã kapêr. Jakamã mẽ pahpê Ijaew mã ja mex kumrêx. 3Nom kot kaj mẽ atõ ja ma nẽ ajamaxpêr o:

—Nà Tĩrtũm kot mẽ ixto mex mã mẽ ixtã amnhĩ jarênh tã no nhũm xep mẽ inhĩgêt kwỳjaja hkôt amnhĩ nhĩpêx kêt nẽ. Na xep prem kapêr kwỳm ri amnhĩ tomnuj o pa. Jakamã ko. Kojã Tĩrtũm mẽ ixpê mẽ hkanrêhã mẽ htãmnhwỳjaja tanhmã mẽ ixto mex to japêr ko. Anẽ.

4Kwa mẽ ri ã ajamaxpêr anhỹr kêt nẽ. Tĩrtũm na hte mẽ pahpiitã mẽ pakurom mẽmoj tã amnhĩ jarênh o hêx kêt nẽ. Tã ra kot tanhmã mẽ pahpã amnhĩ jarênh to xà hkôt kojã ã mẽ pahto mex anẽ. Kapêr ã kagã htũm kot mẽhõ tanhmã Tĩrtũm mã kapêr to nẽ harênh kot:

Pa Tĩrtũm. Nà ãm kapxipix na ka hte mẽmoj tã amnhĩ jarênh xà hkôt amnhĩ nhĩpêx o ri apa.

Jakamã na htem ãm axpên mã axêx ã akapêr ã ajarênh kaprỳ.
Anhỹr o harê.

5No kot ka mẽ atõ atỳx ajamaxpêr nẽ ajamaxpêr o:

—Xà kojã Tĩrtũm tanhmã mẽ ixte amnhĩ tomnuj to hã mẽ ixpumu nẽ gryk? Nà kojã gryk kêt nẽ. Jakamã kot paj arĩ amnhĩ tomnuj o ri ixpa. Kê mẽ piitã ja hã ixpumu nẽ ixrom Tĩrtũm tapxipix kot amnhĩ to mex o pa xwỳnh ã harênh o pa. Nà ja mex. Jakamã kot paj arĩ amnhĩ tomnuj rãhã ho ri ixpa nhũm mẽ Tĩrtũm pix mã mãn kot tãm amnhĩ nhĩpêx xwỳnh ã harê. Hãmri nhũm Tĩrtũm amnhĩ tã ixpumu nẽ tanhmã ixto hkêt nẽ. Kojã tanhmã ixto japêr hãmri nẽ ixpyrà nẽ amnhĩ tomnuj nẽ. Anẽ.

Kot kaj mẽ ã ajamaxpêr anẽ nẽ ãm amnhĩ krã hkôt ã ajamaxpêr anhỹr kaprỳ. Nom ã ajamaxpêr anhỹrja Tĩrtũm jamaxpêr kôt kêt. 6Kwa mẽ ri ã ajamaxpêr punuj anhỹr kêt nẽ. Tĩrtũm kot mẽ pahpyrà nẽ aa kot amnhĩ tomnujre hã. Kop ãm mẽ pahpyrà nẽ tanhmã kot amnhĩ tomnuj to ronhỹx tanhmã kot we amnhĩ to nẽ mẽ pahte amnhĩ tomnuj xwỳnh ã

mẽ pajarẽ? Nhỹx mẽ pahpyrà nẽ ã amnhĩ jarẽnh anẽ. Nà ã mẽ ajamaxpẽr anhỹrja mex kêt.

7-8E pa ixprĩ hã mẽ amã ja jarẽ ka mẽ inhma. Kot kaj mẽ atõ amnhĩ kukamã ajamaxpẽr o:

—E kot paj mãmri ri mẽmoj tã ixêx o ri ixpa kê mẽ ixêx nhi hã ixpumu nẽ ixrom Tĩrtũm pix mã mãn kot amnhĩ to mex ã harẽ. Nẽ ãm pix mã mãn hêx kêt xwỹnh ã harẽ. Hãmri nhũm Tĩrtũm amnhĩ tã ixpumu nẽ mẽ ã mẽ kot harẽnh anhỹrja ma nhũm ja kãm mex nẽ nhũm hkĩnh nẽ. Jakamã ixêx o ri ixpaja ã tanhmã ixto hkêt nẽ. Ra mẽ kot ixrom tãm kot amnhĩ nhĩpêx o pa xwỹnh ã harẽnh jakamã nhũm ixêx nhita ã tanhmã ixto hkêt japêr. Jakamã kot paj ixte amnhĩ tomnuj o ri ixpaja mã inhũrer kêt nẽ. Kêr kê mẽ ja hã ixpumu nẽ ixrom Tĩrtũm tapxipix kot amnhĩ to mex xwỹnh ã harẽ.

Anhỹr o ajamaxpẽr nom mẽ ajamaxpẽrja kot anhỹr kêt. Na hte akwỹjaja pa ixpê Pawre ixêx o ixpa hã ri axpẽn mã ijarẽ no na pa hte ixêx o ri ixpa hkêt nẽ. ã mẽ ajamaxpẽr anhỹr o ri apa xwỹnhjaja koja Tĩrtũm mẽ atomnuj tỳx nẽ kãm ga.

Mẽ mẽ pahte amnhĩ tomnuj xwỹnh ã mẽ pajarẽnh

Wam Korĩt 6.9; Karatas 3.22; Xitre 3.3

9Tã tanhmã kot puj mẽ pahpê Ijaew amnhĩ jarẽnh to? Xà kot pu mẽ pahte amnhĩ to mex o Ijaew kêt xwỹnhjê jakrenh ã amnhĩ jarẽ? Nà mẽ pahte ã amnhĩ nhĩpêx anhỹyre hã. Mẽ pahpê Ijaew nẽ Ijaew kêt xwỹnhjaja. Mẽ pahpiitã mẽ pahte amnhĩ tomnuj o axpẽn pyræk. Na pa pre ra mẽ amã ja jarẽ. 10Tĩrtũm kapêr ã kagã htũm kot ja jarẽnh kot:

Mêhõ na we aa kot amnhĩ tomnuj kêt kumrêx nẽ pa?

11 Nẽ mêhõ na we kot mẽmoj mex piitã omunh par?

Nẽ mêhõ na kãm Tĩrtũm prãm?

12 Nà amrakati kumrêx. Na mẽ ra piitã hkaga hpa.

Nẽ kapêr kwỹm ri tanhmã amnhĩ tomnuj to ho pa.

ãm mêhõ pyxire nẽ amnhĩ to mex o ri pa hkêt kumrêx.

13 Na htem kapêr punuj pix o ri pa.

Jakamã Tĩrtũm noo mã mẽ kot amnhĩ nhĩpêxja te kot mẽmoj tyk nẽ hkro punuj pyræk.

Na htem ãm ri hêx pix kukamã ri hamaxpẽr o pa. Tanhmã mẽ hêx to xàja te kêp kagã xoprê nhõ wenên xihitỳx pyræk.

14 Nẽ na htem mẽ piitã mẽmoj nhĩxi ho ri axpẽn mã mẽ hixi jarẽnh o pa. Nẽ ri tanhmã axpẽn japrỳ hto ho pa.

15 Nẽ tanhmã kapêr mã gêt kãm mẽ kãm kapêr to.

16 Nẽ tanhmã mẽ hkwyjê homnuj to. Jakamã nhũm mẽ piitã ri hkaprĩ nẽ mex kêt nẽ pa.

17 Nhũm htem ãm axpẽn mã mẽ gryk xà pix o kapêr o pa.

18 Nê Tirtũm ã hpijaàm kêt o pa. Na htem kapêr ma nê ãm kuma nê kãm hkĩnh kêt o pa.

Ã na htem amnhĩ nhĩpêx anhÿr rãhã ho pa. Anê.

Ã Tirtũm kapêr ã kagã htũm kot mẽ pajarênh anhÿr. 19Mê pahpê Ijaew ra mẽ pahte ja jarênh mar tÿx. Tirtũm kapêr ã kagã htũm kwÿ na. Na hte ã mẽ kot amnhĩ tomnuj xwÿnhjê jarênh anê. Nê mãânên mẽ papajaja. Mẽ pahpê Ijaew na hte ã mẽ pajarênh anê. No ãm mẽ papapxipix hkêt. Krĩ piitã hkôt ri mẽ pa xwÿnhjaja nhũm ã mẽ harênh kot anhÿr. Ijaew kêt xwÿnhjaja nê mẽ pahpê Ijaew. Mẽ pahpiitã mẽ pahte amnhĩ tomnuj xwÿnh jakamã mẽmo kaxyw kot pu mẽ pahte amnhĩ tomnuj kêt ã ri amnhĩ to jarkrar o papa? Kot puj mẽ ã amnhĩ jarênh anhÿr kaprÿ. Jakamã koja Tirtũm mẽ pahpiitã mẽ pahte amnhĩ tomnuj mÿrapê tanhmã mẽ panhĩpêx to. 20Mê pahtô koja mẽ pahte kapêr kôt pix mã amnhĩ nhĩpêx o papa hã mẽ pajarê? Nê mẽ pahtô mã koja mẽ pamã kapêr nê mẽ pamã:

— Nã na ka hte akatãt kôt ixkapêr kôt pix mã amnhĩ nhĩpêx mex nê. ãm hãmri na ka hte ã amnhĩ nhĩpêx anhÿr o apa.

Anhÿr o mẽ pahtô mã kot we ã kapêr anê? Nã aa kot mẽ pahtô mã kapêr anhÿr kêt. Na pu htem ãm kapêr ma nê tee ri amnhĩ kukamã pajamãxpêr. Mẽ pahte amnhĩ tomnuj ã amnhĩ pumunh kaxyw na pre mẽ pamã kapêr ã kagã htũmja gô. Mẽ pahtô mẽ pahte kapêr ã kagã hkôt amnhĩ nhĩpêx mex o papa hkêt kênã kot kêt ri amnhĩm mẽ pahte amnhĩ to mex xwÿnh ã mẽ pajarê.

Tanhmã Tirtũm kot mẽ pahto hkra to hã harênh

Atre 17.30-31; Karatas 2.16-21; Piripos 3.7-9; Xitre 3.5; Xiakre 2.10

21Nê na hte Tirtũm mẽ pahte kapêr kôt amnhĩ nhĩpêx ã mẽ pahpumunh kôt amnhĩm mẽ pahte amnhĩ to mex xwÿnh ã mẽ pajarênh kêt nê. Jakamã mẽhõ kukwak ri koja we ã mẽ pajarênh anê? Nã nhãm mẽhõ kot tãm amnhĩ nhĩpêx rãhã ho pa hã omunh pix kukwak ri koja ã mẽ pajarênh anê. Tã mẽhõ kukwak ri kot ã mẽ pajarênh anhÿr xwÿnhhta na pre ra mẽ pamã ho amnhĩrĩt. Amnepêm Tirtũm kapêr ã kagã htũm kamã na pre mẽhõ hkukamã tanhmã harênh to. Nê Tirtũm nhÿ hã mẽ kapêr jarênh o pa xwÿnhjaja haxwÿja kukamã tanhmã harênh to ho pa. 22Jejus Krisja na prem hkukamã harênh o pa. Tãm na pu htem hkôt amnhĩ xunhwÿ nê amnhĩ kaxyw kãm pajamãxpêr rãhã ho papa nhũm Tirtũm ja pix ã mẽ pahpumunh kôt amnhĩm mẽ pahte amnhĩ to mex xwÿnh ã mẽ pajarê. Mẽ kot Jejus kôt amnhĩ xunhwÿr xwÿnh piitãã. Mẽ ixpê Ijaew nê mẽ apê Ijaew kêt xwÿnhjaja. Mẽ pahpiitã mẽ pahte axpên pyrãk jakamã kot puj mẽ pahtô Jejus kôt amnhĩ xãm nhũm Tirtũm Kra Jejus kot amnhĩ to mex pix o pa kukwak ri mẽ pahpumu nê amnhĩm pajarênh o:

— Nà ãm hãmri. Ra kot ixkra Jejus kôt amnhĩ xãm jakamã ra inhmã te Jejus kot amnhĩ nhĩpêx pyrã nê amnhĩ to mex o pa. Anê.

23No mẽ pahtõ na mẽ pahte Tĩrtũm mẽ Jejus wa uràk nê amnhĩ nhĩpêx mex rãhã ho ri papa? Nà amrakati kumrêx. Mẽ pahpiitã mẽ pahte amnhĩ tomnuj xwỳnh kênã. 24Tã Tĩrtũm kot mẽmoj tã mẽ pakutã nojarêr rãhã jakamã na hte Jejus Kris kukwak ri amarĩ amnhĩm mẽ pahte amnhĩ to mex xwỳnh ã mẽ pajarênh o pa. Mẽ pahte Jejus kôt amnhĩ xunhwỳr xwỳnh piitã nhũm ã mẽ pajarênh anê. Ra Jejus kot htyk o mẽ pahte amnhĩ tomnuj piitã hpãnhã amnhĩrer par jakamã na hte Tĩrtũm Jejus kukwak ri amarĩ mẽ pahte amnhĩ to mex xwỳnhjê hã mẽ pajarê. Te mẽ pahte amnhĩ tomnuj kêt kumrêx pyrãk mẽ pajarê. 25-26Na pre mẽ pahwỳr Jejus mẽ nhũm mẽ pahwỳr wrỳ nê mẽ panê ty nê htyk o mẽ pahte amnhĩ tomnuj piitã hpãnhã amnhĩrer pa. Jakamã kot pu mẽ pahtõ amnhĩ kaxyw hkôt pajamxpêr nhũm Tĩrtũm ja hã mẽ pahpumu nê Kra kukwak ri amnhĩ katut kôt mẽ pahte amnhĩ tomnuj piitã rênh pa. Jao te aa mẽ pahte amnhĩ tomnuj kêt kumrêx pyrãk ã mẽ pahpumu.

No kêt amnepêm kormã Jejus wrỳk nê mẽ panê htyk kêt ri mẽ pa xwỳnhjaja. Tanhmã na pre Tĩrtũm mẽ kot hkôt amnhĩ xunhwỳr xwỳnhjê nhĩpêx to? Kormã Jejus mẽ panê htyk kêt ri mẽ pa xwỳnhjaja tanhmã na pre mẽ hipêx to? Nà na pre mẽ hkwỳjaja amnhĩ kaxyw Tĩrtũm kôt hamaxpêr nê hkôt amnhĩ xunhwỳ nhũm amnhĩ tã mẽ omu nê amnhĩm mẽ harênh o:

— Nà ãm hãmri. Koja nhỹrmã Ixkra ma mẽ hwỳr wrỳ nê mẽ nê ty nê htyk o mẽ kot amnhĩ tomnuj pãnhã amnhĩrer pa. Jakamã koja mẽ tãmjaja amnhĩ tomnuj pãnhã amnhĩrer kêt nê. Anê.

Tã nhũm Jejus tãm mẽ pahwỳr wrỳ nê mẽ pahpiitã mẽ panê ty. Jakamã nhũm Tĩrtũm ra mẽ pahte hkôt amnhĩ xunhwỳr xwỳnhjaja Kra kukwak ri amnhĩ katut kôt mẽ pahte amnhĩ tomnuj piitã rênh pa. No na hte amarĩ ã mẽ panhĩpêx anhỹr kêt nê. ãm Jejus tyk pix kukwak ri na hte ã mẽ panhĩpêx anê. ãm hãmri na hte ã mẽ panhĩpêx mex anê. Na hte tãm mẽ panhĩpêx rãhã ho pa. 27Jakamã kot puj mẽ ã pajamaxpêr anê nê pajamaxpêr o:

— Nà na pa hte amnhĩ to mex rãhã o ri ixpa. Amnhĩ to mex o mẽ piitã mẽ hakrenh pa.

Anhỹr o pajamaxpêr kêt nê. Koja mẽhõ ã hamaxpêr anê nê ãm amnhĩ jarênh o hêx. Na hte Tĩrtũm mẽ pahte amnhĩ to mex ã mẽ pahpumunh kôt amnhĩm mẽ pahte amnhĩ to mex xwỳnh ã mẽ pajarênh kêt nê. Mẽ pahte amnhĩ to mex rãhãre hã. Nom na pu htem amnhĩ kaxyw Jejus mã pajamaxpêr nê hkôt amnhĩ xunhwỳ nhũm ja hã mẽ pahpumu nê rĩ kormã amnhĩm mẽ pamex ã mẽ pajarê.

28E pa axte tanhmã mẽ amã ja jarênh to ka mẽ aprĩ hã inhma. Mẽmoj pumunh kôt na hte Tĩrtũm mẽ pahte amnhĩ to mex xwỳnh ã mẽ pajarênh

wehe? Xà mẽ pahte kapêr tũm kôt amnhĩ nhĩpêx o ri papa hã mẽ pahpumunh kôt? Nà na hte ja hã mẽ pahpumunh kôt ã mẽ pajarênh anhỹr kêt nê. Mẽ pahte hkôt amnhĩ nhĩpêx rãhã ho papare hã. ãm mẽ pahte amnhĩ kaxyw Kra Jejus kôt pajamaxpêr nê hkôt amnhĩ xunhwỳr ã mẽ pahpumunh kôt pix mã na hte mẽ pahte amnhĩ to mex xwỳnh ã mẽ pajarê. Ja pix ã mẽ pahpumunh kôt na hte ã mẽ pajarênh anê.

29Nê xà Tĩrtũm kêp mẽ ixpê Ijaew pix nhõ Tĩrtũm pix na? Nà kêp mẽ ixpix nhõ Tĩrtũm kêt. Kêp mẽ ixpê Ijaew nhõ Tĩrtũm nê mãânên kêp mẽ apê Ijaew kêt xwỳnhjê nhõ Tĩrtũm.

30Nê Tĩrtũm ãm pyxi mex. Axtem hõ kêt. Na hte mẽ pahpiitã mẽ panhĩpêx o axpên pyrãk. Jakamã na hte mẽ kot amnhĩ kaxyw Jejus kôt hamaxpêr o mẽ pa xwỳnhjê pumu nê mẽ kot amnhĩ to mex xwỳnh ã mẽ harê. Mẽ ixpê Ijaew nê mãânên mẽ apê Ijaew kêt xwỳnhjaja.

31Tã koja mẽhõ htỳx hamaxpêr o:

— Nà ixte amnhĩ kaxyw Jejus kôt ijamaxpêr mex o ixpa nhũm Tĩrtũm kot amnhĩm inhmex ã ijarênh jakamã kot paj axte kapêr kôt amnhĩ nhĩpêx kêt nê. Kot paj ãm amnhĩ krã hkôt amnhĩ nhĩpêx o ri ixpa. Ra Tĩrtũm kot ixto hkra kênã.

Anhỹr o ajamaxpêr japêr. Kwa mẽ ã ri ajamaxpêr anhỹr kêt nê. Na htem amnhĩ kaxyw Jejus kôt hamaxpêr hãmri nê kãm hkôt amnhĩ nhĩpêx prãm rãhã nê pa ho pa.

Apraãw kot amnhĩ kaxyw Tĩrtũm kôt hamaxpêr

Karatas 3.6-18; Xiakre 2.23

4 1Nê mẽ panhĩgêt finat Apraãwja kêp mẽ pahpê Ijaew pàr krax. Tã mẽmoj tã na pre Tĩrtũm omu nê kot amnhĩ to mex xwỳnh ã harê? 2Xà kot kãm tanhmã amnhĩ nhĩpêx to hã karõ xà hkôt amnhĩ nhĩpêx mex ã omunh xà hkôt nhũm pre ã harênh anê? Nà ja kôt kêt. Kop apu ja kôt ã kot harênh anhỹr ronhỹx Apraãw amnhĩ tã omu nê Tĩrtũm mã amnhĩ to jarkrar nê kãm:

— Pa Tĩrtũm? E mãn ka ixpumu. Na pa hte akapêr kôt amnhĩ nhĩpêx mex o ri ixpa.

Anhỹr o nhỹx pre kãm amnhĩ to jarkrar. No na pre tanhmã kãm amnhĩ to jarkrar to hkêt nê. 3Tã mẽmoj tã omunh xà hkôt na pre Tĩrtũm amnhĩm mex ã harê? Nà Tĩrtũm kapêr ã kagã htũm kot tanhmã Apraãw jarênh to kot:

Na pre Apraãw amnhĩ kaxyw Tĩrtũm kôt hamaxpêr nê hkôt amnhĩ xãm nhũm amnhĩ tã omu nê amnhĩm mex ã harê.

Anê.

4Mẽ õ patrãwjaja na htem kãm mẽ àpênh xwỳnhjaja àpênh mex ã mẽ omunh xà hkôt mẽ kãm amnhĩre. 5No Tĩrtũm na hte ã mẽ panhĩpêx anhỹr kêt nê. Na hte mẽ pahte tãm amnhĩ nhĩpêx ã mẽ pahpumunh kôt

amnhĩm mẽ pahte amnhĩ to mex xwỳnh ã mẽ pajarẽn h kêt nẽ. ãm mẽ pahte amnhĩ kaxyw Kra Jejus kôt pajamxpẽr nẽ hkôt amnhĩ xunhwỳr ã mẽ pahpumunh kôt pix mã na hte amnhĩm ã mẽ pajarẽn anẽ. Ra mẽ pahte amnhĩ tomnuj o ri papa htã hpãnhã amnhĩ kaxyw Jejus kôt pajamxpẽr xwỳnh pixjaja na hte ã mẽ pajarẽn anẽ.

6Jakamã na hte mẽ pamã amnhĩ jarẽn h o:

—Ixte mẽ amex ã mẽ ajarẽn h tã no ãm mẽ ate amnhĩ to mex kôt mẽ apumunh kôt na pa ã mẽ ajarẽn h anhỳr kêt nẽ. ãm mẽ ate amnhĩ kaxyw Ixkra mẽ wa ixkôt ajamxpẽr nẽ wa ixkôt amnhĩ xunhwỳr ã mẽ apumunh kôt na pa hte ã mẽ ajarẽn h anẽ. Anẽ.

Pu mẽ ã kot pamã kapẽr anhỳr ã amnhĩ tã kuma nẽ pahkĩnh nẽ. Pahi finat Tawi na pre haxwỳja ja jarẽn h o:

7 Na hte Tĩrtũm amnhĩ katut kôt mẽ pahte amnhĩ tomnuj piitã rẽn h pa nẽ axte kãm hamaxpẽr kêt nẽ.

Jakamã pu mẽ ja hã amnhĩ pumu nẽ pahkĩnh nẽ.

8 Nẽ amnhĩ kukamã pajamxpẽr o: “Hẽxta waa nẽ. Na pa pre amnhĩ tomnuj o ixpa nẽ tee ri ja hã amnhĩ pumu nẽ ixkaprĩ nẽ.

Hãmri nẽ amnhĩ to Tĩrtũm wỳ nhũm inhma nẽ ixte amnhĩ tomnuj o hapẽx pa nẽ axte kãm hamaxpẽr kêt nẽ.

Nà ãm hãmri. Ja mex kumrẽx.” Anẽ.

9Tã mẽ kot ja hã amnhĩ pumunh nẽ hkĩnh xwỳnhjaja mẽmojaja na mẽ? Xà mẽ kot amnhĩ my kwrỳt kà jakàr xwỳnh pix kwỳjaja na pre pahi Tawija ã mẽ harẽn h anẽ nà? Nà mẽ tapxipixjaja kêt. Mããnẽn mẽ kot amnhĩ jakàr kêt xwỳnh kwỳjaja. Tanhmã na pre ra Tĩrtũm kapẽr ã kagà htũm kot finat Apraãw jarẽn h to? Na pre harẽn h o:

Na pre Apraãw amnhĩ kaxyw Tĩrtũm kôt hamaxpẽr nẽ hkôt amnhĩ xãm nhũm amnhĩ tã omu nẽ amnhĩm mex ã harẽ.

Anẽ.

10Xà Apraãw ra kot amnhĩ my kwrỳt kà krãhyr nhĩrô pê na pre Tĩrtũm amnhĩm mex ã harẽ? Nà kormã kot amnhĩ krãhyr kêt ri na pre ã harẽn h anẽ. 11Kormã kot amnhĩ krãhyr kêt ri kãm kapẽr nẽ kãm:

—E ate amnhĩ kaxyw inhmã ajamxpẽr nẽ ixkôt amnhĩ xãm ã ixte apumunh kôt na pa amnhĩm amex ã ajarẽ.

Anhỳr o kãm kapẽr hãmri nẽ rĩ kormã kãm tanhmã amnhĩ krãhyr to hã kãm karô nhũm kuma nẽ mar xà hkôt amnhĩ my kwrỳt kà hkwỳ krãhta. Kot Tĩrtũm mã amnhĩ nhõr ã amnhĩ to amnhĩrĩt kaxyw ã amnhĩ nhĩpẽx anẽ.

Nom kormã amnhĩ krãhyr kêt ri na pre Tĩrtũm amnhĩm mex ã harẽ. Tã Ijaew kêt xwỳnhjaja kot amnhĩ jakàr kêt tã mẽ hkwỳjaja Apraãw pyrã nẽ amnhĩ kaxyw Tĩrtũm mã hamaxpẽr nẽ kãm amnhĩ nhõr jakamã Apraãw te kẽp mẽ hpàr krax maati pyrãk. 12Nẽ mããnẽn mẽ

pahpê Ijaew. Kot puj mẽ pahtõ amnhĩ kaxyw Tĩrtũm kõt pajamaxpêr nhũm amnhĩ tã mẽ pahpumu nê mẽ pamex ã mẽ pajarê. No ãm mẽ pahte amnhĩ jakâr ã mẽ pahpumunh kõt ã mẽ pajarênh anhÿr kêt nê. ãm Apraãw pyrã nê amnhĩ kaxyw Tĩrtũm kõt pajamaxpêr pix ã mẽ pahpumunh kõt na hte mẽ pamex ã mẽ pajarê. Kormã Apraãw kot amnhĩ my kwryt kà krãhyr kêt ri ra kot amnhĩ kaxyw Tĩrtũm mã hamaxpêr jakamã kêp mẽ pahpê Ijaew mẽ pahte urak nê amnhĩ kaxyw Tĩrtũm mã pajamaxpêr xwÿnhjê hpâr krax maati. Ijaew kêt xwÿnhjê pyrã nê kêp mẽ pahpâr krax maati.

Tĩrtũm kot Apraãw mã mẽmoj mex jarênh

Karatas 3.22

13Amnepê m na pre Tĩrtũm Apraãw mã tanhmã kapêr to nê kãm:

—E koja nhÿrmã akanrêhã akra nê atãmnhwÿjaja amÿrpê apyrã nê krĩ piitã hkõt mẽ kêp mẽ õ pahi. Anê.

Tã tanhmã Apraãw kot amnhĩ nhĩpêx to hã omunh xà hkõt na pre ã kãm kapêr anê? Xà kot kãm tanhmã amnhĩ nhĩpêx to hã karõ nhũm kot hkõt amnhĩ nhĩpêx mex ã omunh xà hkõt na pre hkĩnh nê ã kãm kapêr anê? Nà kot anhÿr kêt. Mẽ pahtõ kot pu we Tĩrtũm kapêr xà hkõt pix mã amnhĩ nhĩpêx mex rãhã ho ri papa? Mẽ pahpê hihtÿx kênã. ãm kot amnhĩ kaxyw Tĩrtũm kõt hamaxpêr nhũm kot amnhĩ tã omunh nê amnhĩm mex ã harênh kõt pix mã na pre ã kãm kapêr anê. 14Kop apu kot kãm tanhmã kapêr to nê kãm:

—E Apraãw. Kot kaj ixkapêr piitã ama nê hkõt amnhĩ nhĩpêx mex rãhã ho ri apa. Hã koja nhÿrmã akanrêhã akra nê atãmnhwÿjaja kêp krĩ piitã hkõt mẽõ pahihti.

Anhÿr o kãm kapêr ronhÿx ãm kãm ã kapêr anhÿr kaprÿ. Apraãw aa kot kapêr piitã hkõt amnhĩ nhĩpêx mex o pare hã. Kop apu ã kãm kapêr anhÿr ronhÿx pre kuma nê tee ri amnhĩ kukamã hamaxpêr nê hamaxpêr o:

—Kwa nã. Ra ixte Tĩrtũm kõt amnhĩ xãm tã tanhmã kot pa amnhĩ to nê kapêr piitã hkõt amnhĩ nhĩpêx mex rãhã ho ri ixpa? Kot paj tee ri inhmã ã amnhĩ nhĩpêx anhÿr o ixpa hprãm kaprÿ. Jakamã koja nhÿrmã ixkanrêhã ixkra nê ixtãmnhwÿjaja kêp mẽ õ pahi hkêt nê pa. Hêxta waa nê. 15Koja Tĩrtũm ixte kapêr kwÿm ri tanhmã ixte amnhĩ tomnuj to hã ixpumu nê tanhmã ixtomnuj to. No mẽhõ kot we kapêr piitã hkõt amnhĩ nhĩpêx mex rãhã ho pa? Nã amrakati kumrêx.

Anhÿr o nhÿx pre hamaxpêr. 16No na pre Tĩrtũm ã kãm kapêr anhÿr kêt nê. Ra kot hprĩ hã mẽ pahte amnhĩ nhĩpêx ã mẽ pahpumunh mex kênã. Na pre ãm kãm:

—E ate amnhĩ kaxyw ixkõt ajamaxpêr nê ixkõt amnhĩ xãm jakamã kot paj amarĩ ato mex nê. Anê.

Tĩrtũm na hte mẽmoj tã amnhĩ jarẽnh o amnhĩ to hẽx kêt nẽ. Na hte mẽmoj tã amnhĩ jarẽnh xà hkõt tanhmã mẽmoj nhĩpẽx to ho ri pa. Jakamã koja mẽ pahte Apraãw pyrã nẽ amnhĩ kaxyw hkõt pajamxpẽr xwỳnh piitã mẽ pahto mex nẽ.

Nẽ xà na pre ã mẽ pamã kapẽr anẽ nẽ mẽ pamã:

—E kot kaj mẽ ixkapẽr kõt pix mã ri amnhĩ nhĩpẽx o ri apa hã kot paj mẽ ato mex rax nẽ.

Anhỹr o mẽ pamã kapẽr? Nà na pre ã mẽ pamã kapẽr anhỹr kêt nẽ. Na pre mẽ pamã:

—Kot kaj mẽ finat Apraãw pyrã nẽ amnhĩ kaxyw ixkõt ajamxpẽr nẽ ixkõt amnhĩ xunhwỳ hã kot paj mẽ ato mex nẽ.

Anhỹr o mẽ pamã kapẽr. Tã Apraãw kumrẽx kot mẽ pakukamã amnhĩ kaxyw hkõt hamaxpẽr jakamã te kẽp mẽ pahpiitã mẽ pahte uràk nẽ ã amnhĩ nhĩpẽx anhỹr xwỳnhjẽ pàr krax maati pyràk.

17Amnepẽm na pre Tĩrtũm tanhmã Apraãw mã kapẽr to. Kot tanhmã kãm kapẽr toja Tĩrtũm kapẽr ã kagã htũm kamã na. Na pre kãm:

Kot kaj apẽ ahpỹnhã ri mẽ urojẽ hpàr krax. Anẽ.

Kormã Apraãw kra hkõt tã nhũm hkra hkukamã ã kãm kapẽr anẽ. Hãmri nhũm kuma nẽ hkõt hamaxpẽr kurẽ kumrẽx nẽ hamaxpẽr o:

—Hẽxta waa nẽ. Ra ixprõ mẽ wa ijamẽ wa ixpigêt tỳx nẽ wa ixkra hkõt kumrẽx. Kot paj wa tanhmã amnhĩ to nẽ tokyx ty. Tã ra Tĩrtũm kot ixkra nẽ ixtãmnhwỳjẽ hkukamã ã inhmã mẽ harẽnh anhỹr kẽnã. Jakamã kot pa xep wa ixpigêt tỳx tã tanhmã amnhĩ to nẽ ixkra. Nà kot pa xep wa anẽ. Nẽ koja ixkraja tanhmã amnhĩ to nẽ ixpẽ htyk japẽr tã koja Tĩrtũm akupỹm inhmã ho htĩr. Nà koja inhmã ho anẽ. Ra kot inhmã ixkra nẽ ixkanrẽhã ixtãmnhwỳ xohtõ jarẽnh kẽnã. Anẽ.

18-19Na pre ra hpigêt tỳx nẽ. Ra hã amgrã pẽ 100 nẽ hkurẽ kêt nẽ pa. Nhũm hprõ mããnẽn hpigêx tỳx nẽ. Nẽ õhy kamã hkra hkõt kumrẽx. Kormã wa hkra hkõt tã nhũm Tĩrtũm Apraãw mã hkra nẽ htãmnhwỳ xohtõ hã harẽ. Nẽ kẽp mẽ urojẽ xohtõjẽ pàr krax ã kãm harẽ. Hãmri nhũm kuma nẽ amnhĩ kaxyw hkõt hamaxpẽr tỳx kurẽ kumrẽx. 20Nẽ ã amnhĩ nhĩpẽx anhỹr rãhã ho pa. Na pre war amnhĩ kra hã amnhĩ jarẽnh ma nẽ tee ri amnhĩ kukamã hamaxpẽr kêt nẽ. ãm Tĩrtũm tãm kot wa kãm wa hkra jarẽnh pix mã hamaxpẽr pẽ amnhĩ kaxyw kãm hamaxpẽr tỳx o ri wa pa. Nẽ hamaxpẽr o:

—Nà ra wa ixpigêt tỳx kumrẽx tã koja xep Tĩrtũm wa inhmã wa ixkra hõ gõ. Nà koja wa inhmã kugõ. Hẽxta waa nẽ. ãm hãmri Tĩrtũmja mex o mex. 21Nà kot wa inhmã wa ixkra jarẽnh xà hkõt koja wa inhmã kugõ. Ja kaxyw àhpumunh o àhpumunh. Tĩrtũmja hẽx kêt. Anẽ.

22Hãmri nhũm Tĩrtũm ã hamaxpẽr anhỹr ã omu nẽ amnhĩm mex ã harẽ. Nẽ kot kãm amnhĩ jarẽnh xà hkõt wa kãm wa hkraja gõ.

23Nom na pre amnhĩm Apraãwja pix mex ã harẽnh kêt nẽ. 24Kot puj

mě pahtō urāk nē amnhĩ kaxyw hkôt pajamaxpěr nhũm amnhĩ tã mẽ pahpumu nē ra kot Apraãw jarēnhta pyrã nē amnhĩm mẽ pamex ã mẽ pajarē. Na pre mẽ panhō Pahihti Jejus ty nhũm Tĩrtũm akupỹm ho htĩr. Tã mẽ papajaja na pu prem amnhĩ kaxyw Jejus kôt pajamaxpěr nhũm Tĩrtũm ja hã mẽ pahpumunh kôt mẽ pahte amnhĩ to mex xwỹnh ã mẽ pajarē. 25Na pre mẽ pahwỳr Kra Jejus mẽ nhũm mẽ pahwỳr wrỳ. Tã nhũm mẽ axtem nē kupĩ nom nhũm amarĩ htyk kêt nē. Na pre htyk o mẽ pahte amnhĩ tomnuj pãnhã amnhĩrer pa. Ja kaxyw na pre Tĩrtũm mẽ pahwỳr kumẽ. Jakamã nhũm prem kupĩ nhũm akupỹm ho htĩr. Tã mẽmo kaxyw na pre Tĩrtũm ã mẽ pahwỳr Kraja mẽnh nhũm mẽ panê htyk anê nhũm akupỹm ho htĩr? ãm kot kukwak ri amnhĩm mẽ pahte amnhĩ kaxyw hkôt pajamaxpěr xwỹnhjaja mẽ pahte amnhĩ to mex xwỹnh ã mẽ pajarēnh pix kaxyw.

Tĩrtũm kot mẽ pahto hkwy hã harēnh

Matêwre 5.12; Sikũn Korĩt 4.8, 5.18-21; Xiakre 1.2-4; Wam Pêtre 4.12, 5.9

5 1Nē na pu prem amnhĩ tomnuj o ri papa nhũm Tĩrtũm ja hã mẽ pahpumu nhũm ja kēp omnuj nē. Jakamã nhũm Jejus amnhĩ grõnh kôt wrỳ nē mẽ panê ty. Nhũm Tĩrtũm htykja kukwak ri mẽ pahto hkwy. Mẽ pahte amnhĩ kaxyw hkôt pajamaxpěr nē hkôt amnhĩ xunhwỳr ã mẽ pahpumu hãmri nē ã mẽ panhĩpêx anê pu mẽ ra pahpê hkwy hã papa. 2Na pre Jejus Tĩrtũm mã mẽ pajarēnh o:

—E jajê pumu. Na mẽ ra amnhĩ kaxyw pamã hamaxpěr nē pahkôt amnhĩ xunhwỳ. Anê.

Hãmri nhũm kuma nē mẽ pahto mex nē mẽ pakutã nojarêt rãhã ho pa. Tã kot puj mẽ pahpê hkrajaja nhỹrmã pano ho Tĩrtũm mex o mex xwỹnhja pumu. Jakamã na pu htem amnhĩ kukamã ã pajamaxpěr anhỹr o pahkĩnh nē papa nē pajamaxpěr o:

—Hêxta waa nē. Kot paj nhỹrmã inhno ho Tĩrtũm mex o mex ã omu nē kuri ixpa ho ixpa. Nã ãm hãmri. Inhmã omunh prãm tỳx kumrêx. Anê.

3-4Nē na htem Jejus ã mẽ pahtomnuj nē pu mẽ pahpunuj nē ri papa. Pamex kêt nē tã tee ri amnhĩ kukamã pajamaxpěr o ri pahkaprĩ nē papa hkêt nē. Kwãr mẽ mãmri ã mẽ panhĩpêx anê. Pu mẽ pahpunuj kurê Jejus kôt amnhĩ xunhwỳr tỳx o kormã mō. Nē mẽ umaj hkaga hkêt nē. Arĩ amnhĩ wỳr kamã pajamak o papa. Jao amnhĩ kaxyw kumã pix mã kãm pajamaxpěr tỳx rãhã pahkĩnh nē ri papa.

Kot puj mẽ ã amnhĩ nhĩpêx anhỹr o ri papa nhũm Tĩrtũm ja hã mẽ pahpumu nhũm ja kãm mex nē. Hãmri nhũm ja kaxyw tanhmã mẽ pahto paxihtỳx to pu mẽ pahpunuj tã hkôt pajamaxpěr tỳx rãhã nē.

5Nē ra mẽ kot Jejus ã tanhmã mẽ panhĩpêx to htã pu mẽ amnhĩ kaxyw tee ri kãm pajamaxpěr kaprỳ hkêt nē. Ra kot mẽ pamã amnhĩ Karō nhõr nhũm kot mẽ pahkarō mã gjêx kênã kot pu kêt mẽ ri tee ri

amnhĩ kaxyw kãm pajamaxpër kaprÿ. Na hte Karõja mẽ pahkarõ kamã mẽ pamã Tirtũm kapër jarënh o amnhĩrĩt nẽ kãm mẽ pajapê htÿx ã harënh o amnhĩrĩt rãhã nẽ.

6Amnepê mã na pre mẽ piitã amnhĩ tomnuj o ri pa nẽ tee ri kãm amnhĩ to mex rãhã hprãm kaprÿ. Mẽhõ kot we ja kaxyw tanhmã mẽ hkrã hto? Jakamã nhũm Tirtũm ja hã mẽ omu hãmri nẽ mẽ kaxyw Kra Jejus mã kãm:

—E inhma. Ka kot kaj mẽ kot tanhmã amnhĩ tomnuj to ho paja ã ma mẽ hwÿr wrÿ. Ixte mẽ nẽ atyk kaxyw agrõnh kõt mẽ hwÿr amënh jakamã kot kaj wrÿ nẽ mẽ kãm ixkapër jarënh o ri mẽ hkõt apa. Rãhã nhũm mẽ hkwyjaja apĩ ka mẽ piitã mẽ nẽ ty. Anẽ.

Hãmri nhũm kuma nẽ kãm:

—Tõe. Nã kot paj amã hprãm xã hkõt ã amnhĩ nhĩpêx anẽ. Anẽ.

Hãmri nẽ man amnhĩ grõnh kõt mẽ pahwÿr wrÿ. 7-8Xã koja mẽhõ kãm axpën japê xaj axpën nẽ ty nã? Xã kot mẽhõ tãm kot amnhĩ nhĩpêx xwÿnh tã nhũm mẽ kot hpĩr kaxyw nhũm hkrãmnhwÿja kãm hapê nẽ. Nẽ nẽ amnhĩ grõnh kõt mẽ kãm xa nhũm mẽ kupĩ nhũm nẽ ty? Nã kot apu nẽ htyk japêr ko. No mẽ papajaja. Na pu htem mẽhõ hkrãmnhwÿta kĩnhã arĩ amnhĩ tomnuj rãhã ho ri papa htã nhũm Tirtũmja arĩ kãm mẽ pajapê nẽ. Nẽ kãm mẽ pajapê xaj mẽ pahwÿr Kris mẽ nhũm mẽ panê ty. Arĩ mẽ pahte amnhĩ tomnuj rãhã ho papa tãã. Na pre ã Tirtũmja kãm mẽ pajapê hã ã mẽ pahwÿr mẽnh anẽ. 9Na pre ty nhũm hkamrõ hkwy axkapĩ nhũm Tirtũm ja hã omunh xã hkõt tãm amnhĩm mẽ paxunhwÿ. Tã Jejus kukwak ri koja ma mẽ kot amnhĩ xã htÿx kamã hamak tũm xãta wÿr mẽ parënh kêt nẽ. Mẽ pahpê hkwy kënã kot kêt hwÿr mẽ parẽ.

10Nom kormã mẽ pahpê hkwy hkêt ri na pu prem te ra kutã amnhĩ xunhwÿr pyrãk o amnhĩ nhĩpêx. Tã nhũm Kra mẽ panê ty pu mẽ hkõt amnhĩ xunhwÿ. Jakamã nhũm Tirtũm Jejus tyk kukwak ri mẽ pahto hkwy. Nẽ ra akupÿm Kra ho htĩr jakamã kot puj mẽ pahte hkõt amnhĩ xunhwÿr xwÿnhjaja nhÿrmã wa urãk nẽ wa kuri pahĩr tũm nẽ pamex kumrëx nẽ papa ho papa.

11Nẽ mẽ pahpê kuwy rax wÿr mẽ papa mã xwÿnh kêt jakamã na pu htem pahkĩnh nẽ pajamakêtkati nẽ ri papa. Nom ja pix ã na pu htem ã amnhĩ nhĩpêx anhÿr kêt nẽ. Mẽ pahpê Tirtũm krãmnhwÿ jakamã na pu htem mããnën pahkĩnh nẽ ri papa. Pahihti Jejus Kris kot mẽ panê htyk ã omunh xã hkõt na pre Tirtũm mẽ pahte hkõt amnhĩ xunhwÿr xwÿnhjê ho hkwy jakamã na pu htem pahkĩnh nẽ pajamakêtkati nẽ ri papa.

Atãw mẽ Kris wa harënh

Wam Korĩt 15.20-22, 45-49

12-13Nẽ amnepêm na pre Tirtũm finat Mojes mã tanhmã kapër to. Hãmri nhũm kuma nẽ Ijaew kot tanhmã amnhĩ nhĩpêx to ho pa kaxyw

mê kãm mêmojta ã karõ nê mê kãm hã hkagã. Mê kot kamã harênh nê mar nê Tirtũm kôt amnhĩ nhĩpêx kaxyw. Hãmri nhũm mê tee ri ã kot mê kãm mêmojtã karõja ma nê tanhmã axpên mã kapêr to nê axpên mã:

—Kwa na pu htem ã amnhĩ nhĩpêx anhÿr kêt nê. Na pu htem ãm amnhĩ tomnuj tÿx kumrêx o ri papa nê amnhĩ to mex kêt kumrêx. Anê.

Ãm hãmri na prem ã amnhĩ jarênh anê. Mê pahpiitã mê pahte amnhĩ tomnuj xwÿnh kênã. My kot wa pê finat Atãwja kumrêx na pre tanhmã mê pahte amnhĩ tomnuj to ho hkrax. Mÿrapê na pre htĩr tũm nê ri pa ho pa hkêt nê. Na pre ri pa nê gaa nê rĩ hpigêt tÿx nê ty. Tã mÿr pê ri mê papa xwÿnhjaja na pu htem urãk nê tanhmã amnhĩ tomnuj to ho ri papa. Mÿrapê na pu htem ri papa nê gaa nê Atãw pyrã nê pahtyk pa. Tirtũm kot mê pahtã Atãw mã kapêr xã hkôt. 14-19 Jakamã na prem kormã Mojes kator xwÿj ri pika piitã hkôt ri pa nê gaa nê haxwÿja htyk pa. Mê kot amnhĩ tomnuj mÿrapê ty. Atãw pyrã nê Tirtũm kot mêmoxõ nê hkurê xwÿnhhta krêr kêt tã urãk nê tanhmã amnhĩ tomnuj to ho ri pa. Hãmri nê mÿrapê ty.

Na pre ã Atãwja mê pahpiitã mê pamã Tirtũm kapêr nhĩrõp ãm nê amnhĩ tomnuj o hkrax anê nê mêmoxõta krê. Jao te mê pahpiitã mê pahte urãk nê kumê hkur pyrãk o mê panhĩpêx. Mÿrapê nhũm htem arĩ pika piitã hkôt hapõj nê kormã hprĩre htã ra Atãw pyrã nê tanhmã amnhĩ tomnuj to ho ri pa. Jakamã nhũm Tirtũm Atãw kot tanhmã amnhĩ tomnuj to hã omunh xã hkôt mê pakukamã hamaxpêr o:

—Nã koja mê Atãw pyrã nê amnhĩ tomnuj o ri pa. Mÿrapê kot paj ma mê kot amnhĩ xã htÿx kamã hamak tũm xãta wÿr mê rênh pa. Anê.

Tã Jejus Kris mê Atãw wa harênhja kot axpên pyrãk jakamã na hte Atãw kanrêhã hkra nê htãmnhwÿjjaja Atãw kot amnhĩ nhĩpêx kôt amnhĩ nhĩpêx o ri pa rãhã nê. Urãk nê amnhĩ tomnuj rãhã ho ri pa. Nhũm axtem Jejus kôt mê kot amnhĩ xunhwÿr xwÿnhjaja Jejus kôt amnhĩ nhĩpêx rãhã ho ri pa. Te mê kêp hkanrêhã hkra nê htãmnhwÿjê pyrã nê urãk nê tãm amnhĩ nhĩpêx. Na htem ã ahpÿnhã amnhĩ nhĩpêx anhÿr o ri pa. Na pre Jejus mê pahte amnhĩ tomnuj pãnhã amnhĩrer par kaxyw mê panê ty. Jakamã mê pahte hkôt amnhĩ xunhwÿr xwÿnhjaja na hte Tirtũm ja hã mê pahpumunh kôt mê pahto hkra. Kot puj mê nhÿrmã pahtyk tã nhũm akupÿm mê pahto mê pahtĩr pu mê wa kuri pahtĩr tũm nê papa ho papa.

Atãw kot Tirtũm kapêr nhĩrõp ãm jakamã na hte Tirtũm mê pahpiitã mê pahte amnhĩ tomnuj xwÿnh ã mê pajarê. Nom nhũm Jejus Atãw rom kot Tirtũm kapêr mar nê hkôt amnhĩ nhĩpêx rãhã jakamã na hte Tirtũm mê pahte hkôt amnhĩ xunhwÿr xwÿnhjaja amnhĩm mê pahte amnhĩ to mex xwÿnh ã mê pajarê.

Nhũm Atãw kot Jejus kĩnhã Tirtũm kapêr nhĩrõp ãm mÿrapê na hte mÿr pê mê pa xwÿnhjaja ohtõ nê pa nê gaa nê Atãw pyrã nê htyk pa.

HãMRI nê kormã htír ri amnhĩ to mex o pa hkêt mÿrapê ma mẽ kot amnhĩ xà htÿx kamã hamak tũm xàta wÿr ma hapêx. Tã nhũm Tĩrtũmja mex o mex jakamã na hte JeJus Kris mẽ wa mẽ pakamã ukapřĩ nê. Jakamã na pre mẽ pahwÿr JeJus mẽ nhũm mẽ pahwÿr wrÿ hãMRI nê htyk o mẽ pahte amnhĩ tomnuj pãnhã amnhĩre. Nhũm Tĩrtũm ã kot amnhĩ nhĩpêx anhÿr kukwak ri mẽ pahte hkôt amnhĩ xunhwÿr xwÿnhjaja amarĩ tanhmã mẽ pahto mex to ho ri pa. Atãw kot amnhĩ tomnuj pix pumunh kôt na pre Tĩrtũm mẽ pahpiitã mẽ pahte amnhĩ tomnuj xwÿnh ã mẽ pajarê. Tã nhũm JeJus mẽ pakamã ukapřĩ nê mẽ panê ty nhũm Tĩrtũm ja hã omunh xà hkôt ra mẽ pahte amnhĩ kaxyw hkôt pajamaxpêr xwÿnhjaja te mẽ pahte aa tanhmã amnhĩ tomnuj to hkêt pyrãk o mẽ panhĩpêx. Na hte amarĩ ã mẽ panhĩpêx anê.

Nê Atãw kot amnhĩ tomnuj mÿrapê na htem piitã ri pa nê tanhmã amnhĩ to nê ty rÿ ri pa nê gaa nê wejre nê ty. No na pre JeJus Krisja aa kot amnhĩ tomnuj kêt kumrêx tã amarĩ mẽ panê ty. Jakamã nhũm Tĩrtũm ra kukwak ri mẽ pahte hkôt amnhĩ xunhwÿr xwÿnhjê kutã nojarêr rãhã nê mẽ pakukamã hamaxpêr o:

— Nã mẽ kot Ixkra hkôt amnhĩ xunhwÿr xwÿnhjaja na pa mẽ omunh pa. Tã kot paj Ixkrata kukwak ri tãm mẽ unhwÿ nhũm mẽ nhÿrmã wa ixri mex nê htír tũm nê pa ho pa. Anê.

20-21 Nê na pre Tĩrtũm tanhmã finat Mojes mã kapêr to. Mẽ piitã mẽ kot amnhĩ tomnuj o ri mẽ pa hã amnhĩ pumunh kaxyw. HãMRI nê mẽ kot kapêr mar nê hkôt amnhĩ nhĩpêx o pa kaxyw tanhmã mẽ kaxyw Mojes mã kapêr to. Nhũm kuma nê amnhĩ xô ri mẽ kãm hã kagã nê mẽ kãm harênh o ri mẽ hkôt pa. No nhũm prem kapêr ma nê ãm kuma nê hkwȳm pix mã ri tanhmã amnhĩ tomnuj to ho pa. Nê pika piitã hkôt ja arĩ rãhãã. Ja mÿrapê koja mẽ nhÿrmã ty nê ma mẽ kot amnhĩ xà htÿx kamã hamak tũm xàta wÿr ma pa. Nom Tĩrtũm arĩ kãm pika piitã hkôt mẽ papa xwÿnhjê japê nê. Mẽ pahte amnhĩ tomnuj o papa tã nhũm kãm mẽ pahto mex prãm nê. Jakamã na pre mẽ pahwÿr Kra JeJus Kris mẽ nhũm mẽ pahwÿr wrÿ. Mẽ panê htyk o kot mẽ pahte amnhĩ tomnuj pãnhã amnhĩrer kaxyw. Tã kukwak ri kot puj mẽ pahte amnhĩ kaxyw hkôt pajamaxpêr xwÿnhjaja nhÿrmã Tĩrtũm mẽ wa kuri pahťir tũm nê pa mex nê papa ho papa.

Mẽ kot mẽ pahkrã kumrãr ã mẽ harênh

Sikũn Korĩt 5.17; Karatas 2.19-20, 5.24, 6.14; Epes 4.17-24;

Korosê 3.1-11; Wam Pêtre 4.1-6

6 1 Nê mẽ pahte arĩ tũhã tanhmã amnhĩ tomnuj to htã nhũm Tĩrtũm arĩ kãm mẽ pajapê nê. Nê arĩ mẽ pakutã nojarêr rãhã nê. Jakamã xà kot kaj mẽ atõ ã harênh anhÿrja ma nê atÿx ri ã ajamaxpêr anê nê ajamaxpêr o:

—Nà Tirtũm kãm ijapê nê kot ixkutã nojarêt rãhã ho ri pa jakamã mo kaxyw kot pa Jesus kôt amnhĩ nhĩpêx o ri ixpa? Nà kot paj ho anhỹr kêt nê. Anê.

Ka ã mẽ atõ atỳx ri ajamaxpêr anhỹr japêr. Kwa xà ajamaxpêrja mex? Nà mex kêt. 2^ã ajamaxpêr anhỹrja mẽ hamaxpêr mex xà hkôt kêt. Ra mẽ pahte Jesus kôt amnhĩ xunhwỳr nê mẽ pahte amnhĩ tomnuj kaga jakamã nhũm mẽ pahte amnhĩ tomnujja te ra mẽ pahpê hapêx pyrãk. Jakamã kot puj mẽ arĩ tanhmã amnhĩ tomnuj to ho ri papa hkêt nê. 3^Mẽmo kaxyw na htem Tirtũm mã mẽ pahkrã kumrã? Nà mẽ pahte ra Jesus kôt amnhĩ xunhwỳr ã amnhĩ to amnhĩrĩt kaxyw. Te Jesus htyk nhũm mẽ pahte amnhĩ tomnujja haxwỳja hkôt htyk nê hapêx par pyrãk o amnhĩrĩt kaxyw. Jakamã na pu htem pajamaxpêr o:

—Nà kot paj axte tanhmã amnhĩ tomnuj to ho ri ixpa hkêt nê. Anê.

4^{Na} htem Tirtũm mã gôx kãm mẽ pahkrã kumrã nhũm mẽ pahte amnhĩ nhĩpêx tũnja te mẽ kot Jesus kôt haxwỳja haxàr pyrãk. Hãmri nhũm mẽ akupỳm mẽ pahto api. Te Tirtũm hihtỳx o hihtỳx o kot akupỳm Kra Jesus ho htĩr pyrãk. Te mẽ pahtyk tã nhũm akupỳm kot mẽ pahto mẽ pahĩr pyrãk. Pãnhã mẽ pahte amnhĩ nhĩpêx nyw o amnhĩ nhĩpêx kaxyw. 5^{Nhũm} mẽ pahte amnhĩ nhĩpêx tũnja te Jesus kôt htyk nê hapêx par pyrãk. Nê mẽ pahte amnhĩ nhĩpêx nywja te Jesus akupỳm htĩr pyrãk o amnhĩ nhĩpêx.

6^{Amnepê}m na pu pre htem amnhĩ tomnuj rãhã ho ri papa. Te mẽ kãm mẽ àpênh xwỳnhjaja kot mẽ õ patrãw mã àpênh rãhãta pyrãk. Tã nhũm Kris mẽ panê ty. Kot mẽ panê mẽ pahte amnhĩ tomnuj pãnhã amnhĩrer nê ho hapêx par kaxyw mẽ panê ty. Jakamã te mẽ pahte amnhĩ tomnuj mẽ pajamaxpêr punujja te pĩ kahpa hã Jesus kôt harir nê htyk nê hapêx par pyrãk. Pãnhã mẽ pahte amnhĩ nhĩpêx nyw pix o amnhĩ nhĩpêx kaxyw. Nê mẽ pajamaxpêr nyw pix o pajamaxpêr papa kaxyw. 7^{Na} hte mẽ htyk xwỳnhjaja axte tanhmã amnhĩ tomnuj to hkêt nê. Tã kêr pu mẽ urãk nê axte ã amnhĩ nhĩpêx anhỹr kêt nê. 8^{Na} pu prem Jesus kot mẽ panê htyk ã harênh ma nê pajamaxpêr o:

—Nà ra Jesus kot mẽ panê htyk jakamã kot paj ixte amnhĩ nhĩpêx tũm kaga hpa nê hpãnhã kot amnhĩ nhĩpêx kôt pix mã ri amnhĩ nhĩpêx o ri ixpa. Te ra ixtyk nê axte tanhmã ixte amnhĩ tomnuj to ho ri ixpa hkêt pyrãk. Jao amnhĩ nhĩpêx nyw pix o amnhĩ nhĩpêx o ri ixpa. Anê.

9^{Nê} Jesus htyk nhũm Tirtũm akupỳm ho htĩr jakamã koja axte htyk kêt nê. Ra mẽ pahte ja mar mex. 10^{Na} pre ãm htyk tipxi htã htykja o mẽ pahpiitã mẽ pahte amnhĩ tomnuj pãnhã amnhĩre. Tã ra akupỳm htĩr o htĩr nê kaxkwa kamã Tirtũm mã tanhmã amnhĩ nhĩpêx to ho ri pa. 11^{Tã} mẽ papajaja kot puj mẽ ã kot amnhĩ nhĩpêx anhỹrja ma nê ã pajamaxpêr anê nê pajamaxpêr o:

—Nà ãm hãmri. Te ixte Jejus pyrã nê ra ixtyk pyrãk jakamã kot paj axte amnhĩ tomnuj o ri ixpa hkêt nê. Te ixte Jejus pyrã nê akupým ixtĩr nê ãm Tĩrtũm kôt pix mã amnhĩ nhĩpêx o ri ixpata pyrãk o kot paj hpãnhã amnhĩ nhĩpêx o ri ixpa. Anê.

12Jakamã kot ka mẽ atõ nhỹrmã tanhmã amnhĩ kukamã ajamaxpêr punuj to japêr hãmri nê ajamaxpêr o:

—Nà inhmã ã amnhĩ tomnuj anhỹr prãm nê. Omnuj tã kot paj ho anê. Nà ixte ho anhỹr mã kênã.

Anhỹr o ajamaxpêr japêr tã kwa mẽ ã ajamaxpêr anhỹr kêt nê.

13Kêt Tĩrtũm mã mãn amnhĩ gõ nê hkôt amnhĩ nhĩpêx o ri apa. Hãmri nê amnhĩ krã kamã mẽmoj mex pix mã ajamaxpêr nê tãm akapêr. Nê mẽ kot amnhĩ to mex xwỳnhjê kôt pix mã mãn ri apa.

Na ka pre htem akapêr punuj nê.

Nê ajamaxpêr punuj nê.

Nê mẽ kot amnhĩ tomnuj o mẽ pa xwỳnhjê hkôt ri apa.

Nê kagôxỳhti japrô nê ho akôm o ri mẽ hkôt apa.

Tã ra hpãnhã Tĩrtũm mã amnhĩ gõ nê axte ã amnhĩ nhĩpêx anhỹr kêt nê.

14Amnepêm na pu prem tanhmã mẽ pahte amnhĩ nhĩpêx to ho papa hkukamã pajamaxpêr nê pajamaxpêr o:

—Nà kot paj Tĩrtũm kapêr kôt pix mã mãn ri amnhĩ nhĩpêx o ri ixpa nê amnhĩ to mex o ri ixpa nhũm Tĩrtũm ja hã ixpumu nê amnhĩm inhmex ã ijarê. Nà kot paj anê.

Anhỹr tã no ãm tee ri mẽ pamã hkôt amnhĩ nhĩpêx o ri papa hprãm kaprỹ nê arĩ ri kapêr kwým tanhmã amnhĩ nhĩpêx to ho ri papa. Tã ra hpãnhã axtem pajamaxpêr o:

—Nà Tĩrtũm kot ixkutã nojarêr rãhã ho pa xwỳnh. Tã ra ixte hkôt amnhĩ xãm jakamã koja tanhmã ixto pa hkôt amnhĩ nhĩpêx mex o ri ixpa. Nà koja ixto anê.

Anhỹr jakamã ra amnhĩ kaxyw kãm pajamaxpêr tỳx o mẽmoj punuj kutã amnhĩ to htỳx nê.

Mê pahte Tĩrtũm mã tanhmã amnhĩ nhĩpêx to hã mẽ pajarênh

Juãw 8.34

15Tã ã kot anhỹr jakamã tanhmã kot puj wem pajamaxpêr to? Xà kot pu mẽ ã pajamaxpêr anê nê pajamaxpêr o:

—Nà na hte Tĩrtũmja ixte kapêr kôt amnhĩ nhĩpêx o ixpa hã ixpumunh kôt amnhĩm inhmex ã ijarênh kêt nê. ãm kêp ixkutã nojarêr rãhã nê amarĩ amnhĩm inhmex ã ijarênh xwỳnh jakamã kot paj arĩ amnhĩ tomnuj rãhã nê aa ja kaga hkêt nê.

Anhỹr o kot puj mẽ pajamaxpêr? Nà kot puj mẽ ã pajamaxpêr anhỹr kêt nê. ã mẽ pajamaxpêr anhỹrja mex kêt. 16Koja mẽhõ nhỹri kot amnhĩ tomnuj tỳx xwỳnhjê hõ pumu nê kãm amnhĩ jarênh japêr nê kãm:

—E inhma. Kot paj ãm akôt pix mã tanhmã amnhĩ nhĩpêx to ho ri ixa. Jakamã e inhmã mẽmoj tã karõ pa ama nê amã tanhmã ho ho ri ixa.

Anhỹr o kãm kapêr japêr. Hãmri nê ã amnhĩ nhĩpêx anhỹr tã amnhĩ tomnuj pix o ri pa. Tã ã mẽ kot amnhĩ nhĩpêx anhỹr o mẽ pa xwỳnhjaja koja nhỹrmã ty hãmri mẽ kot amnhĩ xà htỳx kamã hamak tũm xàta wỳr ma hapêx.

No koja mẽhõ Tĩrtũm mã amnhĩ jarênh nê kãm:

—Pa Tĩrtũm. E kot paj ãm akapêr kôt pix mã ri amnhĩ nhĩpêx o ri ixa.

Anhỹr o kãm amnhĩ jarê nê hkôt amnhĩ nhĩpêx mex o pa. Nê tãm amnhĩ nhĩpêx o ri pa. Hãmri nê nhỹrmã ty nê ma õ krĩ hwỳr api nê Jejus mẽ Tĩrtũm wa kuri htĩr tũm nê mex rãhã nê pa ho pa.

17Tã mẽ kajaja na ka xep prem tee ri mẽ amã mẽ ate amnhĩ tomnuj mã anhũrer prãm tã nhũm te tãm kot amnhĩ tã mẽ ato htỳx pyrãk o mẽ anhĩpêx ka mẽ tee ri kãm anhũrer prãm kaprỳ. Tã nhũm Tĩrtũm tanhmã mẽ akrã hto ka mẽ kapêr ma nê amnhĩ kaxyw hkôt ajamaxpêr tỳx nê ãm hkôt pix mã amnhĩ nhĩpêx. Pa ja hã mẽ ajarênh ma nê mẽ anhỹ hã ixkĩnh nê. Nê Tĩrtũm mã ixte mẽ ajarênh mar nê mẽ anhỹ hã ixkĩnh ã amnhĩ jarê. 18Na pre Tĩrtũm tanhmã mẽ akrã hto ka mẽ amnhĩ tomnuj mã anhũrer pa nê hpãnhã hkôt pix mã amnhĩ nhĩpêx.

19E kot paj ixprĩ hã tanhmã mẽ amã ja jarênh to. Te ixte ixkrajê jahkre pyrãk o kot paj mẽ amã awjarê. Nà amnepêm na ka prem ajamaxpêr punuj kôt amnhĩ tomnuj o ri apa. Nê gaa nê ra amnhĩ tomnuj pix kukamã ajamaxpêr. Tã kêr ka mẽ arĩ ã amnhĩ nhĩpêx anhỹr kêt nê. Pãnhã tãm ri ajamaxpêr o ri apa. Jao gaa nê ra Tĩrtũm kãm hprãm xà hkôt tãm amnhĩ nhĩpêx mex nê. 20Na ka prem tee ri amã amnhĩ tomnuj mã anhũrer prãm kaprỳ. Te tãm kot amnhĩ tã mẽ ato htỳx nê amnhĩ kôt mẽ ato pa pyrãk o mẽ anhĩpêx. 21Xàn ka prem ã amnhĩ tomnuj anhỹr o apa nê akĩnh nê ajamakêtkati nê ri apa? Nà na ka prem akĩnh nê apa hkêt nê. Tã na ka prem Jejus kôt amnhĩ xunhwỳ nê tee ri ate tanhmã amnhĩ tomnuj to hã amnhĩ pumu nê akaprĩ nê apijaàm nê. ã mẽ kot amnhĩ tomnuj anhỹr o pa xwỳnhjaja na htem ja mỳrapê ty nê ma mẽ kot amnhĩ xà htỳx kamã hamak tũm xàta wỳr pa. 22No na pre ra Tĩrtũm tanhmã mẽ akrã hto ka mẽ amnhĩ tomnuj kaga hpa. Te Tĩrtũm tãm kot hpãnhã amnhĩ tã mẽ ato htỳx nê amnhĩ kôt mẽ ato pa pyrãk ka mẽ ra ãm hkôt pix mã amnhĩ nhĩpêx mex o ri apa. Nê hpãnhã amã kapêr kôt pix mã amnhĩ nhĩpêx mex prãm. Nê hkôt pix mã amnhĩ nhĩpêx hprãm. Jakamã kot kaj mẽ nhỹrmã kuri amex kumrêx nê atĩr tũm nê ri apa ho apa.

23Na hte mẽ kãm àpênh o ri mẽ pa xwỳnhjaja mẽ kãm mẽmoj tã apê nê àpênh pa nê hpãnhã amnhĩrer xà jamỳ. Ja pyrã nê koja mẽ kot amnhĩ

tomnuj xwÿnhjaja nhÿrmã ty hãmri nẽ ma mẽ kot amnhĩ xà htÿx kamã hamak tũm xàta wÿr ma pa.

No mẽ pahte amnhĩ kaxyw Jejus Kris kôt pajamaxpër xwÿnhjaja na hte Tirtũm ja hã mẽ pahpumu nẽ mẽ pajarẽnh o:

— Nà ãm hãmri. Jajaja koja nhÿrmã Ixkra mẽ wa Ixkuri mex kumrẽx nẽ htĩr tũm nẽ pa ho pa. Hêxta waa nẽ. Nà ãm hãmri koja mẽ anẽ. Anẽ.

Xà tãm mẽ pahte amnhĩ nhĩpêx ã mẽ pahpumunh kôt na hte ã mẽ pajarẽnh anẽ? Nà ãm mẽ pahte Kra Jejus Kris kôt amnhĩ xunhwÿr ã mẽ pahpumunh kôt pix mã na hte ã mẽ pajarẽnh anẽ.

**Mẽ pahte amnhĩ tomnuj kot axte amnhĩ tã mẽ pahto
htÿx kêt ã harẽnh**

Rômãn 8.2, 10.4; Karatas 4.1; Epes 2.2; Korosẽ 3.7

7 ¹E Jejus kôt ixkwÿjaja. Nà Tirtũm kot mẽ pakaxyw tanhmã Mojes mã kapër tota na ka mẽ ra mar tÿx nẽ. Na pu htem kormã pahtĩr ri hkôt amnhĩ nhĩpêx o ri papa. Tã ty hãmri nẽ axte hkôt amnhĩ nhĩpêx kêt nẽ. Ra mẽ ate ja mar tÿx. E pa mẽ amã ja hã ejêp jarẽ ka mẽ inhma. ²Nà finat Mojes kot Tirtũm nhÿ hã mênijaja kot tanhmã amnhĩ nhĩpêx to ho pa hã mẽ kãm karõja. Koja mẽhõ ho mjên hãmri nẽ ãm kôt pix mã ri pa ho pa nẽ aa hkaga hkêt nẽ. No koja nhÿrmã mjên kêp ty nhũm ahte ri pa. Hãmri nẽ kãm axte mẽhõ ho mjên prãm nẽ mãmrĩ axte mẽhõ ho mjên. Ja tanhmã kute hkêt. ³Nom koja wam mjên arĩ htĩr japêr nhũm hprõ tanhmã hamaxpër to nẽ hkaga nẽ hpãnhã nhãm mẽhõ ho mjên. Hã koja Tirtũm pê ja homnuj nẽ. Nom koja mjên ra kêp ty nhũm mÿrpê axte kãm mẽhõ ho mjên prãm nẽ mãmrĩ ho mjên. Ja na Tirtũm pê homnuj kêt. Ra wam mjênja htyk kênã. ã Tirtũm kot Mojes mã mẽ pakaxyw mẽmoj tã karõ kot anhÿr.

⁴Tã ja pyrã nẽ na pu prem amnepêm pajamaxpër o:

— Ixte Tirtũm kapër kôt pix mã amnhĩ nhĩpêx o ri ixpa jakamã nhũm Tirtũm ja hã ixpumu nẽ amnhĩm inhmex ã ijarẽ. Anẽ.

Tã pu mẽ ra tanhmã pajamaxpër to nẽ hpãnhã pajamaxpër õ ho pajamaxpër o:

— Nà na xep hte Tirtũm mẽ ixte kapër kôt amnhĩ nhĩpêx ã mẽ ixpumunh kôt amnhĩm mẽ inhmex xwÿnh ã mẽ ijarẽnh kêt nẽ. Mẽ ixte hkôt amnhĩ nhĩpêx mex o ri ixpare hã. Kêt ãm Kris kot mẽ inhnê htyk nhũm mẽ ixte amnhĩ kaxyw hkôt ijamaxpër nẽ hkôt amnhĩ xunhwÿr pix ã mẽ ixpumunh kôt na hte mẽ inhmex ã mẽ ijarẽ. ãm ja pix ã mẽ ixpumunh kôt na hte mẽ ixto hkra nẽ mẽ ixkutã nojarêt o pa. Kra Jejus pix kukwak ri na hte ã mẽ inhĩpêx anhÿr o pa. Anẽ.

ã mẽ pajamaxpër nyw kot anhÿr. Jakamã te mẽ pahte mẽhõ kot mjên nyw xwÿnh gryk ã axte mjên htyk xwÿnh mã hamaxpër kêeta pyrãk o na pu htem amnhĩ nhĩpêx o papa. Jao Kris kapër kôt pix mã amnhĩ

nhĩpêx o ri papa. Nê Tirtũm noo mã tãm ri amnhĩ nhĩpêx. Nê axte mẽ pahte amnhĩ tomnuj kukamã tanhmã pajamaxpêr to hkêr nê.

5Nê amnepê mã mẽ pahte amnhĩ krã hkôt tanhmã mẽ pahte amnhĩ nhĩpêx to ho ri papata ã na pu prem amnhĩ tomnuj pix o ri papa. Ra mẽ pahte Tirtũm kapêr mar tỳx tã kuma nê ãm kuma nê ri papa nê ri hkôt amnhĩ nhĩpêx kêt nê. Mỳrapê nhũm Tirtũm tee ri ja hã mẽ pahpumu nê mẽ pahtyk nê ma mẽ kot amnhĩ xà htỳx kamã hamak tũm xà hwỳr papa mã xwỳnhjê hã mẽ pajarê.

6Nê amnepêm na pu pre htem ã pajamaxpêr anhỳr o:

— Nà kot paj Tirtũm kapêr kôt pix mã amnhĩ nhĩpêx o ri ixpa nhũm amnhĩ tã ixpumu nê ixte amnhĩ tomnuj kêt xwỳnh ã ijarê.

Anhỳr o pajamaxpêr no ãm tee ri ã pajamaxpêr anhỳr kaprỳ. Nê arĩ tanhmã amnhĩ tomnuj to ho ri papa. Tã hpãnhã te Jejus Kris kôt pahtyk pyrak o amnhĩ nhĩpêx nê hpãnhã Karõ nhỹ hã tãm amnhĩ nhĩpêx. Jao ra tee ri mẽ pamã Tirtũm kapêr kôt amnhĩ nhĩpêx prãm kaprỳ hkêr nê. Ra Tirtũm Karõ nhỹ hã amnhĩ nhĩpêx nyw o amnhĩ nhĩpêx mex o ri papa.

Tirtũm kapêr ã kagà htũm kot tanhmã mẽ pajarênh to

Rômãn 3.20, 5.20; Karatas 3.23-24

7Tã Tirtũm mẽ pahte kapêr kôt ri amnhĩ nhĩpêx ã mẽ pahpumunh kôt amnhĩm mẽ pamex ã mẽ pajarênh kêt jakamã mẽmo kaxyw na kapêr ã kagà htũmja? Nà mẽ pahte mar nê pahprĩ hã Tirtũm noo mã mẽ kot amnhĩ tomnuj xà jarênh mar nê omunh mex kaxyw na. Na hte mẽ pahkwỳjê kukrêx kĩnh o pamã ho panhõ hprãm nê mẽ pamã karõ. Æ kot mẽmoj punuj piitã nê mẽ pamã karõ kot anhỳr. Tã mẽ pahte ja mar kêt ronhỳx pu mẽ Tirtũm kêp ja homnuj ã harênh mar kêt nê. 8Tã ra mẽ pahte harênh mar nê kêp ja homnuj ã harênh ma. Mẽ pamã axpên kukrêx kĩnh o ho pamã panhõ hprãmja mããnên kêp ja homnuj ã harênh mar tã nom aa hkaga hkêr nê arĩ pamã axpên kukrêx kĩnh o pamã ho panhõ hprãm tỳx rãhã ho ri papa. Kop ãm Tirtũm kapêr kêt ronhỳx pu mẽ kot amnhĩ tomnuj xàja aa mar kêt kumrêx nhũm te mẽ pamã amrakati pyrak. 9Amnepê mã ixte Tirtũm kapêr mar kêt ri na pa pre ixtỳx ri amnhĩ kukamã ijamaxpêr o ri ixpa nê ijamaxpêr o:

— E kot paj nhỹrmã Tirtũm ri ixtĩr tũm nê inhmex nê ixpa ho ixpa.

Anhỳr tã hpãnhã pamã axpên kukrêx kĩnh o ho pamã panhõ hprãm nê kapêrta ma nê ja hã amnhĩ pumunh kurê kumrêx. Hãmri nê tee ri amnhĩ kukamã ijamaxpêr nê ijamaxpêr o:

— Hêxta waa nê. Nà ã ixte amnhĩ nhĩpêx anhỳr o ixpa jakamã kot paj nhỹrmã ty nhũm Tirtũm akupỳm ixto ixtĩr pa kuri ixtĩr tũm nê ixpa ho ixpa hkêr nê. Hêxta waa nê. Ixte amnhĩ tomnuj xwỳnh na pa. Kot paj nhỹrmã ty nhũm Tirtũm ma mẽ kot amnhĩ xà htỳx kamã hamak tũm xàta wỳr amnhĩ nê inhmê. Anê.

Hãmri nê ixkaprĩ nê tee ri amnhĩ kukamã ijamaxpêr o ri ixpa. ¹⁰Tã hpãnhã axtem ijamaxpêr o:

— Nà kot paj Tĩrtũm kapêr kôt pix mã mãn ri amnhĩ nhĩpêx o ri ixpa hãmri nê nhỹrmã ixtyk tã hwỳr api nê kuri ixtĩr tũm nê inhmex nê ixpa ho ixpa. Nà kot paj anê.

Anhỹr ã ijamaxpêr tã no ãm tee ri inhmã hkôt amnhĩ nhĩpêx o ixpa hprãm kaprỳ. Na pa pre xatã kapêr nhĩrôp ixkuhê nê tee ri ja hã amnhĩ pumu nê ijamaxpêr o:

— Kwa tanhmã kot pa amnhĩ nhĩpêx to nê ãm Tĩrtũm kôt pix mã ri amnhĩ nhĩpêx? Na pa hte tee ri inhmã ã amnhĩ nhĩpêx anhỹr prãm tỳx kaprỳ. ãm ixte amnhĩ tomnuj pix o ri ixpa xwỳnh jakamã ãm hãmri koja amnhĩ nê kuwyta wỳr inhmê. Nà koja ixto anê. Hêxta waa nê. Tanhmã kot paj we ja nê kãm ixkapêr to? Anê.

¹¹No mêhõ koja Tĩrtũm kapêr kôt amnhĩ nhĩpêx mex o ri pa? Na pu htem pahpiitã tee ri pamã ho anhỹr prãm kaprỳ. Mê pahpê hihtỳx kumrêx jakamã na pa pre ixtỳx ixte Tĩrtũm kuri ixtĩr tũm nê ri ixpa hã amnhĩ kukamã amnhĩ jarênh kaprỳ. ãm xatã kapêr nhĩrôp ixkuhê nê amnhĩ tomnuj pix o ri ixpaja mỳrapê koja mê kot amnhĩ xã htỳx kamã hamak tũm xàta wỳr amnhĩ nê inhmê. ¹²Kot anhỹr tã tanhmã kot puj mê Tĩrtũm kapêr ã kagã htũmta jarênh to? Nà kot mê pamã mê pahte amnhĩ nhĩpêx ã karõta mex kumrêx. Mex o mex. ¹³Mex kumrêx tã na htem kuma nê tee ri kãm hkôt amnhĩ nhĩpêx hprãm kaprỳ. Jao nhỹrmã ty nê ma kuwy hwỳr pa. Kêt pa na pa pre ra mar nê omunh mex tã hkôt amnhĩ nhĩpêx mex kêt nê. Jao ra ixte amnhĩ tomnuj xwỳnh ã amnhĩ pumu. Na pa pre tee ri inhmã hkôt amnhĩ nhĩpêx o ri ixpa hprãm tã no ãm xatã kapêr nhĩrôp ixkuhê nê hkwỳm ri amnhĩ nhĩpêx rãhã ho ri ixpa. Tã ra tee ri ja hã amnhĩ pumu nê amnhĩ kukamã ijamaxpêr o:

— Nà na pa hte ãm tee ri inhmã Tĩrtũm kôt amnhĩ nhĩpêx prãm kaprỳ no ãm ho anhỹr kêt nê. ãm ixte amnhĩ tomnuj pix o ixpa xwỳnh na pa. Ja mỳrapê koja Tĩrtũm amnhĩ nê ma kuwy hwỳr inhmê. Nà koja ixto anê. Anê.

**Mê pahte mê pamã amnhĩ tomnuj kaga hprãm
kaprỳ hã mê pajarênh**

Karatas 5.17

¹⁴Nê Tĩrtũm kapêr ã kagã htũmta Tĩrtũm kapêr na. Nê Tĩrtũm kĩnhã ãm inhĩ pix na pa ri ixpa jakamã tanhmã kot pa amnhĩ to nê kapêr kôt ri amnhĩ nhĩpêx mex o ri ixpa? ¹⁵Inhmã tãm ixte amnhĩ nhĩpêx prãm tã no ãm amnhĩ tomnuj pix o ri ixpa. Mêmioj ixpê omnuj tã pa hte ra hkôt tanhmã amnhĩ tomnuj to ho ri ixpa. Hãmri nê ja hã amnhĩ pumu nê tee ri amnhĩ kukamã ijamaxpêr o:

—Hêxta waa nê. Mon pa hte axtem nê ã amnhĩ nhĩpêx anhÿr o ri ixpa? Mëmoj ixpê omnuj nhũm inhmã ho anhÿr prãm kêt tâ ra ho anê. Nhũm mëmoj mex nhũm inhmã ho anhÿr prãm tâ ho anhÿr kêt nê. Mon pa hte axtem nê ã amnhĩ nhĩpêx anhÿr o ri ixpa? Anê.

16Ã ixte amnhĩ nhĩpêx anhÿr o ri ixpa htã ra Tĩrtũm kapêr mexta ma hãmri nê ra ijamaxpêr o:

—Nà Tĩrtũm kapêrja mex kumrêx tâ pa tee ri inhmã hkôt amnhĩ nhĩpêx mex hprãm kaprÿ ho ri ixpa. Hêxta waa nê. Anê.

17Inhmã amnhĩ tomnuj prãm kêt tâ arĩ ixkaxwÿnh kãm ijamaxpêr punuj nhÿ hã ã amnhĩ nhĩpêx anhÿr o ri ixpa. 18Nê inhmã tãm amnhĩ nhĩpêx prãm tâ no ãm tee ri ã inhmã amnhĩ nhĩpêx anhÿr prãm kaprÿ. Tanhmã kot pa amnhĩ to nê tãm amnhĩ nhĩpêx o ri ixpa? Na pa tee ri inhmã ja ho anhÿr prãm kaprÿ. Ixte amnhĩ tomnuj xwÿnh na pa. Nê aa ixte amnhĩ to mex kêt kumrêx xwÿnh. 19Inhmã mëmoj mex kôt pix mã amnhĩ nhĩpêx prãm tâ no ãm ã amnhĩ nhĩpêx anhÿr kêt nê. Nê ãm hkwỹm ri tanhmã amnhĩ tomnuj to ho ri ixpa. Mëmoj ixpê omnuj tâ pa hkôt amnhĩ nhĩpêx o ri ixpa. 20Ixte Tĩrtũm kapêr kôt amnhĩ nhĩpêx kêt jakamã na pa hte ã amnhĩ tomnuj anhÿr o ri ixpa. Mëmoj ixpê omnuj pa inhmã ho anhÿr prãm kêt tâ ra hkôt amnhĩ nhĩpêx. Ixte Tĩrtũm kapêr kôt amnhĩ nhĩpêx kêt jakamã ã amnhĩ nhĩpêx anhÿr o ri ixpa. 21Nê mëmoj mex nhũm inhmã hkôt amnhĩ nhĩpêx prãm tâ ra hkwỹm ri amnhĩ nhĩpêx. ã ixte amnhĩ nhĩpêx anhÿr xwÿnh na pa. 22Nê inhmã Tĩrtũm kapêr mar nê hkôt ri amnhĩ nhĩpêx prãm tâ 23nom ixte amnhĩ tomnuj xwÿnh jakamã hkôt amnhĩ nhĩpêx kêt nê. Na pa tee ri ja hã amnhĩ pumu nê amnhĩ kukamã ijamaxpêr o:

—Nà kot paj axte amnhĩ tomnuj kêt nê. Kot paj ãm amnhĩ to mex pix kukamã ijamaxpêr o ri ixpa.

Anhÿr tâ no ãm arĩ amnhĩ tomnuj o ri ixpa nê amnhĩ to mex kêt. Ixte amnhĩ tomnuj xwÿnh jakamã na pa hte ã amnhĩ nhĩpêx anhÿr rãhã ho ri ixpa nê tee ri inhmã amnhĩ tomnuj kaga hprãm kaprÿ. 24Hêxta waa nê. Na pa ixkaprĩ htÿx nê ri ixpa. ã ixte amnhĩ nhĩpêx anhÿr o ri ixpaja mÿrapê kot paj nhÿrmã ty nê ma mẽ kot amnhĩ xà htÿx kamã hamak tũm xàta wÿr ma mō. Mêhō kot tanhmã ixkrã hto pa ã amnhĩ nhĩpêx anhÿrja kaga? 25Nà mẽ panhō Pahihti Jejus Krisja pix. Tãm koja ixte amnhĩ tomnuj kutã tanhmã ixto ixihtÿx to. Jakamã na pa axte tee ri amnhĩ kukamã ijamaxpêr kêt nê. Pãnhã ixkĩnh nê ri ixpa nê Tĩrtũm mã kãm:

—Pa Tĩrtũm. Nà ãm hãmri amex o amex. Anê.

Tã ra ixte Jejus Kris kôt amnhĩ xãm jakamã koja tãm tanhmã ixto ixihtÿx to pa rĩ kormã Tĩrtũm kapêr kôt amnhĩ nhĩpêx mex o ri ixpa. No kot pa pam amnhĩ krã hkôt amnhĩ tomnuj rãhã ho ri ixpa. ã ixte anhÿr xwÿnh na pa.

Tĩrtũm Karõ kot mẽ pahto tãm mẽ pahte amnhĩ nhĩpêx xwỳnh ã harénh
Karatas 5.16-26

8 ¹Nê Jejus Kris kêp mẽmoj punuj kutã mẽ pahto mẽ paxihtỳx xwỳnh jakamã mẽ pahte hkôt amnhĩ xunhwỳr xwỳnhjaja na pu htem ỹ hã amnhĩ tomnuj o ri papa hkêt nê. Jao mẽ pahte kuwy hwỳr papa mã xwỳnh kêt. ²Te ra mẽ pahtyk nhũm Tĩrtũm kot akupỹm mẽ pahto mẽ pahtĩr pyræk jakamã nhũm Karõja mẽ pahkarõ mã agjê pu mẽ ỹ hã tãm amnhĩ nhĩpêx o ri papa. Te tãm kot amnhĩ nhĩpêx pyræk o amnhĩ nhĩpêx nhũm Karõ mẽmoj punuj piitã kutã mẽ pahto mẽ paxihtỳx. Kêp mẽ pajamxpêr punuj kutã mẽ pahto mẽ paxihtỳx xwỳnh jakamã kot puj mẽ nhỹrmã mẽ kot amnhĩ xà htỳx kamã hamak tũm xàta wỳr papa hkêt nê.

³Nom kormã mẽ pahte Jejus kôt amnhĩ xunhwỳr kêt ri na pu prem tee ri pamã Tĩrtũm kapêr piitã hkôt amnhĩ nhĩpêx prãm kaprỳ nhũm mẽ pahpê hihtỳx kumrêx. Jakamã tanhmã koja Tĩrtũm amnhĩ to nê amnhĩ mã mẽ pamex xwỳnh ã mẽ pajarê? Na pre tee ri amnhĩ tã mẽ pajamã hãmri nê mẽ pahwỳr Kraja mẽ nhũm man mẽ pahwỳr wrỳ nê mẽ pahpyrà nê ĩ ho mẽ pakamã kato. Nom mẽ parom aa tanhmã amnhĩ tomnuj to hkêt kumrêx nê ri pa. Tã mẽ kot hpĩr tã nhũm amarĩ htyk kêt nê. Na pre htyk o mẽ pahte amnhĩ tomnuj piitã hpãnhã amnhĩrer pa. Jakamã tãm kêp mẽ pajamxpêr punuj kutã mẽ pahto paxihtỳx xwỳnh. Na pu htem hkôt amnhĩ xunhwỳ hãmri nê kukwak ri amnhĩ tomnuj o ri papa hkêt nê. ⁴Pãnhã Tĩrtũm kot amnhĩ nhĩpêx kôt amnhĩ nhĩpêx o ri papa nê axte mẽ pahte amnhĩ nhĩpêx tũm kôt amnhĩ nhĩpêx kêt nê. Hãmri hpãnhã Tĩrtũm Karõ kot amnhĩ nhĩpêx kôt pix mã amnhĩ nhĩpêx. Nê hamaxpêr kôt pix mã pajamxpêr. Ja kaxyw na pre Tĩrtũm mẽ pahwỳr Kraja mẽ nhũm wrỳ nê mẽ pahpiitã mẽ panê ty.

⁵Nê mẽ kot amnhĩ krã hkôt tanhmã amnhĩ nhĩpêx to ho ri mẽ pa xwỳnhjaja na htem htỳx ri tanhmã hamaxpêr to xà hkôt amnhĩ nhĩpêx o ri pa. No kêt Tĩrtũm Karõ kot mẽ pahkarõ mã gjêx xwỳnhjaja na pu htem mẽ kurom te Jejus jamaxpêr pyræk o pajamxpêr o papa.

⁶Nê mẽ kot amnhĩ krã hkôt amnhĩ nhĩpêx xwỳnhjaja koja mẽ nhỹrmã ty nê ma kuwy hwỳr pa nê kamã pa ho pa. No mẽ pahte Tĩrtũm Karõ hkôt amnhĩ nhĩpêx xwỳnhjaja kot puj mẽ pajamxpêr nyw o pajamxpêr nê amnhĩ nhĩpêx nyw o amnhĩ nhĩpêx. Jao paxãmnhĩx ri pajamakêtkati nê ri papa. Nê nhỹrmã ty hãmri nê Tĩrtũm mẽ Jejus wa kuri akupỹm pahtĩr tũm nê pamex kumrêx nê papa ho papa.

⁷Nê mẽ kot amnhĩ krã hkôt ri amnhĩ nhĩpêx xwỳnhjaja kãm Tĩrtũm kĩnh kêt. Nê kãm kapêr mar prãm kêt jakamã tanhmã kot mẽ amnhĩ to nê hkôt amnhĩ nhĩpêx? ⁸Koja mēhõ amnhĩ krã hkôt kãm hprãm xà hkôt pix mã amnhĩ nhĩpêx hãmri nhũm Tĩrtũm tee ri ja hã omu nê hkĩnh kêt

nẽ. 9No mẽ papajaja na pu htem mẽ uràk nẽ ã amnhĩ nhĩpêx anhÿr kêt nẽ. Ra Tĩrtũm Karõ kot mẽ pahkarõ mã gjêx jakamã na pu htem hkõt pix mã amnhĩ nhĩpêx hprãm. No koja Tĩrtũm Karõ mẽhõ kaxwÿnh mã àr kêt nẽ nhũm kêp hkra hkêt nẽ.

10-11Tã mẽ papajaja. Mẽ pahte amnhĩ tomnuj mÿrapê koja mẽ pakràhkàja nhÿrmã ty. No nhũm Tĩrtũm ra kot amnhĩm mẽ pahte amnhĩ to mex xwÿnh ã mẽ pajarênh nhũm Kris Karõ kot mẽ pahkarõ mã gjêx jakamã koja mẽ pahkarõja htyk kêt nẽ. Mẽ pakràhkà pix koja ty nhũm mẽ pahkarõja ma kaxkwa hwÿr àpir kurê kumrêx. Tã nhũm nhÿrmã Tĩrtũm akupÿm mẽ pakràhkà ho htĩr nẽ akupÿm mẽ pahkarõja mẽ pakràhkàm hagiê pu mẽ wa kuri pahĩr tũm nẽ papa ho papa. 12Jakamã e kwa ixkwÿjaja. Kêr pu mẽ axte ri mẽ pajamaxpêr tũm kõt amnhĩ nhĩpêx o ri papa hkêt nẽ. 13Kot puj mẽ arĩ ã amnhĩ nhĩpêx anhÿr o ri papa hãmri nẽ nhÿrmã ty nẽ ma mẽ kot amnhĩ xà htÿx kamã hamak tũm xàta wÿr papa. Jakamã kêr pu mẽ mẽmo arĩgro hã pamã tanhmã amnhĩ tomnuj to hprãm hãmri nẽ amnhĩ kukamã pajamaxpêr o:

— Nà inhmã ã amnhĩ nhĩpêx anhÿr prãm tã kot paj Tĩrtũm Karõ nhÿ hã ja kutã amnhĩ to htÿx nẽ ho anhÿr kêt nẽ. Anẽ.

Kot puj mẽ ã pajamaxpêr anẽ hãmri nẽ nhÿrmã kuwy wÿr papa hkêt nẽ. Pãnhã Tĩrtũm mẽ Jejus wa kuri pamex nẽ pahĩr tũm nẽ ri papa ho papa. 14Mẽ kot Tĩrtũm Karõ hkõt amnhĩ nhĩpêx xwÿnhjaja kêp Tĩrtũm kraa.

15Nom amnepêem kormã mẽ pahte hkõt amnhĩ xunhwÿr kêt ri. Nẽ kormã mẽ pamã kapêr mar prãm kêt ri nhũm kot amnhĩ tã mẽ pahpumunh nẽ tanhmã mẽ pahto pumaj na pu prem pamã uma ho ri papa. Tã hkõt amnhĩ xunhwÿ nhũm Karõja mẽ pahkarõ mã gjêx jakamã na pu htem ra pamã uma hkêt nẽ ri papa. Karõ kot mẽ pahpê Tĩrtũm kra hã mẽ pajarênh jakamã pu mẽ amnhĩ kamã kot tanhmã mẽ panhĩpêx to puma hkêt nẽ ri papa. Nẽ paxàmnhĩx pajamakêtkati nẽ kãm amnhĩ jarê nẽ kãm amnhĩ jarênh o:

— Pa Inhĩpêêxà maati? Ot pa ixpê akra hã amã amnhĩ jarênh kaxyw amnhĩ kaxyw amã ijamaxpêr. Anẽ.

Jao ra mẽ pamã uma hkêt nẽ ri papa. 16Karõ kot mẽ pahkarõ mã gjêx nhũm mẽ pahte amnhĩ tã omunh jakamã na pu htem pajamaxpêr o:

— Nà Tĩrtũm Karõ kot ixkarõ mã àr jakamã ixpê hkra na pa. Anẽ.

Nhÿrmã mẽmoj piitã akupÿm mex par ã harênh

Sikũn Korõt 4.16-18; Korosê 3.4; Wam Pêtre 4.13

17Nẽ mẽ kãm Tĩrtũm prãm kêt xwÿnhjaja na htem te mẽ kot Tĩrtũm Kra Jejus nhĩpêx pyræk o mẽ panhĩpêx pu mẽ pahpunuj nẽ ri papa. Nom kot puj mẽ nhÿrmã Tĩrtũm mex o mex xwÿnhja kuri pamex kumrêx nẽ papa. Mẽ pahpê hkra jakamã kot puj mẽ Kra Jejus pyrã nẽ õ krĩ kamã

kuri pamex kumrêx nê ri papa ho papa. 18Jar Jejus ã mē pahpunuj nê ri papa htã kot puj mē nhÿrmã kuri pamex kumrêx nê papa ho papa. Hãmri nê mē pamex o pamex ã amnhĩ pumu nê jar pika ja kamã tanhmã mē pahpunuj toja mã axte pajamexpêr kêt kumrêx.

19Nê pika hkôt Tirtũm kot mēmoj ho kator xwÿnhjaja na htem Tirtũm kot mē pahto mex par jatur xãm mēnh ã arĩgro jamãr rãhã ho pa. Àk nê mry nê pĩ nê gô nê mēmoj piitã mē pajamãr o pa. Te kot mē pakukamã hamaxpêr o:

—Kwa mēmo arĩgro hã koja Tirtũm hkrajê piitã ho amnhĩrĩt nê mē ho mex par jatur xãm kumê pu mē ja hã mē omu? Hêxta waa nê. Inhmã tokyx ja hã mē omunh prãm tÿx. Koja tokyx ã mē hipêx anê pa ixkĩnh tÿx kumrêx.

Anhÿr o hamaxpêr pyrãk. 20Mēmo kaxyw na hte mryja ã mē pakukamã hamaxpêr anê? Nà amnepê mã Tirtũm kot mēmoj piitã ho katorta ã nhũm pre piitã mex o mex. Pĩ nê mry nê gô. Mēmoj piitã mex kumrêx rãhã nê. Aa grã nê htyk kêt kumrêx. Tã Atãw kot amnhĩ tomnuj mÿrapê nhũm ra ÿ hã mēmoj piitã homnu par jakamã na hte mēmoj htĩr nê pa nê gaa nê ty nê hapêx. Nê mē pahpur kãm ahkagrôt punuj hapôj. Atãw kot amnhĩ tomnuj mÿrapê nhũm Tirtũm kapêr xà hkôt ã mēmoj omnu hpar anê. 21Nom koja arĩ rãhã ho rãhã hkêt nê. Koja nhÿrmã Tirtũm akupÿm mēmoj piitã ho mex pa nhũm mex o mex nê axte grã rÿ axte htyk nê hapêx kêt nê. Nê axte omnu nê hikwÿ hkêt nê. Koja mē pahpyrà nê mex o mex. Jakamã na htem Tirtũm kot mē pahto mex par jatur xãm mēnh xà hã arĩgro jamãr rãhã ho pa. 22Te mēhõ ni hpijagri kaxyw õhy xà htÿx nê tokyx kãm hpijagri hprãm xaj àmra ho nør pyrãk o amnhĩ nhĩpêx pê mē pahto mex jatur xãm mēnh ã arĩgrota jamãr o pa.

23Nê mē papajaja na pu htem tanhmã pahpunuj to nê jajê pyrã nê te amnhĩ kamnhêr o ri papa pyrãk. Rÿ tanhmã paxà kute nê ri papa. Rÿ pamã prãm nê paxàa nê ri papa. Nê tanhmã mē pahpunuj to nê ri papa. Jao te pĩ nê gô nê mryja pyrã nê amnhĩ tã Tirtũm kot mē pahto mex par jatur xãm mēnh ã arĩgro jamãr rãhã ho ri papa.

Na pre Tirtũm mē pahwÿr Karõ rê nhũm mē pahkarõ mã agjê nê mē pakukamã Tirtũm tanhmã kot mē pahto mex to hã mē pamã ho amnhĩrĩt nê mē pamã ho amnhĩrĩt o:

—Koja nhÿrmã Tirtũm mē ato mex par jatur xãm kumê nê mē piitã mē kãm mē apê hkra hã mē ato amnhĩrĩt. Hãmri nê mē amã mē anhĩ nyw gõ ka mē axte axà nê ri apa nê atyk kêt nê. Hãmri nê Tirtũm ri amex kumrêx nê ri apa ho apa. Nà kot kaj mē nhÿrmã ã amnhĩ nhĩpêx anê. Anê.

Ã Tirtũm Karõ kot mē pakukamã mē pajarênh anhÿr jakamã na pu htem amnhĩ tã kot mē pahto mex jatur xãm mēnh pix jamãr o ri papa. 24Nom na kormã ã mē pahto mex anhÿr kêt nê. Kormã mē pamã mē

panhĩ nyw nhõr kêt nẽ. Nom ra kot mẽ pahto hkra jakamã pu mẽ ja hã amnhĩ pumu nẽ pajamxpêr o:

—Nà ra Tĩrtũm kot ixto hkra jakamã koja nhỹrmã mãänën inhmã inhĩ nyw gõ. Nà koja inhmã kugõ.

25Anhỹr o pajamxpêr tã kormã. Na pu htem kormã amnhĩ tã hamãr rãhã ho ri papa nẽ aa hkaga hkêt nẽ papa.

Mẽ pahte Tĩrtũm Karõ nhỹ hã Tĩrtũm mã amnhĩ jarênh

26Nẽ na pu htem Tĩrtũm mã amnhĩ jarênh kaxyw nhũm hte Karõja mẽ pahto ajuta pu mẽ ỹ hã pakatàt kôt kãm tanhmã amnhĩ jarênh to. No kot puj mẽ amnhĩ krã hkôt kãm amnhĩ jarênh mex kêt nẽ. Na pu htem ja kaxyw tee ri amnhĩ kukamã pajamxpêr o:

—Kwa tanhmã kot pa Tĩrtũm mã amnhĩ jarênh to? Tanhmã kot pa mẽmoj tã ixàhwỳr to rỳ amnhĩ to hwỳr to? Nà kot paj amnhĩ krã hkôt ja ho anhỹr mex kêt nẽ. Hêxta waa nẽ. Anẽ.

No nhũm Tĩrtũm Karõ ra kot mẽ pahkarõ mã gjêx jakamã na hte tanhmã mẽ pahkrã hto pu mẽ ỹ hã kãm amnhĩ jarênh mex nẽ pakatàt kôt mẽmoj tã kuwỳ. Te Karõja tanhmã mẽ pakute hã mẽ pahpumunh nẽ mẽ pakamã ukapri xàj tãm mẽ pahto hwỳr pyrãk.

27Jakamã pu mẽ ỹ hã tanhmã Tĩrtũm mã amnhĩ jarênh to nhũm mẽ pamar kurê kumrêx. Ra kot mẽ pajamxpêr kôt mẽ pahpumunh par kênã. Nhũm ra Karõ kot mẽ pahkarõ mã gjêx jakamã na pu htem kãm hprãm xà hkôt kãm amnhĩ jarẽ nẽ tanhmã amnhĩ to paxàhwỳr to.

Tĩrtũm kot mẽ pamã mẽmoj piitã ho mex ã harênh

Rômãn 8.37; Piripos 1.12; Wam Pêtre 5.10

28Nẽ mẽ pamã Tĩrtũm kĩnh xwỳnhjaja. Tĩrtũm kot mẽ pahto hkra xwỳnhjaja. Koja mẽmoj mẽ pakamã tanhmã amnhĩ to htã kêt pu mẽ ãm ja hã amnhĩ pumu nẽ tee ri amnhĩ kukamã pajamxpêr kêt nẽ. Koja te mẽ pahpê omnuj pyrãk tã koja nhỹrmã hpãnhã mẽ pamã mex nẽ. Koja Tĩrtũm nhỹrmã tanhmã mẽ pamã mẽmojta o mex to. 29Amnepê mã mẽmoj piitã hkêt ri na pre Tĩrtũm mẽ pakukamã tanhmã mẽ pajarênh to nẽ mẽ pajarênh o:

—E kot paj nhỹrmã mẽ kot Ixkra Jejus kôt amnhĩ xunhwỳr xwỳnhjê ho ixkra jakamã nhũm mẽ Jejus pyrã nẽ kêp ixkraa. Nẽ uràk nẽ ixkapêr kôt amnhĩ nhĩpêx o pa. Jao pa ra ixkra xohtô nẽ. Nà ja na inhmã hprãm. Anẽ.

30Tã pu htem pajapôj nẽ ri papa. Hãmri nẽ kapêr ma nẽ amnhĩ kaxyw Kra Jejus kôt pajamxpêr nẽ hkôt amnhĩ xunhwỳ. Hãmri nhũm Tĩrtũm ja hã mẽ pahpumu nẽ pahto hkra nẽ amnhĩm mẽ pamex xwỳnh ã mẽ pajarê nẽ mẽ pahto mex nẽ. Nẽ te ho Kra Jejus nhĩpêx pyrãk o mẽ

panhîpêx. Jao nhÿrmã wa kuri mẽ pahtîr tûm nê papa ho papa mã xwÿnh ã mẽ pajarê.

Mêhõ kot Tirtûm pê aa mẽ papytâr kêt ã harênh

Römãn 5.1

31Tã ã Tirtûm kãm mẽ pajapê nê mẽ pahto mex kot anhÿr. ã kot mẽ panhîpêx mex anhÿr jakamã ra mẽ pahkôt pa ho pa rãhãã. Jakamã mêhõ koja ïhkra pê mẽ pahpytà? Nê mêhõ koja tanhmã ri kêp mẽ pahto? Nã koja kêp mẽ papytâr rÿ tanhmã kêp mẽ pahto hkêt nê. 32Tirtûm kãm Kra Jesus japê htÿx tã na pre mẽ pahpê nê hkêt nê mẽ pahwÿr kumê. Te kot mẽ pamã ôr pyrãk o hipêx nhûm mẽ pahwÿr wrÿ nê mẽ panê ty. Tã ra Tirtûm kot mẽ pamã ôr jakamã koja mãânên kãm mẽ pahte Kra hkôt amnhî xunhwÿr xwÿnhjê japê nê mẽ pahto mex rãhã ho ri pa. Nã koja ã mẽ pahto mex anê.

33Jakamã mêhõ koja kãm mẽ pahte amnhî tomnuj xwÿnh ã mẽ pajarê? Ra tãm kot mẽ pahto hkra nê mẽ pahte amnhî to mex xwÿnh ã mẽ pajarênh kênã kot kêt mêhõ kãm tanhmã mẽ pahto kapêr punuj to nhûm mẽ kuma. Koja mẽ tee ri kãm tanhmã mẽ pahto kapêr to kaprÿ. 34Na pre ra Jesus Kris mẽ pahte amnhî tomnuj pãnhã amnhîrer kaxyw mẽ panê ty nhûm Tirtûm akupÿm ho htîr. Hãmri nhûm ma akupÿm kaxkwa hwÿr api nê Pahi Maati krî xà kamã Tirtûm nhîhkô hã hkrî ho hkrî. Nê Tirtûm mã mẽ pakutã nojarêr rãhã ho kuri hkrî ho hkrî. Jakamã mêhõ koja kêp mẽ kot amnhî xà htÿx kamã hamak tûm xàta wÿr mẽ pajano? Nã amrakati kumrêx.

35Nê Krisja kaxkwa kamã Tirtûm nhîhkô hã hkrî ho hkrî htã mãânên jar mẽ pahkôt pa ho pa. Kãm mẽ pajapê htÿx jakamã kot puj mẽ tanhmã pahpunuj to htã nhûm arî kãm mẽ pajapê nê mẽ pahkôt pa ho pa.

Rÿ nhûm mẽ kot hkôt amnhî xunhwÿr kêt xwÿnhjaja tanhmã hã mẽ pahto htã nhûm arî kãm mẽ pajapê kamã mẽ pahkôt pa ho pa.

Rÿ mẽ pamã prãm nê ri papa. Rÿ mẽ paxê hkêt nê pamã kry nê ri papa htã nhûm arî kãm mẽ pajapê kamã mẽ pahkôt pa ho pa.

Rÿ ra mẽ kot hã mẽ panhîmex kaxyw rÿ hã mẽ pahpar kumrêx. Tã nhûm arî kãm mẽ pajapê kamã mẽ pahkôt pa ho pa rãhã nê.

Kãm mẽ pajapê kamã mẽ pahkôt pa ho pa rãhã jakamã pu mẽ tee ri amnhî kukamã pajamaxpêr kêt nê. ãm hkôt paxãmnhîx ri pajamakêtkati nê ri papa ho papa. 36Tirtûm kapêr ã kagà htûm te mẽ papajaja mẽ pahte kãm tanhmã amnhî jarênh to pyrã nê mẽ pajarênh kot:

Pa Tirtûm. Na htem atã mẽ ixtomnuj tÿx o pa.

Nê ra mẽ kot mẽ inhîmex kaxyw.

Ně mẽ inhĩpêx o te mẽ kot ôwêhti ho mõi mẽ hpar kaxyw tanhmã hipêx to pyrãk.

Jakamã na pa mẽ ra ixtyk kaxyw.

Anhỹr o kot mẽ pajarênh. 37Tã kwãr mẽ ã mẽ panhĩpêx anê. Arĩ Kris kãm mẽ pajapê kamã mẽ pahkõt pa ho pa rãhã jakamã mẽ kot tanhmã mẽ pahto htã pu mẽ arĩ amnhĩ kaxyw kãm pajamaxpêr tỳx rãhã ho ri papa. Nhũm arĩ mẽ kutã mẽ pahto paxihtỳx pu mẽ arĩ mẽ kãm pakuhê.

38Mêmoj koja tanhmã mẽ pahto nhũm Tĩrtũm tee ri ja hã mẽ pahpumu mẽ kãm mẽ pajapê hkêt nê? Nà amrakati kumrêx. Koja mẽhõ rỳ mẽmoj mẽ pahpê àmnàr kêt nê. Na hte jar pika ja kamã Kris kãm mẽ pajapê kamã mẽ pahkõt pa ho pa. Nê kot puj mẽ nhỹrmã ty nhũm arĩ kãm mẽ pajapê kamã mẽ pahkõt pa ho pa rãhã nê. Jakamã koja mẽkarõ rỳ mẽkarõmnuti rỳ jar pika ja kamã mẽ kãm Tĩrtũm prãm kêt xwỳnhjaja mẽ pahpê àmnàr kêt nê. Rỳ mẽmoj tanhmã kute. Rỳ kormã hapu hã mẽmoj tanhmã kute. Koja mẽmoj piitã tee ri tanhmã kêp mẽ pahto htã nhũm Kris arĩ kãm mẽ pajapê kamã mẽ pahkõt pa ho pa rãhã nê nhũm mẽmoj tee ri mẽ pahpê àmnàr kaprỳ. 39Nê koja kỳj rũm mẽmoj wrỳ nê tanhmã kêp mẽ pahto japêr. Rỳ pyka rũm mẽmoj kato mẽ tanhmã kêp mẽ pahto japêr. Rỳ kuwy rỳ kòk xàpêr tỳx tanhmã kêp mẽ pahto. Tã nhũm mẽ panhõ Pahihti Jejus Kris arĩ kãm mẽ pajapê kamã mẽ pahkõt pa ho pa rãhã nê. Te Tĩrtũm kãm mẽ pajapê pyrãk o kãm mẽ pajapê htỳx kãm mẽ pahkõt pa ho pa rãhã jakamã nhũm mẽmoj tee ri mẽ pahpê àmnàr kaprỳ.

Ijaew jarênh

Atrẽ 3.25; Rômãn 3.1-2

9 1-2Nê na pa tee ri ixkwỳ Ijaew kot tanhmã amnhĩ nhĩpêx to ho pa hã mẽ omu mẽ ixkaprĩ nê. Ixpyrà mẽ mẽ kêp Ijaew tã ixkĩnhã amnhĩ kaxyw Kris kõt hamaxpêr kêt jakamã nhũm Kris tee ri kãm mẽ hamakêtkati mẽ àmnhĩx ri mẽ pa hprãm kaprỳ. Pa tee ri mẽ hkukamã ijamaxpêr mẽ ixkaprĩ mẽ ri ixpa. Nê aa ixkaprĩ ixpê kator kêt kumrêx. Mẽ kot inhmã mẽ hkĩnh kêt ã amnhĩ tã ijarênh tã inhmã mẽ hkĩnh kênã. ãm hãmri na pa ã amnhĩ jarênh anê. Tĩrtũm Karõ kot ja hã ixpumunh mex mẽ inhmã:

—Nà ãm hãmri na ka amã mẽ hkĩnh ã amnhĩ jarê. Anê.

3Mê kêp ixkwỳ na mẽ. Mẽ ixpàr kraxja ãm pixi mex. Tã nhũm mẽ ixkĩnhã amnhĩ kaxyw Kris kõt hamaxpêr kêt jakamã kop ãm Tĩrtũm kot mẽ nê kuwy hwỳr pa inhmênh ronhỹx ja inhmã mex. Nhỹx pa kãm:

—Kwa Tĩrtũm. Amnhĩ nê kuwy hwỳr ixkwỳjê rênh kêt nê. Inhmã mẽ hapê htỳx kumrêx. Mẽ hpãnhã pa mãn mẽ nê hwỳr inhmê nà.

Anhỹr o nhỹx pa kãm ixkapêr. Nom kot paj amnhĩ to ã ixàhwỳr anhỹr kaprỳ. Tĩrtũm kot mẽ kamã ukaprĩ htã no nhũm mẽ amnhĩ kaxyw Kris

mã hamaxpër kêt jakamã tanhmã koja amnhĩ to nẽ mẽ hpãnhã pa mẽ nẽ kuwy wÿr inhmẽ nhũm mẽ ixrom kuri htĩr tũm nẽ pa ho pa? Mẽ kot hkõt amnhĩ xunhwÿre hã. 4Mẽ ixpê Ijaew nhĩgêjtaja na pre Tĩrtũm amnepê mã mẽ ho mex rax nẽ. Nẽ kãm mẽ ho hkra hprãm nẽ. Nhũm prem tanhmã kot amnhĩ nhĩpêx mex to hã no ho omunh o pa. Nẽ hirã htÿx kãm ri pa hã omu nhũm mẽ kãm:

—E kot kaj mẽ ixkapêr ma nẽ ixkõt amnhĩ nhĩpêx o ri apa. Hã kot paj mẽ akõt ixpa ho ixpa nẽ mẽ ato mex nẽ ka mẽ axpên kanrêhã axãmnrã rax nẽ. Hãmri pa mẽ amã pika mex gõ ka mẽ kamã ajamakêtkati nẽ axãmnhĩx ri apa ho apa.

Anhÿr o mẽ kãm kapêr. Hãmri nẽ mẽ kaxyw Mojes mã tanhmã kapêr to nẽ mẽ kaxyw kãm mẽmoj piitã hã karõ. Mẽ kot tanhmã amnhĩ tomnuj to hãmri nẽ tee ri ja hã amnhĩ pumunh nẽ tanhmã amnhĩ to Tĩrtũm wÿr to nhũm kot mẽ mar nẽ mẽ nẽ ja ho hapêx par kaxyw. Finat Mojes kot amnhĩ xõ ri mẽ kãm ujarênh nhũm mẽ kot mar nẽ hkõt amnhĩ nhĩpêx mex o ri pa kaxyw. 5Mẽ ixkukamã mẽ ixpãmjaja. Apraãw nẽ Ijak nẽ Jako kanrêhã mẽ hkra nẽ mẽ htãmnhwÿjaja na pre mẽ. Mẽ hwÿr na pre Tĩrtũmja Kra Jejus Kris mẽ nhũm mẽ hwÿr wrÿ nẽ mẽ kamã ĩ ho ĩ ho kator jakamã haxwÿja kêp Ijaew na pre. Kêp Měpahpãm nẽ mex o mex nẽ hihtÿx o hihtÿx tã Ijaew wÿr wrÿ nẽ mẽ kamã kato. Hãmri nhũm Ijaew kêt xwÿnhjaja harênh ma nẽ tee ri hamaxpêr nẽ hamaxpêr o:

—Hêxta waa nẽ. Kêp ãm Jejus mẽ papa kamã mãn kator ronhÿx mẽ pamã mex kumrêx. Anẽ.

6No nhũm kormã Ijaew hwÿr wrÿk kêt ri nhũm Tĩrtũm ra kot mẽ ho hkra kaxyw mẽ hã amnhĩ jarê nhũm mẽ hkwÿja kãm ja prãm kêt nẽ hkaga. Tã xà na pre Tĩrtũm kot mẽ ho hkra hã amnhĩ jarênh ã amnhĩ to hêx? Nà aa hêx kêt kênã kot kêt ri mẽmoj tã amnhĩ jarê nẽ hã amnhĩ to hêx. Jakamã na pre mẽ hkwÿjaja hkwÿjê rom hkaga hkêt nẽ nhũm amnhĩ tã mẽ omu nẽ mẽ ho hkra. Nom mẽ piitã mẽ ho hkra hkêt nẽ. Mẽ hkwÿjaja kot hkaga jakamã nhũm ãm mẽ hkwÿjê pix o hkra.

7Nẽ finat Apraãwja na pre hkanrêhã hkra nẽ htãmnhwÿ xohtõ nẽ. Tã xà na pre Tĩrtũm htãmnhwÿ piitã mẽ ho hkra hã amnhĩ jarê? Nà mẽ piitã ã mẽ harênh anhÿr kêt nẽ. ãm mẽ hkwÿjê pix na pre mẽ ho hkra hã mẽ harê. Apraãw kra Ijak kõt hkanrêhã htãmnhwÿ pixjaja nhũm kot mẽ ho hkra hã mẽ harê.

8-9Nẽ Apraãw kormã hprõ kamã hkra hkêt ri na pre kãm àpênh xwÿnh kamã hkra nhũm kato nẽ myre nẽ hixi pê Ismael. Nom kêp Apraãw prõ kumrêx kamã hkra hkêt. Prõ kuprÿ kamã hkra na pre. Tã nhũm Tĩrtũm kãm hkra kumrêx kukamã harê nẽ kãm:

—E kot paj ma tẽ hãmri nẽ mẽmo arĩgro hã akupÿn awÿr tẽ nhũm ra aprõ hpĩjagri nhũm war akra myre. Anẽ.

Tã nhũm hprõ Saraja htujarô. Nê gaa nê hpijagri nhũm hkraja myre. Hixi pê Ijak. Kêp Apraãw prõ kamã hkra jakamã Tirtũm nom kêp Apraãw kra kumrêx. Jakamã hkra Ijak kanrêhã htãmnhwÿjaja na pre Tirtũm kot mē ho hkra hã mē harê. Ra kot Apraãw mã ja hã amnhĩ jarênh xà hkôt.

10Tã nhũm Ijakja hprêk nê Repek o hprõ. Nê gaa nê ra haxwÿja wa hkra nhũm hkraja wa ahpo nê kato nê wa hamê my. Kot wa pê Ejau nhũm kot hapu pê Jako. 11-12Nom nhũm kormã wa kator kêt ri nhũm Tirtũm wa hkukamã tanhmã wa harênh to. Àhpumunh xà hkôt wa katorxà mã wa harê nê kãm:

—E kot paj amã war akra wa hkukamã tanhmã wa harênh to ka inhma. Nà koja wa kato nê gaa nê hprêk hãmri nhũm kot haputa amnhĩ to rax o kot wa jakre. Anê.

Kot wata koja kot hapu kĩnhã amnhĩ to grire nê ri pa nhũm ã wa hkukamã wa harênh anê. Kãm wa kot tanhmã amnhĩ nhĩpêx to hprãm xà hkôt ã wa harênh anê. Kormã wa kot tanhmã amnhĩ tomnuj to rÿ tanhmã amnhĩ to mex to hã kot wa omunh kêt tã kãm hprãm xà hkôt ã wa hkukamã wa harênh anê. 13Tirtũm kapêr ã kagà htũm kot wa harênh nê wa hã kagà kot:

Ejau rom Jako kanrêhã hkra nê htãmnhwÿ pixjaja na pre Tirtũm amnhĩm mē ho hkra. Anê.

14Mãn ka mē Tirtũm kot ã wa harênh anhÿrja ma nê ajamaxpêr o:

—Tk. Kwa ja mexti hã. Mo na pre hamê wa hkanrêhã wa hkra nê wa htãmnhwÿ piitã ho hkra hkêt nê? Anê.

Kwa mē ã ajamaxpêr anhÿr kêt nê. Tirtũm na hte kãm hprãm xà hkôt tanhmã mē panhĩpêx to ho pa pu mē kot tanhmã mē panhĩpêx to hã omu nê ãm omu nê amnhĩ tã tanhmã kãm nê hkêt nê. 15Na pre finat Mojes mã amnhĩ jarênh o:

Inhmã hprãm xà hkôt na pa hte mē omu nê tanhmã mē kamã ixukaprĩ hto ho ri ixpa.

Nê inhmã hprãm xà hkôt na pa hte ahpÿnhã tanhmã mē hipêx to ho ri ixpa.

Anhÿr o kãm amnhĩ jarê. 16Nom tanhmã mē pahte amnhĩ nhĩpêx to hã mē pahpumunh kôt na hte mē pakamã ukaprĩ hkêt nê. ãm tãm kãm hprãm xà hkôt na hte tanhmã mē pakamã ukaprĩ hto ho pa. 17Amnepê mã Ejit kãm mē õ pahihti Paraohti hwÿr na pre Mojes mē nhũm ma hwÿr mō nê kãm tanhmã Tirtũm kapêr jarênh to nê kãm:

—E Tirtũm na awÿr inhmê pa mō. Tãm na pre apê Ejit nhõ xwÿnhjê nhõ pahi kaxyw axãm. Akrã hihtÿx tã nhũm mē kaxyw axãm. Tã ra xatã àhpumunh tÿx o tanhmã anhĩpêx to. Krĩ piitã hkôt ri mē pa xwÿnhjaja kot atã harênh mar nê àhpumunh o àhpumunh ã omunh kaxyw. Tã ixte amã ja jarênh kaxyw na pre awÿr inhmê pa man awÿr mō. Anê.

18Ā na hte Tirtũm kãm hprãm xà hkôt tanhmã mẽ panhĩpêx anhỹr to ho pa. Jao mẽ hkwỳjê kamã ukaprĩ ho pa. No mẽ hkwỳjaja nhũm tee ri mẽ hkrã hihtỳx ã mẽ omu nê ãm mẽ omu nhũm mẽ amnhĩ krã hkôt ri tanhmã amnhĩ tomnuj to ho ri pa.

Tirtũm kêp mẽ pakamã ukaprĩ xwỳnh ã harênh

19Nê kot kaj mẽ atõ Tirtũm kot ã mẽ hipêx anhỹrja ã harênh ma nê tanhmã hã ixkukjêr to nê inhmã:

—Kwa na xep hte Tirtũm ahpỳnhã tanhmã mẽ hipêx to. Nê mẽ hkwỳjê kamã ukaprĩ ho pa nê mẽ hkwỳjaja mẽ hkrã hihtỳx ã mẽ omu nê ãm mẽ omu nê mẽ kamã ukaprĩ hkêt nê. Jakamã kwa mo na hte mẽ kot amnhĩ tomnuj xwỳnh ã mẽ harê? Tãm kot ã mẽ hipêx anhỹr kênã kot kêt mẽ kot amnhĩ tomnuj xwỳnh ã mẽ harê.



Rômãn 9.19-21

Anhỹr o ajamaxpêr japêr. 20Kwa mẽ ri ã atỳx Tirtũm jarênh anhỹr kêt nê. E pa mẽ amã ejêp jarê ka mẽ inhma. Xà kot mẽhõ gyw kwỳ ho amnhĩm poti nhĩpêx nhũm tee ri amnhĩ tã omu nê amnhĩ tã tanhmã kãm kapêr to nê kãm: “Tk. Kwa mon ka ri ã inhĩpêx anê?” Anhỹr o amnhĩ tã kãm kapêr? Nà koja kãm tanhmã nê hkêt nê. 21Hipêx xwỳnh kãm hprãm xà hkôt kot ã hipêx anhỹr kênã kot kêt amnhĩ tã kãm akir. Koja amnhĩm gyw kwỳ kakwỳ nê ho poti ho axkrut nê hipêx. Nê hõ ho muxre. Ho mex kumrêx nhũm xa. Nhũm ihõja mã ho anê nê hipêx no ãm wamta kĩnhã ho hanhàjti nhũm omnajti nê xa. No ãm tãm kot hamê wa hipêx prãm xà hkôt wa hipêx kênã.

22Tã na hte ã Tirtũm mẽ panhĩpêx anê. Te poti pynajre pyrã nê mẽ pahkwỳjê nhĩpêx nhũm mẽ kãm kapêr mar prãm kêt nê htỳx ri tanhmã amnhĩ tomnuj to ho ri pa. Hãmri nhũm amnhĩ tã mẽ omu nê te amnhĩ nê mẽ rênh kaxyw pyrãk o mẽ hipêx no ãm kormã hamaxpêr o:

—Nà kot paj nhỹrmã mẽ kot amnhĩ tomnuj mỳrapê mẽ ho ijapêx pa nhũm mẽ piitã ja hã ixpumu nê inhmã ixãhpumunh o ixãhpumunh ã ijarê. Nê inhmã mẽmoj punuj piitã hkĩnh kêt kumrêx ã axpên mã ijarê. Anê.

23Nom na hte jajê rom mẽ pahkwỳjê nhĩpêx o te poti mexta nhĩpêx pyrã nê amnhĩ kaxyw mẽ paxunhwỳ nê mẽ pahto hkra kaxyw. Nê mẽ pajarênh o:

—Nà koja mẽ amnhĩ kaxyw Ixkra Jejus mã hamaxpêr nê hkôt amnhĩ xunhwỳ pa ja hã mẽ omu nê mẽ kamã ixukaprĩ ho ri ixpa. Nê mẽ ho mex pê mẽ kutã inhnojarêr rãhã ho ri ixpa. Hãmri nhũm mẽ nhỹrmã

Ixkra mẽ wa ixri htĩr tũm nẽ mex nẽ pa ho pa. Kot paj ã mẽ ho mex anẽ nhũm mẽ amnhĩ tã ixpumu nẽ inhmã inhmex o inhmex ã ijarẽnh o pa. Anẽ.

Ã na hte Tĩrtũm ahpỹnhã mẽ pahpiitã mẽ panhĩpẽx anẽ.

24 Nẽ na hte mẽ ixpẽ Ijaew pix o hkra hkêt nẽ. Na hte mããnẽn mẽ apẽ Ijaew kêt xwỹnhjẽ ho hkra. 25 Amnepẽ mã mẽ kãm kapẽr jarẽnh o ri mẽ pa xwỹnhjẽ hõ pẽ finat Ojejja na pre te Tĩrtũm tãm kot Ijaew kêt xwỹnhjẽ jarẽnh pyrã nẽ mẽ harẽnh o:

Amnepẽm na pa pre mẽ ho ixkra hkêt tã kot paj mẽ hkwyjẽ ho ixkra.

Na pa pre mẽ kamã ixukaprĩ hkêt tã pa ra inhmã mẽ hapẽ nẽ.

26 Nẽ ixte mẽ kẽp ixkra hkêt ã mẽ harẽnh tã kot paj ra mẽ kẽp ixkra hã mẽ harẽ.

Ixpẽ mẽõ Tĩrtũm kot paj ã mẽ harẽnh anẽ. Anẽ.

27 Hãmri nhũm finat Ijais Ojej pãnhã tanhmã Ijaew jarẽnh to. Ijaisja Tĩrtũm nhỹ hã kapẽr jarẽnh o ri pa xwỹnhjẽ hõ na pre. Jakamã nhũm Tĩrtũm kãm tanhmã mẽ ijarẽnh to nhũm kuma nẽ ô ri mẽ ixkukamã mẽ inhĩgẽxjẽ mã ujarẽnh o pa nẽ hã kagã. Nẽ hã kagã ho:

Ijaew na mẽ ohtõ rax kumrẽx.

Te gõ xujanãr mỳri pykahti grã hkryre xohtõ pyrãk.

Tã koja mẽ piitã ixkõt amnhĩ xunhwỳr kêt nẽ.

Koja mẽ ãm grẽre nẽ amnhĩ kaxyw inhmã hamaxpẽr nẽ ixkõt amnhĩ xunhwỳ.

Jakamã mẽ tapxipixjaja koja hkwyjẽ rom nhỹrmã inhõ krĩ hwỳr api.

28 No mẽ kot amnhĩ kaxyw inhmã mẽ hamaxpẽr kêt xwỹnhjaja kot paj tokyx tanhmã mẽ harẽnh to.

Mẽ kot amnhĩ tomnuj mỳrapẽ tanhmã mẽ harẽnh to nhũm mẽ ma mẽ kot amnhĩ xà htỳx kamã hamak tũm xàta wỳr ma pa.

Nà kot paj tokyx ã mẽ hipẽx anẽ.

Anhỹr o mẽ harẽ. 29 Nom nhũm kormã ã mẽ harẽnh anhỹr kêt ri nhũm ra wam tanhmã mẽ harẽnh to nẽ mẽ harẽnh o:

Amnepẽm Sotõ mẽ Komo kamã mẽ pa xwỹnhjaja na prem amnhĩ tomnuj tỳx rãhã ho ri pa.

Mỳrapẽ nhũm Tĩrtũm xãhpumunh o àhpumunh xwỹnhja tee ri ja hã mẽ omu hãmri nẽ kaxkwa rũm mẽ ô krĩ wa hipy mẽmoj põõta rẽ.

Nhũm mẽ hã rõrõk nẽ mẽ ho hkaxàr pa nhũm mẽ hapẽx.

Tã na pu htem mẽ uràk nẽ amnhĩ tomnuj o ri papa.

Jakamã kop ãm Tĩrtũm kot mẽ pahkwỳjẽ kamã ukaprĩ kêt ronhỹx pu mẽ ra mẽ uràk nẽ pahpiitã pajapẽx pa. Anẽ.

Ijaew kwỳ kot Jejus kôt amnhĩ xunhwỳr kêt ã mẽ harênh

Rômãn 10.1-4

30Nê Ijaew kêt xwỳnhjaja na prem Ijaew pyrà nê kãm Tĩrtũm prãm kêt tã Jejus jarênh ma nê Ijaew rom amnhĩ kaxyw hkôt hamaxpêr nê hkôt amnhĩ xunhwỳ. Hãmri nhũm Tĩrtũm ja hã mẽ omu nê mẽ ho hkra nê mẽ kot amnhĩ to mex xwỳnhjê hã mẽ harê. 31-32Hãmri nhũm Ijaew tee ri mẽ kot Jejus kôt amnhĩ xunhwỳr ã mẽ omu nhũm ja mẽ kãm mex kêt nê. Hãmri nhũm mẽ hamaxpêr o:

—Tk. Kwa ra mẽ ixte finat Mojes kapêr kôt amnhĩ nhĩpêx mex o ri mẽ ixpa xwỳnh jakamã koja Tĩrtũm ja hã mẽ ixpumu nê mẽ ixte amnhĩ to mex xwỳnhjê hã mẽ ijarê nê mẽ inhnê mẽ ixte amnhĩ tomnuj rênh pa. No kot paj mẽ Ijaew kêt xwỳnhjê pyrà nê Jejus kôt amnhĩ xunhwỳr kêt nê. ãm kwarĩ ho kwarĩ.

Anhỹr ã amnhĩ jarê. No ãm ã mẽ hamaxpêr anhỹrja mex kêt. Na prem htỳx Tĩrtũm noo mã kot amnhĩ to mex ã amnhĩ jarênh kaprỳ nê arĩ ri tanhmã amnhĩ tomnuj to ho ri pa. Te pry kamã kên nôr nhũm mẽ kot nhãm nê mẽnh kaxyw hkamnâr nê ho amnhĩ par krã hi kukênh pyræk o na htem amnhĩ nhĩpêx. Jao amnhĩ krã hkôt tanhmã amnhĩ nhĩpêx to ho pa hprãm xàj te Jejus kapêrja nhãm amnhĩ nê rênh pyræk o hipêx. Jakamã koja mẽ Tĩrtũm nhõ krĩ hwỳr àpir kêt nê. 33Tĩrtũm kapêr ã kaga htũm kot ja jarênh kot:

E mẽ inhma. Kot paj nhỹrmã Ijaewjê hwỳr mẽhõ mẽ nhũm mẽ hkôt kapêr o pa.

Nom koja mẽ kapêr mar kêt nê. Koja mẽ kuma nê ãm kuma.

Te pry kamã kên nôr nhũm mẽ kot nhãm pry nê mẽnh kaxyw hkamnâr nê ho amnhĩ par krã hi kukênh pyræk o koja mẽ amnhĩ nhĩpêx.

No te mẽ kot nhãm pry nê mẽnh kaxyw hkamnâr kêt pyræk xwỳnhjaja koja mẽ kurom nhỹrmã ma Tĩrtũm nhõ krĩ hwỳr api.

Hãmri nê hkĩnh nê pa ho pa. Anê.

Nom kên kumrêx jarênh kêt nê. Na prem Jejus ã kuxi nê ã harênh anê. Ijaew te mẽ kot kên nhĩpêx pyræk o Jejus nhĩpêx nê amnhĩ kaxyw hkôt hamaxpêr kêt nê axtem nê hkaga nê ãm kamã gryk pix o ri pata ã nhũm mẽ harê. No mẽ kot amnhĩ kaxyw hkôt hamaxpêr ronhỹx Jejus te kên kot mẽ kêp àmnâr pyræk kêt nê. Jakamã ã mẽ harênh kot anhỹr.

10 1Hêxta waa nê. Ijaxwỳja ixpê Ijaew. Mẽ kêp ixkwỳ jakamã kêp apu mẽ kot amnhĩ kaxyw Jejus mã hamaxpêr nê hkôt amnhĩ xunhwỳr ronhỹx pa ixkĩnh tỳx kumrêx. Inhmã mẽ kêp Tĩrtũm kra hprãm tỳx kumrêx kênã. Inhmã ja prãm xàj na pa hte mẽ ho Tĩrtũm wỳr rãhã ho ri ixpa. 2Ra ixte mẽ omunh mex. Mẽ kãm Tĩrtũm mã tanhmã amnhĩ

nhîpêx to hprãm tâ no ãm mẽ kot hprî hã kapêr mar kêt. Jakamã na htem tee ri tanhmã kãm amnhî nhîpêx to ho ri pa hprãm kaprÿ. ³Nhũm pre Tirtũm tee ri amnhî tâ mẽ omu nẽ hamaxpêr o:

—Koja mẽhõ amnhî kaxyw Ixkra Kris kôt hamaxpêr nẽ hkôt amnhî xãm pa ja hã omu nẽ kot amnhî to mex xwÿnh ã harẽ nẽ ho ixkra kurê kumrêx. Nom na hte Ijaew ohtô nẽ ã amnhî nhîpêx anhÿr kêt nẽ.

Anhÿr o mẽ harẽ. ãm hãmri na ã mẽ harênh anẽ. Na htem ãm axtem nẽ hamaxpêr o:

—Tk. Kot paj amnhî kaxyw Kris kôt ijamaxpêr nẽ hkôt amnhî xãm kêt nẽ. Kot paj ãm pam amnhî krã hkôt tãm ri amnhî nhîpêx o ri ixpa. Mẽ ixpê Ijaewjê mẽ ixte amnhî nhîpêx xà hkôt. Hãmri nhũm Tirtũm ja hã ixpumu nẽ amnhîm inhmex ã ijarẽ. Nom kot paj Kris kôt amnhî xãm kêt nẽ. ãm kwarî ho kwarî.

Anhÿr ã amnhî jarẽ. ⁴Nom na htem ãm htÿx ri amnhî krã hkôt amnhî to mex o pa hã amnhî kamnhix kaprÿ. Koja mẽ tee ri kãm finat Mojes kapêr kôt amnhî nhîpêx o ri pa hprãm kaprÿ. Jejus tapxipix na pre tãm amnhî nhîpêx mex rãhã ho pa. Na pre Tirtũm kapêr kôt amnhî nhîpêx mex o ri pa nẽ aa kapêr õ nhîrôp ãm nẽ hkwÿm ri tanhmã amnhî tomnuj to hkêt nẽ. Kot amnhî tomnuj kêt xwÿnh ã ãm pixi mex na. Jakamã tapxipix kukwak ri na hte Tirtũm amnhîm mẽ pahte amnhî to mex xwÿnh ã mẽ pajarẽ.

Tirtũm kãm mẽ pahpiitã mẽ pahto hkra hprãm ã harênh

⁵Nẽ amnepêm na pre finat Mojes Tirtũm nhÿ hã Ijaew mã tanhmã ujarênh to nẽ hã kagã. Nẽ mẽ kãm ujarênh o:

—E kot kaj mẽ atõ Tirtũm nhÿ hã ixujarênh ma nẽ hkôt amnhî nhîpêx mex o ri apa nẽ hkwÿm ri tanhmã amnhî nhîpêx to hkêt nẽ. Hã koja Tirtũm hã apumu nẽ amnhîm ate amnhî to mex xwÿnh ã ajarẽ ka nhÿrmã kuri atîr tũm nẽ amex nẽ apa ho apa. Anẽ.

⁶Ã mẽ kãm kapêr anhÿr tâ mẽ pahte Mojes kapêr xà hkôt amnhî nhîpêx o papaja na mẽ pahpê hihtÿx kumrêx. Tirtũm kapêr tũm na. Kapêr ã kagã kamã kot mẽ pamã mẽ pahte tanhmã amnhî nhîpêx to hã karõja ohtô rax kumrêx jakamã pu mẽ tee ri pamã piitã hkôt amnhî nhîpêx prãm kaprÿ. Nhũm Tirtũm tee ri amnhî tâ mẽ pajamã hãmri nẽ mẽ pahwÿr Kra Jejus mẽ. Jakamã na pu htem amnhî kaxyw hkôt pajamaxpêr nẽ hkôt amnhî xunhwÿ nhũm Tirtũm hã mẽ pahpumu nẽ kukwak ri mẽ pahto hkra kurê kumrêx. Kra kukwak ri kot mẽ pahto hkra kaxyw kot mẽ pahwÿr mênh nhũm mẽ kot hpîr nhũm akupÿm ho htîr jakamã na pu htem harênhja ma nẽ pajamaxpêr o:

—Nà na xep pre Jejus ixto ixpê Tirtũm kra. Anẽ.

Nom xà na hte Tirtũmja ã mẽ pamã kapêr anẽ nẽ mẽ pamã:

—E kot kaj mẽ ma kaxkwa hwỳr api nẽ Kris japrô nẽ man amnhĩ kôt akupỳn o wrỳ pa ja hã mẽ apumu nẽ mẽ ato ixkra.

Anhỳr o mẽ pamã kapêr? Nà na hte ã mẽ pamã kapêr anhỳr kêt nẽ. Tanhmã kot puj mẽ amnhĩ to nẽ ã amnhĩ nhĩpêx anê? 7Rỳ xà na hte ã mẽ pamã kapêr anê nẽ mẽ pamã:

—E na pre Krisja ty. Jakamã mẽ kam nẽ ma hwỳr mra nẽ akupỳm amnhĩm ho htír. Hãmri pa ja hã mẽ apumu nẽ mẽ ato ixkra.

Anhỳr o mẽ pamã kapêr? Nà na hte ã mẽ pamã kapêr anhỳr kêt nẽ. Tanhmã kot pu mẽ amnhĩ to nẽ akupỳm ho htír? Ja pyrã nẽ na hte Tirtũm mẽ pamã mẽmoj tã karõ pu mẽ kãm ho anhỳr nhũm ja hã mẽ pahpumunh kôt mẽ pahto hkra hkêt nẽ. 8Ăm mẽ pahte amnhĩ kaxyw Jejus kôt pajamaxpêr nẽ hkôt amnhĩ xunhwỳr ã mẽ pahpumunh kôt pix mã na hte mẽ pahto hkra. Hãmri nẽ mẽ pahwỳr Karõ rẽ nhũm mẽ pahkarõ mã gjêx jakamã mẽ pahte Tirtũm kãm hprãm xà hkôt amnhĩ nhĩpêx o papaja na mẽ pahpê hihtỳx kêt. Te kapêr ra mẽ pahkrã hi kaxwỳnh kãm hikwỳ pyrãk o pu mẽ piitã mẽ kãm harênh o ri mẽ hkôt papa. Jakamã na pa hte mẽ piitã mẽ kot amnhĩ kaxyw Jejus kôt hamaxpêr kaxyw tanhmã mẽ kãm harênh to ho ri mẽ hkôt ixpa nẽ mẽ kãm:

9—Kot ka mẽ atõ Jejus kêp anhõ Pahihti hã harẽ nẽ Tirtũm kot akupỳm ho htír kôt ajamaxpêr. Hã koja Tirtũm ja hã apumu nẽ anê ate amnhĩ tomnuj o hapêx nẽ ato hkra. Ăm ja pix ã mẽ pahpumunh kôt na hte mẽ pahto hkra. Anẽ.

10Nẽ na pu htem mẽ pahkrãhi kaxwỳnh kãm amnhĩ kaxyw Jejus mã pajamaxpêr. Nẽ mẽ pajakwa ho kêp mẽ panhõ Pahihti hã harẽ. Hãmri nhũm Tirtũm ja hã mẽ pahpumu nẽ amnhĩm mẽ pahte amnhĩ to mex xwỳnh ã mẽ pajarẽ nẽ mẽ pahto hkra. 11-13Tã mẽ pahte amnhĩ kaxyw Jejus kôt pajamaxpêr nẽ hkôt amnhĩ xunhwỳr xwỳnhjaja kot puj mẽ pahkĩnh nẽ papa ho papa. Mẽ pahpiitãã. Ijaew nẽ Ijaew kêt xwỳnhjaja. Mẽ pahpiitã mẽ panhõ Pahi Maatija ãm pyxi mex na. Jakamã koja Ijaewjê hõ rỳ Ijaew kêt xwỳnhjê hõ amnhĩ to kuwỳ nhũm kuma nẽ ho hkra. Kapêr ã kagã htũm kot ja jarênh kot:

Mẽ kãm kêp Tirtũm kra hprãm xwỳnhjaja koja mẽ amnhĩ to
Tirtũm wỳ nhũm mẽ kuma nẽ Jejus kot mẽ nẽ htyk
kukwak ri mẽ nẽ mẽ kot amnhĩ tomnuj o hapêx nẽ mẽ ho
hkra nhũm mẽ hkĩnh nẽ pa. Anẽ.

14-15Xà na htem kormã amnhĩ kaxyw Kris mã hamaxpêr kêt rãhã amnhĩ to Tirtũm wỳ nhũm mẽ kuma nẽ mẽ ho hkra? Nà tanhmã kot wem amnhĩ to nẽ amnhĩ kaxyw kãm hamaxpêr kêt rãhã amnhĩ to kuwỳ? Na hte Tirtũm ma mẽ hwỳr mẽ hkwỳjê rẽ nhũm mẽ ma mẽ hwỳr mra nẽ Tirtũm kapêr o mẽ ahkre ho ri mẽ hkôt pa. Nhũm mẽ hkwỳjaja mẽ kuma nẽ amnhĩ kaxyw Jejus kôt hamaxpêr nẽ amnhĩ to Tirtũm wỳ. Kapêr ã kagã htũm kot ja jarênh kot:

Koja mẽmoj mex jarēnh xwỳnhjaja ma mẽ hwỳr mra.

Ně mẽ hwỳr hpôx o mỗ nhũm mẽ amỳm amnhĩ wỳr mẽ omu nẽ
hkĩnh nẽ. Anẽ.

16Tã ra mẽ piitã kot kapēr mar tã piitã amnhĩ kaxyw hkôt hamaxpēr kêt
nẽ. Jakamã nhũm finat Ijais tee ri ja hã mẽ omu nẽ Tĩrtũm mã mẽ harēnh
o:

Pa Pahi Maati. Kwa ra mẽ kot akapēr mar tỳx tã akôt amnhĩ
nhĩpêx kêt nẽ. Mẽ kãm akapēr kôt amnhĩ nhĩpêx o pa
hprãm kêt. Na htem âm grêre nẽ akôt amnhĩ xunhwỳ nẽ
akôt amnhĩ nhĩpêx o ri pa. Anẽ.

17Kot anhỳr tã âm mẽ kot Kris kapēr jarēnh mar kôt pix mã na htem
amnhĩ kaxyw hkôt hamaxpēr. Koja mẽ harēnh mar kêt tã tanhmã koja
wem amnhĩ to nẽ amnhĩ kaxyw hkôt hamaxpēr nẽ hkôt amnhĩ xunhwỳ?

18Mãn ka mẽ atõ atỳx ã ajamaxpēr anhỳr o:

—Ko mãn Ijaew kormã Jesus kot mẽ panê tanhmã amnhĩ nhĩpêx to
hã harēnh mar kêt jakamã na mẽ kormã hkôt amnhĩ xunhwỳr kêt nẽ.

Anhỳr o ajamaxpēr. Nom ja kot anhỳr kêt. Ijaew piitã ra mẽ kot
harēnh mar kênã. Tĩrtũm kapēr ã kagà htũm kot ja hã mẽ harēnh kot:

Na prem ma mẽ piitã mẽ kãm ja jarēnh o ri mẽ hkôt pa nhũm mẽ
piitã kuma. Anẽ.

19Tã mãn ka prem ra ja ma nẽ atỳx ajamaxpēr o:

—Kot anhỳr tã no mãn kormã hprĩ hã Jesus jarēnh mar kêt jakamã
mẽ hkôt amnhĩ xunhwỳr kêt nẽ. Anẽ.

Nom ja haxwỳja kot anhỳr kêt. Ra mẽ kot hprĩ hã harēnh mar mex
tã kuma nẽ âm kuma nẽ amnhĩ kaxyw kãm hamaxpēr kêt nẽ. No mẽ apê
Ijaew kêt xwỳnh kwỳjaja na ka mẽ kurom harēnh ma nẽ amnhĩ kaxyw
hkôt ajamaxpēr nẽ hkôt amnhĩ xunhwỳr kurê kumrêx. Hãmri nhũm
Ijaew tee ri ja hã mẽ apumu nẽ mẽ akamã gryk tỳx nẽ. Nom ra Tĩrtũm
kot ã mẽ hkukamã mẽ kot amnhĩ nhĩpêx anhỳr ã mẽ omunh nẽ mẽ
harēnh kot anhỳr kênã. Na pre finat Mojes mẽ kãm tanhmã hã kagà hto.
Te Tĩrtũm tãm kot mẽ hã kagà pyrã nẽ kapēr ã kagà htũm kamã kot mẽ
harēnh kot:

Mẽ ate mẽ kamã mẽ akahak o apa xwỳnhjaja.

Mẽ kot htỳx ri amnhĩ nhĩpêx o mẽ pa hã mẽ ate mẽ harēnh tã no
kot paj mẽ arom amnhĩm mẽ kot amnhĩ to mex xwỳnhjê
hã mẽ harê.

Kot kaj mẽ tee ri ja hã mẽ omu nẽ mẽ kamã agryk tỳx kumrêx.

Nẽ mããnēn pa ixte mẽ ho mex ã ixpumu nẽ mẽ hã ixkamã agryk
nẽ. Anẽ.

20Ně finat Ijais na pre haxwỳja ã mẽ harēnh anẽ. Na pre kãm amnhĩ kwỳ
pê Ijaew puma hkêt nẽ xatã Tĩrtũm nhỹ hã tanhmã mẽ kãm Ijaew kêt
xwỳnhjê jarēnh to ho pa. Te Tĩrtũm tãm kot mẽ harēnh pyrãk o mẽ kãm:

Nà Ijaew kêt xwỳnhjaja kot Tĩrtũm japêr kêt tã koja tãm mẽ kãm amnhĩ to amnhĩrĩt nhũm mẽ hkõt amnhĩ xunhwỳ.

Mẽ kot kormã amnhĩ kaxyw kãm hamaxpêr kêt tã koja tãm mẽ kãm amnhĩ to amnhĩrĩt. Anẽ.

21 ã Ijaew kêt xwỳnhjê jarẽnh kot anhỹr. Nẽ axte mã tanhmã Ijaewjê jarẽnh to kot:

Te mẽ katorxà kot tanhmã hkrajê ho mex to kaxyw tee ri amnhĩ wỳr mẽ kãm àkjêr pyràk o na hte Tĩrtũm Ijaewjê nhĩpêx o pa.

Jao tee ri kãm tanhmã mẽ ho mẽ mex to hprãm tã no nhũm mẽ amnhĩ tã kuma nẽ ãm kuma nẽ hkõt amnhĩ nhĩpêx kêt nẽ. Anẽ.

Tĩrtũm kot Ijaew kamã ukapĩrĩ hã harẽnh

Matêwre 13.10-17

11 ¹Tã ra Ijaew kot Tĩrtũm kaga jakamã mãn ka mẽ atõ mẽ harẽnh ma nẽ ajamaxpêr o:

—Mãn pre Tĩrtũm tee ri amnhĩ tã mẽ omu nẽ amnhĩ pyrà nẽ mẽ hkaga.

Anhỹr o ajamaxpêr. Nom na pre mẽ hkaga hkêt nẽ. Ijaxwỳja ixpê Ijaew na pa. Mẽ uràk nẽ ixpê Ijaew pàr krax pê finat Apraãw kanrêhã htàmnhwỳ Pêjamĩ kanrêhã hõ na pa. Tã xà na pre Tĩrtũm ixkaga? Nà kot ixkaga hkêt. ²Amnepêm kormã mẽmoj piitã hkêt ri na pre mẽ ixpê Ijaew hkukamã mẽ ixto hkra hã amnhĩ jarẽ. Tã nhũm amgrà xohtõ nẽ hapêx nhũm mẽ hapôj hãmri nẽ Tĩrtũm kõt amnhĩ nhĩpêx o pa hkêt nẽ. Hãmri nhũm finat Erisja tee ri mẽ kot amnhĩ nhĩpêx ã mẽ omunh o pa nẽ Tĩrtũm mã tanhmã mẽ harẽnh to nẽ mẽ hã kagà. Nẽ hã kagà ho:

³ Kwa Tĩrtũm. Mẽ ixte amã amnhĩ jarẽnh xà hã mêtĩ hkwy na prem ra hkrakrak pa. Nẽ anhỹ hã akapêr jarẽnh o ri mẽ pa xwỳnh kwỳ nhĩmex rax nẽ. ãm papxipix na pa arĩ ixtĩr nẽ ri ixpa nom nhũm mẽ ra kot ixpĩr kaxyw ixtã amnhĩ jarẽ. Anẽ.

⁴Tã tanhmã na Tĩrtũm kutã kãm kapêr to? Na pre kãm:

Nà kapxipix na ka arĩ atĩr kêt nẽ. Arĩ mẽ ohtõ nẽ apyrà nẽ amnhĩ kaxyw ixkõt hamaxpêr. Mẽ ohtõ. Arĩ mẽ kêp 7.000 nẽ akwỳjê rom ri sãnti Paaw kutã hkõnkrã ho hkrĩ nẽ kãm mex ã harẽnh kêt nẽ. Anẽ.

⁵Tã arĩ ã jarãhã mẽ kot ã amnhĩ nhĩpêx anhỹr kênã. Tĩrtũm kãm Ijaew japê jakamã mẽ kamã ukapĩrĩ. Jakamã nhũm ra mẽ hkwyjaja mẽ pahpyrà nẽ amnhĩ kaxyw Kris kõt hamaxpêr nhũm Tĩrtũm mẽ ho hkra.

⁶Nom mẽ kot amnhĩ to mex ã mẽ omunh xà hkõt mẽ ho hkra hkêt nẽ. Amarĩ kãm mẽ hapê htũm xà hkõt na hte mẽ ho hkra. Kop apu mẽ kot

amnhĩ to mex ã mẽ omunh xà hkôt kot mẽ ho hkra ronhỹx amarĩ mẽ ho hkra hkêt nê. Nhỹx mẽ kot tanhmã amnhĩ nhĩpêx to ho pa hã mẽ omunh xà hkôt pix mã mẽ ho hkra.

7Ijaew piitã Tĩrtũm kot amnhĩm mẽ mex ã mẽ harênh prãm tã no ãm mẽ grêre nê hamaxpêr xà hkôt Jejus kôt amnhĩ xunhwỳ. Na htem ohtô rax nê kapêr ma nê ãm kuma nê tee ri kot amnhĩm mẽ mex ã mẽ harênh prãm xàj amnhĩ krã hkôt tanhmã amnhĩ nhĩpêx to ho ri pa. Nom ra mẽ kot Jejus kaga jakamã ã amnhĩ nhĩpêx anhỹr kaprỳ. Mẽ kot hkaga jakamã te ri mẽ hamak kro nê Tĩrtũm kapêr mar kêt pyrã nê pa. 8Tĩrtũm kapêr ã kaga htũm kot mẽ harênh kot:

Tĩrtũm na hte mẽ kãm kapêr mar prãm kêt xwỳnhjê pumu nê ãm mẽ omu nhũm htem htỳx ri pa ho pa. Nê Tĩrtũm mã hamaxpêr kêt o ri pa. Mẽ kot kapêr mar tã hprĩ hã mar tỳx kêt nê. Nê mẽ kot kapêr ã kagã kamã harênh tã hprĩ hã mar tỳx kêt nê. Jakamã na htem amnhĩ kaxyw hkôt hamaxpêr kêt o pa.

Tã na htem arĩ jarãhã ã amnhĩ nhĩpêx anhỹr o ri pa. Te mẽ nohkre nê mẽ hamak kro xwỳnh kot amnhĩ nhĩpêx pyrãk. Anê.

9Nê amnepê m na pre pahi finat Tawija amnhĩ kwỳ Ijaew jarênh o: Na htem htỳx ri hkĩnh kãm apkur o pa.

Te tutre kãm prãm nê kot rapuuti hwỳr àr nê tee ri kãm kator prãm kaprỳ pyrãk.

Ja pyrã nê mẽ kot Tĩrtũm kapêr mar kêt mỳrapê koja Tĩrtũm tanhmã mẽ ho nhũm mẽ tee ri kãm mex prãm kaprỳ.

10 Te mẽ nohkre xwỳnhjaja tee ri mẽ hpa nhĩpêx o pa pyrãk.

Nê omnuj nê à nê ho gjêx o ri pa pyrãk o amnhĩ nhĩpêx o ri pa.

Anhỹr o mẽ harê. 11Tã arĩ Ijaew Jejus kaga nê kãm kapêr mar prãm kêt jakamã xà na Tĩrtũm tee ri ja hã mẽ omu nê mẽ hkaga kumrêx? Nà kot mẽ hkaga hkêt. ãm mẽ tãmjaja kêp Jejus prãm nòkati jakamã nhũm tee ri ja hã mẽ omu nê mẽ hpãnhã Ijaew kêt xwỳnhjê mã amnhĩ to amnhĩrĩt nê mẽ hkwỳjê ho hkra. Jakamã koja Ijaew kwỳjaja ja hã mẽ omu nê tee ri hamaxpêr nê hamaxpêr o:

—Kwa na xep Ijaew kêt xwỳnh kwỳjaja Jejus kôt amnhĩ xunhwỳ nhũm Tĩrtũm ja hã mẽ omu nê mẽ ho hkra. Kwa mon pu prem axtem nê ri Jejus kaga? E pu mẽ kuxwar amnhĩ kaxyw hkôt mãn pajamaxpêr nê hkôt amnhĩ xunhwỳ kê Tĩrtũm ja hã mẽ pahpumu nê Ijaew kêt xwỳnhjê pyrã nê mẽ pahto hkra. Hãmri nê amnhĩ mã mẽ pahte amnhĩ to mex xwỳnh ã mẽ pajarê. Anê.

ã Ijaewjaja hamaxpêr anhỹr kaxyw na pre Tĩrtũm Ijaew kêt xwỳnhjê mã amnhĩ to amnhĩrĩt. 12Hãmri nhũm mẽ amnhĩ tã omu nê hkĩnh nê pa. No nhũm Ijaew kwỳjaja. Mẽ kãm Jejus prãm nòkati ho mẽ pa

xwÿnhjaja mẽ hkĩnhã hkaprĩ nẽ pa. Tã koja mẽ nhÿrmã amnhĩ kaprĩ hã amnhĩ pumu nẽ amnhĩ kĩnh kêt ã amnhĩ pumu hãmri nẽ Tĩrtũm kôt amnhĩ xunhwÿr nẽ amnhĩ kaxyw Kra Jejus Kris mã hamaxpẽr japêr. Koja mẽ ã amnhĩ nhĩpêx anẽ hãmri nẽ Ijaew kêt xwÿnhjê pyrã nẽ hkĩnh nẽ ri pa. Hãmri nhũm Tĩrtũm ja hã mẽ omu nẽ Ijaew kêt xwÿnhjê mẽ mẽ ho hpimràatã mẽ ho mex rax nẽ nhũm mẽ hkĩnh nẽ hamakêtkati nẽ pa ho pa.

Tĩrtũm kot Ijaew kêt xwÿnhjê ho hkra hã harẽnh

13E kot paj hpãnhã mẽ apê Ijaew kêt xwÿnhjê mã ixkapẽr nẽ mẽ atã kagã. Na pre Jejus ma mẽ awÿr inhmẽ. Y hã ixte mẽ ajahkre ho ri mẽ akôt ixpa kaxyw. Pa pre ma krĩ hkwy kamã mẽ akwÿjê hwÿr mō nẽ ixkĩnh kãm mẽ kãm kapẽr jarẽnh o ri mẽ hkôt ixpa. Nhũm mẽ hkwyjaja inhma nẽ amnhĩ kaxyw Jejus kôt hamaxpẽr nẽ hkôt amnhĩ xunhwÿ. 14Tã koja apu ixkwÿjaja mẽ harẽnh mar japêr. Ijaew tee ri mẽ apê Ijaew kêt xwÿnhjê jarẽnhja ma hãmri nẽ ra amnhĩ kamã gryk japêr. Jao mẽ apyrã nẽ Jejus kôt amnhĩ xunhwÿ nẽ nhÿrmã kuri htĩr tũm nẽ mex nẽ pa ho pa. 15Kormã mẽ kot amnhĩ kaxyw kãm hamaxpẽr kêt jakamã na pre Tĩrtũm hpãnhã mẽ apê Ijaew kêt xwÿnhjê mã amnhĩ to amnhĩrit. Ka mẽ ra krĩ piitã hkôt axohtô nẽ hkôt amnhĩ xunhwÿ nẽ hkôt amnhĩ nhĩpêx mex o ri apa. Tã koja Ijaewjaja nhÿrmã amnhĩ kaxyw Tĩrtũm mã hamaxpẽr nẽ mẽ apyrã nẽ Jejus kôt amnhĩ xunhwÿr japêr. Hãmri nẽ te mẽhõ hkra kêp htyk nhũm hkaprĩ htã nhũm hkraja tanhmã amnhĩ to nẽ akupÿm kãm htĩr nhũm kot omunh nẽ hkĩnh tÿx kumrẽxta pyrãk o amnhĩ nhĩpêx. Jao Tĩrtũm mẽ kot hkôt amnhĩ xunhwÿr ã mẽ omu nẽ hkĩnh nẽ. Pu mẽ pahpimràatã urãk nẽ pahkĩnh nẽ ri papa.

16E pa mẽ amã mẽ ujarẽnhja ã ejêp kwÿ jarẽ. Koja mẽmo pĩ hpàr jarẽ mex nẽ hã koja pàr mex nẽ xa. Ja pyrã nẽ Ijaew pàr krax finat Apraãwja kumrẽx na pre amnhĩ kaxyw Tĩrtũm mã hamaxpẽr nhũm ho hkra. Jakamã koja nhÿrmã hkanrêhã htãmnhwÿjaja urãk nẽ amnhĩ kaxyw kãm hamaxpẽr nhũm mã mẽ ho anẽ nẽ mããnẽn mẽ ho hkra nhũm mẽ mex nẽ pa. Te kot mẽmo pĩ hpàr jarẽ mexja nhÿ hã pàr mexta pyrãk.

17Nẽ na htem akunĩ kamã mẽmo pĩ hpa jakã nẽ hamÿ nẽ ma amnhĩ kôt o mra. Nẽ ixkre kapem ra mẽ kot mẽmo pĩ hkreja hpa jakãr nẽ rẽnh xwÿnh xwakre kamã wam pĩ hpa jakãr xwÿnhhta nhõ nẽ axpẽn tã hkaxpre nẽ gaa nẽ axpẽn jamÿnh mex nẽ grã hkêt nẽ. Nẽ arĩ htĩr mex nẽ. Te kêp hpa kumrẽx pyrãk. Tã Ijaew kwÿ kot amnhĩ kaxyw Jejus kôt hamaxpẽr xwÿnhjaja te mẽ kêp ixkre kapem pĩ hpãrta pyrãk. No mẽ hkwyjaja mẽ kot Jejus kaga xwÿnhjaja te mẽ kêp mẽ kot kêp hpa jakãr nẽ rẽnhhta pyrãk. Jakamã nhũm Tĩrtũm te mẽ kot pàr pê hpa jakãr nẽ rẽnhhta pyrãk o mẽ hipêx nẽ mẽ hkaga. Nẽ axtem te mẽ kot mẽmoj pàr pa jakãr nẽ hpãnhã kamã axtem pĩ hpa janhõr nẽ hã hkaxpreta pyrãk o

mê apê Ijaew kêt xwÿnhjê nhîpêx nê mê amã amnhî to amnhîrît. Ka mê ra amnhî kaxyw Jejus mã ajamexpêr nê hkôt amnhî xunhwÿ nhũm Tîrtũm mê ato mex nê.

18Tã kêr ka mê arî Ijaew o mex o ri apa. Tanhmã ri mê hipêx to mã ajamexpêr to hkêt nê. Rÿ ajamexpêr o:

— Nã ãm hãmri na Tîrtũm mê hkaga nê ãm kãm mê papxipixjê japê.

Anhÿr o ajamexpêr kêt nê. Ijaew te ixkre kapem pî hpàr mexta pyræk. No mê kajaja te mê ate akunî rũm pî hpa kot ixkre kapem pàr mex pix kukwak ri htîr nê hã hariirta pyræk. Kêt akunî rũm pî hpa jakàr kukwak ri na hte ixkre kapem pàrta htîr nê kuhê hkêt nê. Kop apu pàrta mex kêt ronhÿx ra akunî rũm hpaja grà pa. Ja pyrà nê Ijaew kukwak ri kot kaj mê nhÿrmã Tîrtũm ri atîr tũm nê apa ho apa. Jakamã kwa kêr ka mê ate amnhî to rũnh o mê hakrenh ã amnhî to jarkrar kêt nê. 19Mãn ka mê atô ajamexpêr o:

— Ra Tîrtũm kot Ijaew kaga nê hpãnhã mê pajaja mê ixto hkra jakamã mãn kãm mê ijapê ho mê hakre. Ra mê hpãnhã mê ixto hkra kênã. Anê.

20Nã ãm hãmri na pre Tîrtũm Ijaew kwÿ kaga. Mê kot Jejus kôt amnhî xunhwÿr kêt mÿrapê na pre te mêmo pî hpa jakàr nê rênhta pyræk o mê hipêx. Ka mê ra mê kurom amnhî kaxyw hkôt ajamexpêr jakamã nhũm Tîrtũm te kot akunî kamã pî hpa jakàr nê ho htêm nê ixkre kapem pî hpàr mex ã hanhôr nê hã hkaxpre pyræk o mê anhîpêx. Nom kwa kêr ka mê ja hã amnhî pumu nê ri hã Ijaewjê mã amnhî to jarkrar kêt nê. ãm amnhî to mex nê Tîrtũm kapêr kôt amnhî nhîpêx mex o ri apa. No kot kaj mê ã amnhî nhîpêx anhÿr kêt nhũm amnhî tã mê apumu nê ra kot Ijaew kwÿ nhîpêxta pyrà nê tanhmã mê ato nê mê akaga.

21 ã Ijaew jarênh kot anhÿr. Te mê kêp pàr mex pyræk. Tã nhũm mê kot Jejus kôt amnhî xunhwÿr kêt jakamã nhũm Tîrtũm te kot pî hpa jakàr nê rênhta pyræk o mê hipêx nê mê homnuj nê. Kot kaj mê uræk nê ã amnhî nhîpêx anê nhũm mã mê ato anê nê. 22Ijaew kot Jejus kôt amnhî xunhwÿr kêt jakamã nhũm Tîrtũm mê hpãnhã mê apê Ijaew kêt xwÿnhjê mã amnhî to amnhîrît. Tã ka mê Ijaew rom amã Jejus prãm nhũm Tîrtũm ja hã mê apumu nê amnhî pyrà nê kãm mê aprãm nê mê akamã ukaprî rãhã nê pa ho pa. Tã kwa mê okora. Kêr ka mê hkôt pix mã amnhî nhîpêx o ri apa rãhã ty. Kot kaj mê hkaga nhũm amnhî tã mê apumu nê te Ijaew kot hkaga xwÿnhjê nhîpêx pyræk o mê anhîpêx nê mê akaga.

23Koja Ijaew nhÿrmã Jejus kôt amnhî xunhwÿr japêr nhũm Tîrtũm ja hã mê omu nê mê ho hkra. Te mê kot pàr pa jakàr nê rênh nhũm grà par xwÿnh nhũm kot akupÿm amnhîm hamÿnh nê ixkre kapem pàr wÿr o htêm nê akupÿm hã hanhôr nê hã hkaxpre ho htÿx nhũm kukwak ri akupÿm htîrta pyræk. Ja kêp tanhmã kute hkêt. Kot ã hipêx anhÿr kaxyw

àhpumunh tỳx. **24**Mê apê Ijaew kêt xwỳnhjaja te mẽ ate akunĩ kamã pi hpa jakàr nê ixkre kapem pàr ã hanhôr nê hã kaxpreta pyràk. Jao Jejus kôt amnhĩ xunhwỳ nhũm mẽ ato hkra kurê kumrêx. No Ijaew te mẽ kêp ixkre kapem pàrta pyràk jakamã Tĩrtũm kot akupỳm hanhôrta tanhmã kêp kute hkêt. Kêp Tĩrtũm kênã kot tanhmã kêp kute. Jakamã koja mẽ hkôt amnhĩ xunhwỳ nhũm amnhĩ tã mẽ omu nê mẽ ho hkra kurê kumrêx.

Tĩrtũm kot mẽ piitã mẽ kamã ukapri hã harênh

Matêwre 23.37-39; Rukre 21.24; Juãw 10.16

25E kot paj mẽ amã mẽmoj to amnhĩrit ka mẽ inhma. Nà na pa ra mẽ amã Ijaew krã xihtỳx xwỳnhjê jarê ka mẽ harênh ma. Ra mẽ kot Jejus kaga hã mẽ harênhja. Tã koja mẽ ã amnhĩ nhĩpêx anhỳr o pa rãhã hkêt nê. Na hte Tĩrtũm kormã amnhĩ tã mẽ apê Ijaew kêt xwỳnhjê jamãr o pa. Amnepê m na pre amnhĩ kaxyw mẽ akukamã tanhmã mẽ akwỳjê jarênh to. Tã kot kaj mẽ kot tanhmã mẽ ajarênh to xwỳnh piitã Jejus kôt amnhĩ xunhwỳr pa nhũm rĩ Ijaew amnhĩ to hapu nê kormã hkôt amnhĩ xunhwỳ. ã mẽ kot amnhĩ nhĩpêx anhỳr kaxyw. Jakamã kwa kêr ka mẽ ri ja hã amnhĩ to jarkrar o ri mẽ hkôt apa hkêt nê. Mẽ pahpyrà nê mẽ kot Jejus kôt amnhĩ xunhwỳr mã xwỳnh kênã. **26**Koja Tĩrtũm nhỹrmã Ijaew piitã ho hkra. Kapêr ã kagà htũm kot mẽ harênh kot:

Nhỹrmã kot mẽ ate amnhĩ tomnuj pê mẽ apytàr mã xwỳnhja
Ijaew õ koja.

Jako hkanrêhã htãmnhwỳjê hõ koja.

Koja nhỹrmã wrỳ nê mẽ ate amnhĩ tomnuj pê mẽ apytã nê mẽ
ate amnhĩ tomnuj o hapêx pa. Anê.

Anhỳr o kot harênh. **27**Nê mããnên ja:

Kot paj mẽ nê mẽ kot amnhĩ tomnuj o ijapêx pa.

Amnepê mã ixte mẽ hkukamã mẽ hã amnhĩ jarênh xà hkôt. Anê.

28Nom arĩ mẽ kãm Jejus mar prãm kêt jakamã te mẽ kot kutã amnhĩ xunhwỳr pyràk o amnhĩ nhĩpêx. Tã ã mẽ kot amnhĩ nhĩpêx anhỳrja ri ka mẽ kamjaja mẽ hpãnhã mẽ apê Tĩrtũm kra. Nom nhũm Tĩrtũm arĩ kãm mẽ hapêê. Na pre amnepê mã kot tanhmã mẽ ho mex to hkukamã tanhmã mẽ hã amnhĩ jarênh to. Mẽ hpàr kraxjê mã tanhmã mẽ hã amnhĩ jarênh to. Finat Apraãw mẽ Ijak mẽ Jakoja mã mẽ hkanrêhã mẽ htãmnhwỳjê hã tanhmã amnhĩ jarênh to.

29Na hte Tĩrtũm mẽmoj tã tanhmã amnhĩ jarênh to nê ãm hãmri hã amnhĩ jarê nê amnhĩ jarênh xà hkôt tanhmã hipêx to. No na hte mẽmoj tã amnhĩ jarênh tã gaa nê ho hamakêtkati hkêt nê. Rỳ hpãnhã axtem tanhmã hipêx to hkêt nê. Na hte mẽmoj tã amnhĩ jarênh xà hkôt tanhmã hipêx to. Tã ra amnepê mã kot Ijaew o mex ã amnhĩ jarênh jakamã koja nhỹrmã mẽ ho mex rax nê ã mẽ hipêx anhỳrja o hamakêtkati hkêt nê.

30No mẽ kajaja mẽ apê Ijaew kêt xwÿnhjaja. Amnepêm na ka prem ajaxwÿja Tirtũm kôt amnhĩ nhĩpêx kêt nê. Tã nhũm mẽ akamã ukapri nê kãm mẽ ajapê nê. Ka mẽ ra harênh ma nê hkôt amnhĩ xunhwÿ nê hkôt amnhĩ nhĩpêx mex nê. No ãm Ijaew kukwak ri. Mẽ kot kapêr kôt amnhĩ nhĩpêx o pa hkêt jakamã nhũm Tirtũm mẽ hpãnhã nhãm mẽ amã amnhĩ to amnhĩrit nê mẽ ato mex rax nê. Jakamã te Ijaew kukwak ri mẽ amex nê ri mẽ apa pyræk. 31Tã koja nhÿrmã kot mẽ anhĩpêxta pyrã nê Ijaew ho hkra. Nê mẽ apyrã nê mẽ kamã ukapri nê. Mẽ kot mẽ apyrã nê amnhĩ kaxyw Kra hkôt hamaxpêr xwÿnhjaja nhũm mẽ apyrã nê mẽ ho hkra nê mẽ ho mex nê. 32Mẽ apê Ijaew kêt xwÿnhjaja nê mẽ ixpê Ijaew mẽ pahte xepên pyræk. Na pu htem pahpiitã Tirtũm kapêr piitã hkôt amnhĩ nhĩpêx rãhã ho ri papa hkêt nê. Tã kot puj mẽ tee ri ja hã amnhĩ pumu nê amnhĩ to kuwÿ nhũm mẽ pama nê amarĩ mẽ pakamã ukapri nê mẽ pahto mex nê.

Pawre kot Tirtũm mex o mex ã harênh
Epes 3.20; Korosê 1.16; Wam Korit 2.9, 2.16

33Tirtũmja àhpumunh tÿx o àhpumunh tÿx. Nê ukapri ho ukapri nê mex o mex. Mẽ pahtõ na pu uræk nê ã amnhĩ nhĩpêx anhÿr o papa? Nà amrakati kumrêx. Nê mẽ pahtõ na pahte Tirtũm jamaxpêr kôt omunh? Nà mẽ pahte hamaxpêr kôt omunh kêt. 34Kapêr ã kagã htũm kot ja jarênh kot:

Mẽ pahte Tirtũm jamaxpêr kôt omunh kêt.

Nê kot pu mẽ pahtõ mẽmoj tã hakre hkêt nê.

Mẽ parom àhpumunh o àhpumunh xwÿnh kênã.

35 Nê mẽ pahtõ kot puj we kãm pakapêr nê kãm: “Kwa Tirtũm. Ra ixte amã mẽmoj nhõrta pãnhã kwa amnhĩ xwar inhmã mẽmoj gõ.” Anê.

Nà mẽmoj piitã õ kênã kot puj kêt ri ã kãm mẽmoj nhõr ã amnhĩ jarênh anê. Anê.

36Tãm na pre amnhĩ kaxyw mẽmoj piitã ho kator pa. Nê ãm pix kukwak ri na mẽmoj piitã htir nê pa. Jakamã kwa pu mẽ kãm mex o mex ã mãn harênh rãhã ho ri papa.

Mẽ pahte Tirtũm mã amnhĩ nhõr ã mẽ pajarênh
Wam Korit 6.20; Epes 4.1; Piripos 4.8-9; Korosê 1.10;
Wam Tesarõn 4.1-3; Wam Pêtre 2.11

12 1Kwa Jejus kôt ixkwÿjaja. Tirtũm na hte mẽ pahto mex nê mẽ pakamã ukapri rãhã jakamã na pa ã mẽ amã ixkapêr anê. Kwa mẽ tokyx kãm amnhĩ jarê nê kãm amnhĩ gõ. Te mẽ ate kãm hkĩnh xà nhõr pyræk o amnhĩ nhĩpêx nê kãm amnhĩ gõ. Jao mẽ amã kapêr kôt pix mã amnhĩ nhĩpêx o ri apa hprãm ã kãm amnhĩ jarê. Nê kãm hprãm xà

hkôt pix mã tanhmã amã amnhĩ nhĩpêx to ho ri apa hprãm ã kãm amnhĩ jarê. Kot kaj mẽ ã kãm amnhĩ jarênh anê nhũm amnhĩ tã mẽ ama nê hkĩnh nê. ã mẽ pahte kãm amnhĩ jarênh anhỹrja na kãm mar prãm.

2Nê kêr ka mẽ kãm Tĩrtũm prãm kêt xwỳnhjaja kot amnhĩ nhĩpêx o ri amnhĩ nhĩpêx o ri apa hkêt nê. Nê mẽ amnhĩ to Tĩrtũm mãn wỳ kê mẽ amã mẽ ajamaxpêr mex jagjê. Koja mẽ ama nê mẽ amã hagiê ka mẽ ra aprĩ hã hamaxpêr xà hkôt mẽ pahte amnhĩ to mex xà pumunh mex nê. Na pu htem hkôt amnhĩ nhĩpêx o ri papa nhũm amnhĩ tã mẽ pahpumu nê hkĩnh nê. Pu mẽ pajaxwỳja ỹ hã pahkĩnh nê ri papa.

Kris kwỳjaja kot tanhmã axpên nhĩpêx to hã mẽ kãm karô

Rômãn 12.1-11; Epes 4.11-16; Wam Pêtre 4.10-11

3Nê na pre Tĩrtũm ixto mex nê. Nê mẽ akaxyw ixãm. Ixte mẽ amã Kra Jesus kot tanhmã mẽ panê amnhĩ nhĩpêx to hã harênh o ri mẽ akôt ixpa kaxyw. Tã na pa ã kagàja kamã mẽ amã harênh anê.

Jakamã kwa kêr ka mẽ amnhĩ to jarkrar o ri mẽ kãm apa hkêt nê. ãm kwarĩ ho kwarĩ. Rỳ atỳx ri ajamaxpêr o:

— Nà pa na ixte amnhĩ to mex o ixte ixkwỳjê piitã mẽ hakrenh par.

Anhỹr ã amnhĩ to jarkrar o ri mẽ hkôt apa hkêt nê. Kêt mẽ ãm amnhĩ jarênh o:

— Na pa pre amnhĩ kaxyw Jesus kôt ijamaxpêr nhũm Tĩrtũm ixpumu nê ixto hkra. Jakamã na pa hte Jesus Kris pix kukwak ri tãm amnhĩ nhĩpêx o ri ixpa. No amnhĩ krã hkôt ã amnhĩ nhĩpêx anhỹr kêt nê. Anê.

4E pa mẽ amã mẽmoj jarê ka mẽ inhma. Nà mẽ panhĩja pyxi htã kamã mẽmoj xohtôô. Na kamã mẽ pano nê mẽ pajakwa. Nê kamã mẽ pajamak nê mẽ pahte. Na pu htem mẽ pano ho rĩt nê mẽ pajakwa ho pakapêr. Nê mẽ pajamak o ri ama nê mẽ pahte ho ri mra. 5Ja pyrã nê Kris kôt mẽ pahte amnhĩ xunhwỳr xwỳnhja ãm pyxi tã hkôt mẽ pahte amnhĩ xunhwỳr xwỳnhjaja mẽ paxohtôô. Jakamã na pu htem ahpỳnhã tanhmã axpên to mex to ho ri papa. Jao Kris kôt axpên to pahtô nê pahtôx o papa.

6Tĩrtũm na hte mẽ pahpê hkwỳ hã ahpỳnhã mẽ pamã tanhmã mẽmoj tã karô to nê kaxyw mẽ pahto mẽ paxihtỳx. Tã kêr pu mẽ ra kot mẽ pamã mẽmoj tã karô xà hkôt kãm amnhĩ nhĩpêx rãhã ho ri papa. Jakamã koja mẽhõ ate Tĩrtũm kapêr jarênh o ri apa kaxyw axãm nê amã anê ka Tĩrtũm kamnàr rom mẽ kãm kapêr jarênh mex o ri mẽ hkôt apa.

7 Rỳ ate akwỳjê mã tanhmã axàpênh to ho ri apa kaxyw axãm ka mẽ kãm axàpênh mex o ri mẽ hkôt apa.

Rỳ ate Tĩrtũm kapêr ho mẽ ahkre ho ri apa kaxyw axãm ka ho mẽ ahkre mex o ri apa.

8 Rỳ ate Tĩrtũm kapêr o ri Jesus kôt mẽ akwỳjê jamaxpêr o hihtỳx o ri apa kaxyw axãm ka mẽ kãm kapêr jarênh pê mẽ ho mẽ hihtỳx mex o ri mẽ hkôt apa.

Rỳ ka mẽ atõ akukrêx rax japêr nê ate mẽ kêp amrakati xwỳnhjê mã mẽmoj nhõr o ri apa kaxyw axãm ka axãmnhĩx ri mẽ kãm mẽmoj nhõr o ri mẽ hkõt apa.

Rỳ ate akwỳjê ho amnhĩptàr kaxyw axãm ka mẽ ho amnhĩptàr mex o ri apa.

Rỳ ate tanhmã mẽ akwỳjê ho mex to nê mẽmoj to mẽ kutã anojarêr o ri apa kaxyw axãm ka akĩnh kãm ã mẽ hipêx anhỹr rãhã ho ri apa nê tanhmã akapêr punuj to hkukamã ri ajamaxpêr o ri mẽ hkõt apa hkêt nê.

9Nê kêr ka mẽ apiitã amã axpên kĩnh kãm axpên to mex rãhã ho ri apa nê ri axêx rom amã axpên kĩnh ã amnhĩ jarênh o ri apa hkêt nê. Nê mẽ kot amnhĩ tomnuj xà piitã hkaga hpa nê hpãnhã mẽ kot amnhĩ to mex xà pix pyr tỳx nê hkõt amnhĩ nhĩpêx rãhã ho ri apa. 10Nê mẽ apê Kris kwỳ hã amã axpên kĩnh kãm tãm axpên nhĩpêx o ri apa. Nê mẽ akwỳjaja mẽ kot amnhĩ to mex xwỳnh ã mẽ harênh o ri mẽ hkõt apa. No mẽ ri atỳx ajamaxpêr o:

— Nà koja mẽhõ ixkumrêx ixte tãm amnhĩ nhĩpêx xwỳnh ã ijarê pa rĩ kormã amnhĩ xwar tãm kot amnhĩ nhĩpêx xwỳnh ã harê.

Anhỹr o ajamaxpêr kêt nê. Kêr ka akumrêx tãm kot amnhĩ nhĩpêx xwỳnh ã harê.

11Nê kêr ka mẽ Tĩrtũm mã mẽmoj to anhỹr kaxyw nê kamã amã kaga hkêt kãm tanhmã kãm mẽmoj to ho ri apa. Jao akĩnh kamã kãm ho anhỹr mex nê. 12Nê mẽ nhỹrmã Tĩrtũm kot kaxkwa kamã mẽ ato mex rax kukamã ajamaxpêr nê akĩnh rãhã kãm mẽmoj to anhỹr o ri apa.

Nê kêr ka mẽ tanhmã amnhĩ to rỳ nhũm mẽhõ tanhmã mẽ ato ka mẽ akaprĩ nê ri apa htã no ãm tee ri amnhĩ kukamã ajamaxpêr o Tĩrtũm kaga hkêt nê. Arĩ amnhĩ to hwỳr rãhã ho ri apa. 13Nê koja Kris kõt atõjê hõ kêp amrakati ka mẽ ja hã omu nê anhõ mẽmoj japêr nê mãmri kãm hkwy gõ. Nê amnhĩ wỳr awỳ nê tanhmã ho mex to.

14Nê mẽ kot tanhmã mẽ atomnuj to xwỳnhjaja kêr ka mẽ amnhĩ tã mẽ omu nê agryk nê wajaga kot tanhmã amã ho kaxyw hwỳr atêm nê kãm tanhmã hã axãmnhênh to hkêt nê. Kêt ãm ho Tĩrtũm pix wỳ nê kãm:

— Pa mẽ ijamãr mex xwỳnh maati. Nà na ixkwỳjê hõja ã inhĩpêx anê. Tã nom kêr ka ixtã tanhmã homnuj to hkêt nê. ãm tanhmã ho mex to.

Anhỹr o mãn mẽ ho awỳ.

15Nê koja akwỳjê hõ mẽmoj tã hkĩnh nê. Ka omu nê urak nê ã hã



Rômãn 12.14

akĩnh nê. No koja mẽmoj tã hkaprĩ nê mỳr o nhỹ ka omu nê ra uràk nê ÿ hã akaprĩ nê.

16Nê kêt ka mẽ piitã mẽ hipêx o axpên pyràk o ri apa. Te mẽ ate amnhĩ to rax o akwỳjê jakrenh o te mẽmoj kamã akahak o amnhĩ nhĩpêx pyràk kêt nê. Nê axàhpumunh tỳx o ate mẽ piitã mẽ hakrenh par pyràk o ri amnhĩ nhĩpêx o ri apa hkêt nê.

17Nê koja mẽhõ tanhmã ato htã ka ãm amnhĩ tã omu nê tanhmã amnhĩ tã ho hkêt nê. Nê mẽ piitã mẽ noo mã tãm ri amnhĩ nhĩpêx o ri apa.

18-19Nê kêt ka mẽ tãm ri axpên mã akapêr rãhã ho ri apa.

Nê kot kaj akràmnhwỳ mẽ wa tanhmã axpên nhĩpêx to. Hãmri ka wa akupỹm tãm axpên xãm kaxyw kãm akapêr tã nhũm ama nê ãm ama nê akaga. Ka ãm amnhĩ tã omu nê kamã agryk kêt nê. Koja Tĩrtũm tãm tanhmã atã ho. Kapêr ã kagà htũm kot ja jarênh kot:

Kêt ka mẽ amnhĩ tã tanhmã kot ato xwỳnh to hkêt nê. Pa kot paj mẽ atã tanhmã ho. Anê.

Nê harênh kot:

20 Kêt ka mẽ amã mẽ kãm mẽ akurê xwỳnhjê o mex pix o ri apa.

Kê mẽ kãm prãm ka ja hã mẽ omu nê mẽ kamã axukaprĩ nê mẽ kãm mẽmoj kwỳ gõ kê mẽ kuku.

Rỳ nhũm mẽ kãm kôr ka mẽ kãm gô hkwỳ kê mẽ ho ixkõ.

Kot kaj mẽ ã amnhĩ tã mẽ hipêx mex anê nhũm mẽ tee ri amnhĩ tã mẽ apumu nê amnhĩ kamã hpijaàm jao mẽ atã amnhĩ kamã gryk nê. Anê.

21Nom kot kaj mẽ amnhĩ tã tanhmã mẽ homnuj to hãmri nê ajaxwỳja uràk nê amnhĩ tomnuj nê. Ja pymaj kêt ka mẽ amnhĩ rom tãm mẽ hipêx. Hãmri nhũm mẽ amnhĩ tã mẽ apumu nê mẽ apyrà nê tãm mẽ anhĩpêx japêr.

E kêt ka mẽ ã axpên nhĩpêx o ri apa anê.

Mẽ pahto amnhĩptàr xwỳnhjê jarênh

Matêwre 22.21; Xitre 3.1; Wam Pêtre 2.13-17

13 1Nê kêt ka mẽ kot mẽ ato amnhĩptàr xwỳnhjê kapêr ma nê kapêr kôt ri amnhĩ nhĩpêx rãhã ho ri apa. Tĩrtũm kot mẽ pakaxyw mẽ unhwỳr kênã. Mẽ kot mẽ pahto amnhĩptàr o pa kaxyw na hte mẽ unhwỳ. 2Jakamã koja mẽhõ mẽ kapêr ma nê ãm kuma nê hkôt amnhĩ nhĩpêx kêt nê hãmri nê te kot Tĩrtũm kapêr mar nê ãm mar pyràk o amnhĩ nhĩpêx. Hãmri nhũm Tĩrtũm tee ri ja hã omu nê nhỹrmã tanhmã hã ho.

3Xà na hte tãm mẽ kot amnhĩ nhĩpêx xwỳnhjaja kãm mẽ kot mẽ ho amnhĩptàr xwỳnhjê puma ho pa? Nà na htem kãm mẽ uma hkêt kãm ri pa. ãm mẽ kot amnhĩ tomnuj xwỳnh pixjaja na amnhĩ kamã kãm mẽ

uma ho pa. Tã ka mẽ amã mẽ kot mẽ ato amnhĩptàr xwỳnhjê pyna hprãm kêt xwỳnhjaja kêt ka mẽ kapêr ma nê hkôt amnhĩ nhĩpêx kê amnhĩ tã mẽ apumu nê hkĩnh nê. Nê amnhĩm mẽ ate amnhĩ to mex xwỳnh ã mẽ ajarê. 4Tĩrtũm nhỹ hã mẽ panhõ pahi kot mẽ pahto amnhĩptàr jakamã na htem mẽ kãm mẽ pahto mex prãm nê. Nê kot pu mẽ pahtõ axtem nê tanhmã amnhĩ tomnuj to hãmri nhũm tee ri ja hã pajarênh ma nê tanhmã hã mẽ pahto. ãm hãmri na hte ã mẽ pahto amnhĩptàr xwỳnhjaja mẽ panhĩpêx anê. Tĩrtũm kãm hprãm xà hkôt. 5Jakamã kwa mẽ kapêr ma nê hkôt ri amnhĩ nhĩpêx mex rãhã ho ri apa. Nom amã kot tanhmã ato pix pymaj hkôt ri amnhĩ nhĩpêx kêt nê. Mããnên ã amnhĩ kukamã ajamaxpêr anê nê ajamaxpêr o:

— Nà Tĩrtũm kot mẽ ixkaxyw unhwỳr jakamã na pa hte kapêr ma nê hkôt amnhĩ nhĩpêx mex o ri ixpa.

Anhỹr o ajamaxpêr.

6Nê mẽ pahto amnhĩptàr xwỳnhjaja kot Tĩrtũm nhỹ hã tanhmã mẽ panhĩpêx to ho pa jakamã na pu htem mẽ àpênh pãnhã mẽ kãm amnhĩre. Mẽ pahpiitã axpên kaxyw kãm kàxpore ho hkryre nê kugõ. Tanhmã kot ho mẽ pamã mẽmoj to mex to kaxyw. 7Jakamã kêt ka mẽ hã apijaàm o ri apa kamã mãmri mẽ kãm kàxpore hkwỳ ho hkryre nê òr o ri apa. Mẽ kot hã àhwỳr xà hkôt.

Mẽ pahte tanhmã axpên nhĩpêx to hã mẽ pamã karõ

Matêwre 22.39-40; Karatas 5.13-15; Wam Juãw 3.11-24

8Nê kêt ka mẽhõ ho tewên japêr nê tokyx kãm amnhĩre. Nê mẽ amã axpên kĩnh o aa ho ajamakêtkati hkêt nê. Jao mẽmoj to axpên kutã anojarêr rãhã ho ri apa. Kot kaj mẽ ã axpên nhĩpêx anê nê Tĩrtũm kapêr piitã hkôt amnhĩ nhĩpêx mex o ri apa.

9Amnepê mã na pre finat Mojesja Tĩrtũm nhỹ hã Ijaew mã mẽmoj tã karõ nê mẽ kãm:

Kêr ka mẽ aprõ pix tãnopxa nê nhãm mênijê hõ kamã ri akurê ho apijaàm kêt o apa hkêt nê.

Nê mẽ anijaja mẽ amjên pix tãnopxa nê nhãm ri mẽmyjê hõ kamã akurê ho apijaàm kêt o ri apa hkêt nê.

Nê mẽ ri axpên par kêt nê.

Nê mẽ ri axpên pè axàhkĩnh o ri apa hkêt nê.

Nê mẽ amã ri axpên kukrêx kĩnh o ri amã ho anhõ hprãm o ri apa hkêt nê. Anê.

Nê mããnên ja:

Kêr ka mẽ nhãm mẽ axpên nhĩpêx o te ka amã amnhĩ tã ma pyrãk. Jao tãm axpên nhĩpêx o ri apa. Anê.

ã kot mẽ kãm hã karõ kot anhỹr. Kot puj mẽ ã pamã pahkwỳjê kĩnh anê nê mããnên wam finat Mojes kot mẽmoj tã mẽ panhĩgêjtê mã karõ hkôt

amnhĩ nhĩpêx o ri papa rãhã nê. Jao axpên par kêt nê. Nê axpên pê paxàhkĩnh kêt nê. Nê axpên kutã panojarêr rãhã nê. **10**Koja mēhō kãm amnhĩ tã ma pyrãk o hkwyjê nhĩpêx nê mẽ ho mex pix o pa. Jakamã kot kaj mẽ amã ri axpên kĩnh nê mẽmoj to axpên kutã anojarêr pix nê. Jao Tĩrtũm kapêr piitã hkôt amnhĩ nhĩpêx mex o ri apa.

11Amnepê mã mẽ pahte amnhĩ kaxyw Jejus kôt pajamaxpêr xà hã arĩgrota ã na pre kormã akupỹn mẽ pahwyr hpôx xà hã arĩgro kormã hwyr awry rax nê. Tã ra hwyr ahtêp o mō. Koja tokyx akupỹn mẽ pahwyr wrỹ nê ma akupỹm kaxkwa hwyr mẽ pahto api. Jakamã kwa kêr pu mẽ arĩ hamãr rãhã ho ri apa. Jao tanhmã amnhĩ tomnuj to kaxyw nê pajamaxpêr o:

—Kwa koja Jejus tanhmã amnhĩ to nê jarãhã akupỹn wrỹk japêr. Tã kot pa ri ã amnhĩ nhĩpêx anê nhũm wrỹ nê tee ri ja hã ixpumu pa amnhĩ kamã ixpijaam tỳx nê. Nà kot paj ã amnhĩ tomnuj anhỹr kêt nê. Anê.

Hãmri nê Jejus kamã ajamak pê kutêp Tĩrtũm kapêr kôt pix mã ri amnhĩ nhĩpêx mex rãhã ho ri papa.

12Na pu htem kamàt kãm gôr nê arĩgro jamãr pê kamã pajamak o panhĩkwỹ. Arĩgro te kêp Jejus akupỹn wrỹk pyrãk. Jakamã kwa pu mẽ kamã pajamak pê kãm panojarêr rãhã ho ri papa nê amnhĩ nê tanhmã mẽ omnu xà kute pumunh mex o ri papa. Te ho pōristi kot amnhĩ nê mẽ kot kãm mẽ hkurê xwỹnhjê pumunh mex pyrãk o Jejus kutêp tãm amnhĩ nhĩpêx o ri papa. Na pre tanhmã mẽ pahkrã hto pu mẽ ỹ hã tãm ri amnhĩ nhĩpêx. Tã kêr pu mẽ arĩ ã amnhĩ nhĩpêx anhỹr o ri papa nê te mẽ pahte arĩgro hã mẽ pa xwỹnhjê kot amnhĩ nhĩpêx pyrãk o amnhĩ nhĩpêx. **13**Kot puj mẽ ã amnhĩ nhĩpêx anê nê mẽ piitã mẽ noo mã tee ri tanhmã mẽ pahte amnhĩ tomnuj to mã pajamaxpêr kêt nê. Jao amnhĩ kamã pahpijaam nê ri papa hkêt nê. Nê pajamakêtkati nê paxàmnhĩx ri papa. Te ho hirã kamã ri mẽ pa xwỹnhjê kot amnhĩ nhĩpêx pyrã nê ãm ri paxàmnhĩx tãm amnhĩ nhĩpêx o ri papa.

Nê mẽ pahprō pix tânopxar o ri papa.

Nê mẽ pahpipãnh nê ri papijapu ho ri papa hkêt nê.

Nê mẽmoj tã axpên mã paxàkjêr hkêt nê.

Nê mẽmoj tã axpên kãm pagryk kêt nê.

14Nom kot puj mẽ axtem nê ã amnhĩ tomnuj anê nê mẽ pahte amnhĩ nhĩpêx tũm kôt pix mã amnhĩ nhĩpêx. Tã kêr pu mẽ ã amnhĩ nhĩpêx anhỹr pumaj hpãnhã amnhĩ to Pahihti Jejus Kris wỹ nê kãm:

—Pa Jejus. Nà kormã jar apa ri na ka pre mẽ kot tanhmã amnhĩ tomnuj to kutã axihtỳx o axihtỳx nê aa tanhmã amnhĩ tomnuj to hkêt nê. Tã inhmã apyrã nê ixte amnhĩ tomnuj kutã ixihtỳx o ixihtỳx o ixpa hprãm. Anê.

Jao mẽ pajamaxpêr tũmja te ra kot amnhĩ tã mẽ pahto htỳx kêt pyrãk o pu mẽ amnhĩ nhĩpêx o ri papa.

Mě pahte Kris kôt pahkwỳjê mã paxàkjêr kêt ã mẽ pamã karõ

Matêwre 7.1-5; Römãn 2.1; Wam Korõt 10.23-33; Xiakre 4.11

14 ¹Ně koja mēhõ kormã Jejus kôt amnhĩ xãm nyw ri kormã hkõt hamaxpěr tohtuj aně. Hãmri nē htỳx tanhmã hamaxpěr to nē mẽmoj mex kaga. Ka mẽ ja hã omu nē ãm omu nē hã tanhmã kãm nē hkêt nē. Kwār mãmri ã amnhĩ nhĩpêx aně. Koja gaa nē rĩ hprĩ hã Tĩrtũm kapěr mar tỳx nē hãmri nē hkõt mẽmojta pumunh mex nē. ²Jakamã koja Jejus kôt akwỳjê hõ mẽ apkur xà piitã hkur pymaj tanhmã hõ kute hã harě nē hkaga nē hamaxpěr o:

— Nà kot pa ja hkur kêt nē. Kot pa apu kuku nē hkur o amnhĩ tomnuj nē. Aně.

Kwār mãmri ã hamaxpěr aně nē hkur kêt nē. Nom mẽ pahte Jejus kôt amnhĩ xunhwỳr tỳx xwỳnhjaja na pu htem paxãmnhĩx Jejus kamnàr rom mẽmoj piitã kuku. Nom mẽ pahkĩnhã ham mẽ kot hkõt amnhĩ xunhwỳr xwỳnhjaja kormã kapěr piitã mar kêt jakamã kwār mẽ mãmri aně nē mẽmoj kur kêt nē. ³Nom kër ka mẽ ri tanhmã hã mẽ kãm akapěr to hkêt nē. Rỳ mẽ kãm:

— Kwa mẽ ixpyrà nē mẽmoj piitã aku.

Anhỳr o mẽ kãm akapěr kêt nē. Ano ho ãm hã mẽ omu.

Ně mẽ ate mẽmoj piitã hkur kêt xwỳnhjaja kêt ka mẽ ajaxwỳja mẽ ixte mẽmoj piitã hkur ã tanhmã mẽ inhmã axàkjêr to hkêt nē. Mě ixte mẽmoj piitã hkur o ixpa hã mẽ ixpumu nē ãm hã mẽ ixpumu nē hã tanhmã mẽ inhmã axàkjêr to hkêt nē. Rỳ hã mẽ inhmã:

— Kwa nà kot kaj mẽ ja kur o amnhĩ tomnuj nē.

Anhỳr o hã mẽ inhmã akapěr kêt nē. Ano ho ãm ja hã mẽ ixpumu. Mě pahte ahpỳnhã tanhmã paxàpkur to htã Tĩrtũm kot mẽ pahte Kra Jejus kôt amnhĩ xunhwỳr xwỳnh piitã mẽ pahto hkra kênã. ⁴Jakamã kwa mẽmoj tã tanhmã axpẽn mã axàkjêr to ho ri apa hkêt nē. Koja Kris kôt atõjê hõ axtem tanhmã hamaxpěr to ka mẽ tee ri ja hã omu nē tanhmã hã kãm nē hkêt nē. Rỳ ajamaxpěr o:

— Tk. Na hte ã ri amnhĩ nhĩpêx anhỳr o pa. Ja omnuj. Pa na pa hte ã amnhĩ nhĩpêx anhỳr kêt nē.

Anhỳr o ri axpẽn kukamã ajamaxpěr hkêt nē. Mě pahpê Tĩrtũm kêt kênã kot pu kêt mẽ ã ri axpẽn kukamã pajamaxpěr aně. Tĩrtũm pix na hte tanhmã mẽ pajarěnh to xwỳnh. Àhpumunh o àhpumunh xwỳnh jakamã koja tanhmã mẽ hkrã hto nhũm mẽ rĩ kormã tãm hamaxpěr pẽ ãmnhĩx ri tanhmã amnhĩ nhĩpêx to ho pa.

⁵Ně koja Jejus kôt atõjê hõ mẽmo arĩgromnu jarě nē hã àpěnh kêt nē. Ka mẽ apê hkwỳjaja tee ri ja hã omu nē ajamaxpěr o:

— Nà arĩgro piitã mẽ pamã mex kênã. Kot paj mãmri arĩgro piitã hã apê.

Anhÿr o ajamaxpër japêr. Nom kêr ka mẽ ja hã axpên mã tanhmã axàkjêr to hkêt nê. Na pu htem ahpÿnhã pamã tanhmã mẽ pahte amnhĩ nhĩpêx to hprãm xà hkôt tanhmã amnhĩ nhĩpêx to. No tanhmã ri hã axpên mã paxàkjêr to ho ri papa hkêt nê. 6Kêt mẽ kot arĩgromnu jarênh xwÿnhjê mẽ mẽ pahte arĩgro piitã mex ã harênh xwÿnhjaja mẽ pahpiitã mẽ pahpê Tirtũm kraa. Jakamã mẽ pahpiitã na pu htem pajamaxpër o:

—Na pa hte Tirtũm kãm hprãm xà hkôt ã amnhĩ nhĩpêx anhÿr o ri ixpa. Anê.

Nê mẽ pahte mẽmoj piitã hkur xwÿnhjaja nê mẽ kot mẽmoj kwÿ hkur kêt xwÿnh piitã mẽ pahpê Tirtũm kraa. Mẽ pahpiitã mẽ pamã kãm hprãm xà hkôt amnhĩ nhĩpêx prãm jakamã na pu htem paxàpkur kaxyw nê Tirtũm mã amnhĩ jarê nê kãm:

—Pa mẽ ijamãr mex xwÿnh maati. Nã ãm hãmri na ka hte apkati mẽ mẽ inhmã mẽ inhõ ho apa. Amex o amex Tirtũm.

Anhÿr o kãm amnhĩ jarê. Hãmri nê kormã hkamnàr rom paxàmnhĩx ri tanhmã mẽõ kuteta ku. 7-8Mẽ pahpê Tirtũm kra jakamã na pre ra mẽ pakukamã tanhmã mẽ pajarênh to. Mẽ pakukamã pahtyk ã arĩgro jarê nê mẽ pahte pahtĩr ri tanhmã ri amnhĩ nhĩpêx to ho papa hkukamã hamaxpër. No mẽ papajaja na pu htem amnhĩ krã hkôt tanhmã mẽ pahte amnhĩ nhĩpêx to kukamã paxàhpumunh kêt. 9Jakamã na pre Kris ja hã mẽ pahpumu nê tãm mẽ pakaxyw amnhĩ to kêp mẽ panhõ Pahihti nê mẽ panê ty. Hãmri nê akupÿm htĩr. Kêp mẽ panhõ Pahihti hã akupÿm htĩr. Kêp mẽ pahte hkôt amnhĩ xunhwÿr xwÿnhjê nhõ Pahihti kaxyw. Jakamã kêp ra mẽ pahkwÿ htyk xwÿnhjê nhõ Pahihti nê mãânên kêp arĩ mẽ pahtĩr xwÿnhjê nhõ Pahihti. 10No mẽ papajaja mẽ pahpê Kris kôt mẽ pahkwÿjê nhõ pahi hkêt jakamã kêr mẽ Kris kôt akwÿjê hõ tanhmã amnhĩ nhĩpêx to hã omu hãmri nê tanhmã ho akapêr to hkêt nê. Rÿ ajamaxpër o:

—Kwa na ã amnhĩ nhĩpêx anê. Inhmã ja mex kêt.

Anhÿr o ajamaxpër kêt nê. Koja nhÿrmã Tirtũm tãm mẽ pahpiitã tanhmã mẽ pahte amnhĩ nhĩpêx to hã mẽ pahpumunh xà hkôt tanhmã mẽ pajarênh to. Nom kêr pu mẽ papajaja amnhĩ hkrã hkôt ã axpên jarênh anhÿr kêt nê. 11-12Kot puj mẽ nhÿrmã pahpiitã Tirtũm kutã pahkrĩ nê kãm tanhmã amnhĩ jarênh to. Kormã mẽ pahtĩr ri tanhmã mẽ pahte amnhĩ nhĩpêx to ho papa hã kãm pahprĩ hã amnhĩ jarê. Kê mẽ pama nê tanhmã mẽ pajarênh to. Kapêr ã kagà htũm kot mẽ pakukamã mẽ pajarênh kot:

Koja nhÿrmã mẽ piitã ixpê mẽ õ pahi hã ixkutã hkõn krã ho rôrõk nê hkrĩ nê inhmã inhmex o inhmex ã ijarê.

Nê mẽ piitã ixpê Tirtũm ã ixpyxi mex ã ijarê. ãm hãmri na pa ã mẽ hkukamã mẽ harênh anê. Anê.

Mê pahte Kris kôt pahkwỳjê ho mex ã mẽ pamã karõ

Wam Korît 8.9-13

13Nê kwa kêr ka mẽ akwỳ kot Jejus kôt amnhĩ xunhwỳr tohtuj anhỳr xwỳnhjaja tanhmã mẽ kot amnhĩ nhĩpêx to ho pa hã mẽ omu nê ja nê tanhmã mẽ kãm akapêr to hkêt nê. ãm mẽ noo mã tãm ri amnhĩ nhĩpêx rãhã ho ri apa. Mẽ kot ja hã mẽ apumunh nê mẽ akôt amnhĩ nhĩpêx kaxyw. No kot ka mẽ kot tanhmã amnhĩ nhĩpêx toja ã kãm akapêr nhũm ama nê tee ri amnhĩ kukamã hamaxpêr nê hkaprĩ nê.

14E kot pa hpãnhã mẽ paxàpkur xà hã tanhmã mẽ panhõ jarênh to. Ixte Pahihti Jejus jamaxpêr xà hkôt tanhmã ijamaxpêr to ho ri ixpa jakamã kot paj ixkatat kôt mẽ amã tanhmã mẽ panhõ jarênh to nê ãm hãmri harê. Nà mẽ paxàpkur xàja ãm pixi nê omnu hkêt. Piitã mex o mex. Nom koja mêhõ tee ri mẽmo mẽ apkur xà hõ pumu nê hamaxpêr o:

— Nà kot paj ja hkur kêt nê. Kot paj apu kuku nê ho amnhĩ tomnuj nê. Anê.

Hãmri nê hkur kêt nê. Tã kwãr mãmrĩ ã hamaxpêr anê nê hkur kêt nê. Nom na ãm amnhĩ krã hkôt Tĩrtũm kêp ja omnuj ã hkamnhĩx. Kêp omnuj kêt. Ra kot mẽmo mẽ paxàpkur xà piitã mex ã harênh. 15Tã kot kaj mẽ kot mẽmoj kur kêt xwỳnhhta py nê o tẽ nê kot hkaga xwỳnh noo mã hkur o xa nhũm apumu nê tee ri hamaxpêr nê hkaprĩ nê. Jakamã kot ka mẽ ã noo mã amnhĩ nhĩpêx anhỳrja o ho mex kêt nê. Kwa mẽ ã ri axpên nhĩpêx anhỳr hkêt nê. Kot ka mẽ ã axpên nhĩpêx anê nê te amnhĩ pix kukamã ajamaxpêr pyrak o amnhĩ nhĩpêx. Jao akwỳjê ho mex kukamã ajamaxpêr kêt nê. Kris kãm mẽ hapê htỳx kôt mẽ kot amnhĩ tomnuj pãnhã amnhĩrer kaxyw ra nê htyk kênã kot ka kêt mẽ axtem nê ri ã mẽ noo mã mẽ kot mẽmoj kur kêeta kur anê. Rỳ koja apu tee ri kot mẽmoj kur kêeta kur ã mẽ apumu nê tanhmã amnhĩ tomnuj to. Jao Kris kaga japêr. Jakamã kwa mẽ ã mẽ noo mã mẽmojta kur kêt nê. 16Mẽmo mẽ apkur xàja mex tã nhũm mẽ akwỳjê hõ kãm mex kêt japêr ka mẽ noo mã hkur kêt nê. Nê tanhmã hã kãm nê hkêt nê. Kot kaj mẽ anê nhũm Kris kra hkêt xwỳnhjaja tee ri ja hã mẽ apumu nê tanhmã axpên mã mẽ apê Kris kwỳjê ho kapêr punuj to. 17Mẽ pahpê Tĩrtũm krajaja na pu htem paxàpkur xà nê pahkõm xà pix kukamã pajamaxpêr o ri papa hkêt nê. Na pu htem amnhĩ mẽ pahkwỳjê mex kukamã pajamaxpêr. Nê mẽ pahte tãm amnhĩ nhĩpêx kukamã pajamaxpêr. Nê tãm axpên nhĩpêx kukamã pajamaxpêr. Kot puj mẽ ã amnhĩ nhĩpêx anê nhũm Tĩrtũm Karõ ja hã mẽ pahpumu nê mẽ pahto mẽ pahkĩnh nê. Pu mẽ pahkĩnh nê pajamakêtkati nê ri axpên kôt papa. 18Tã kot puj mẽ ã Kris mã tanhmã amnhĩ nhĩpêx to ho ri papa anê nhũm Tĩrtũm ja hã mẽ pahpumu nhũm ja kãm mex nê. Nê Kris kôt mẽ pahkwỳjê mã haxwỳja ja mex nê.

19Jakamã kêr pu mẽ tãm axpẽn mã pakapêr o ri papa. Nê pajamakêtkati nê axpẽn kôt ri pajapôj. Nê Kris kôt tanhmã axpẽn to paxihtÿx to ho ri papa. 20No kot ka mẽ axàpkur xà gryk ã akwÿ hkukamã ajamaxpêr kêt nê atÿx ri mēhõ noo mã mẽmoj kur japêr. Kêp omnuj tã ka mẽ ãm amnhĩ pix kukamã ajamaxpêr nê noo mã hkur japêr. Hãmri nhũm ja hã mẽ apumu nê ra kot Tirtũm kaga mã. Ra kèp hkra jakamã kwa mẽ noo mã mẽ kot mẽmoj punuj ã harēnh xwÿnhhta kur kêt nê. Nom mẽ paxàpkur xàja piitã mex. Tirtũm kot mẽ pamã òr jakamã piitã mẽ panhõõ. Tã koja akwÿjê hõ Tirtũm kêp mẽmoj omnuj ã hkamnhĩx tã ka mẽ noo mã aku nê ho amnhĩ tomnuj nê. 21Kêr pu mẽ pahkwÿjaja tanhmã kot amnhĩ tomnuj to pymaj pu mẽ pahte amnhĩ nhĩpêx kukamã pajamaxpêr mex o papa. Mẽmo mẽõ nê mẽmo kagô pê wĩhtija. Tirtũm kot mẽ pamã mẽmoj piitã òr tã no nhũm mẽ pahkwÿjaja kêp ja omnuj nê pu mẽ noo mã hkur rÿ ho pahkõm kêt nê. Mẽmo mry nê mẽmo wĩhti pu mẽ noo mã hkur rÿ ho pahkõm kêt nê.

22Nê kêr ka mẽ atõ mẽmoj krêr kaxyw nê hkukamã ajamaxpêr o:

— Nà kot paj ja krê. Tirtũm kãm ja mex kênã. Anê.

Hãmri nê mãmrĩ Tirtũm kamnàr rom axãmnhĩx akrê. Kãm ja mex kênã kot ka kêt ri tee ri hkrêr kaxyw hkukamã ajamaxpêr nê hkaga. 23No kot kaj mẽ atõ mẽmoj to anhÿr kaxyw nê tee ri amnhĩ kukamã ajamaxpêr nê ajamaxpêr o:

— Ko kot paj apu ja ho anê nhũm Tirtũm hã ixpumu nhũm ja kêp omnuj nê rÿ ko. Anê.

Hãmri nê tee ri amnhĩ kukamã ajamaxpêr. Tã ra ã amnhĩ nhĩpêx anê nê akrê rÿ mẽmoj to anê. Hãmri nhũm Tirtũm tee ri ã ate amnhĩ nhĩpêx anhÿr ã apumu nhũm ja kêp omnuj nê. Ate hkamnàr rom mẽmoj to anhÿr kêt nê amarĩ amnhĩ krã hkôt ho anhÿr jakamã ho amnhĩ tomnuj nê.

Mẽ pahte amnhĩ pix kukamã pajamaxpêr kêt ã mẽ pamã karõ

Makre 10.45; Wam Korõt 10.24; Piripos 2.3-5

15 1Nê kêr pu mẽ pahte ra Jejus kôt amnhĩ xunhwÿr tÿx xwÿnhjaja amnhĩ kôt kormã mẽ kot Jejus kôt amnhĩ xunhwÿr totuj janhÿr xwÿnhjê jamãr mex nê. Jao mẽ kamã pagryk tokyx anhÿr kêt nê. ãm mẽ kutã panojarêtx pix o papa. Jao ra amnhĩ pix kukamã pajamaxpêr kêt nê. 2Määnēn amnhĩ mẽ Kris kôt mẽ pahkwÿjê hkukamã mãn mẽ pajamaxpêr. Jao mẽ kot tãm amnhĩ nhĩpêx kaxyw mẽ ho mex o ri papa. 3Kris na pre jar pa ri amnhĩ pix kukamã hamaxpêr kêt nê. Na pre määnēn õ Papaj kukamã hamaxpêr. Jakamã Tirtũm kapêr ã kagà htũm kot kãm kapêr jarēnh kot:

Pa Papaj. Na hte mẽ pahkurê xwÿnhjaja ixto kapêr punuj nê.

Nom määnēn ã ato kapêr o pa anê. Anê.

4Mê pakaxyw na Tirtüm kapêr ã kagàja. Mê pahte kamã harênh nê mar nê amnhĩ kaxyw hkôt pajamaxpêr tÿx o ri papa kaxyw. Jakamã na pu htem tanhmã pahpunuj to htã kapêr kwÿ ma nê pahkĩnh nê. Jao tee ri amnhĩ kukamã pajamaxpêr o ri pahkaprĩ hkêt nê. ãm nhÿrmã Tirtüm kot mê pahto mex kukamã pajamaxpêr o akupÿm paxihtÿx nê pahkĩnh nê ri papa. Mê pahkĩnh nê ri papa kaxyw na Tirtüm kapêr ã kagàja. 5-6Na pu htem Tirtüm kamnãr rom pahkĩnh nê. Nê axpên kamã paxukaprĩ ho ri papa. Jakamã na pa hte tanhmã mê ato Tirtüm wÿr to nê kãm:

— Pa Tirtüm. Apê mê ijamãr xwÿnh maati na ka. Nê apê mê inhõ Pahihti Jejus Kris nhõ Papaj na ka. Nã xep ra Rôm nhõ xwÿnh kwÿjaja kãm akapêr kôt amnhĩ nhípêx prãm jakamã kwa tanhmã mê hkrã ho mex to kê mê hamakêtkati nê ajamaxpêr kôt hamaxpêr rãhã ho ri akôt pa. Hãmri nhũm mê amnhĩ tã apumu nê piitã amex o amex ã ajarê.

Anhÿr o pa hte mê ato kuwÿ.

Ijaew kêt xwÿnhjê jarênh

Atre 10.34; Rômãn 9.24; Karatas 3.28

7Nê kwa kêr ka mê amã axpên tã ma ho ri apa. Te ho Kris kãm mê pahtã mata pyrãk. Jao axpên to mex pix o apa. Kot kaj mê ã axpên nhípêx anê nhũm mê piitã axpên tã mê apumu nê mê anhÿ hã Tirtüm mã mex o mex ã harê.

8Amnepê m Tirtüm Ijaew mã tanhmã Kris jarênh to. Kormã pika hwÿr wrÿk kêt ri nhũm hkukamã nhÿrmã mê hwÿr wrÿk nê mê kamã kator ã harê.

Tã nhũm mê hwÿr wrÿ nê mê kamã kato. Ijaew hkanrêhã htãmnhwÿjê kamã kato nê mê ho mex o ri mê hkôt pa. Mê kot amnhĩ tã omunh nê ã hamaxpêr anhÿr kaxyw. Nê hamaxpêr o:

— Amnepê m Tirtüm kot mê panhîgê m mã hkukamã harênh xà hkôt na mê ixwÿr Kraja mê nhũm wrÿ nê mê ixto mex o ri pa. Nã ãm hãmri na pre mê ixwÿr kumê.

Anhÿr o hamaxpêr kaxyw. 9Nê mê apê Ijaew kêt xwÿnhjaja mê ajaxwÿja mê ate tanhmã kot amnhĩ nhípêx to hã harênh mar nê Tirtüm mã mex o mex ã harênh kaxyw. Nê Tirtüm kot mê akamã ukaprĩ hã mê ate amnhĩ tã omunh nê mex o mex ã harênh kaxyw na pre wrÿ. Tirtüm kapêr ã kagà htüm kot tanhmã mê ixpê Ijaew jarênh to nê mãänên tanhmã mê apê Ijaew kêt xwÿnhjê jarênh to nê mê pajarênh kot:

Kot paj Ijaew kêt xwÿnhjê jamak mã amã amex ã ajarênh o ri mê hkôt ixpa.

Nê amex ã inhgrer o ri mê hkôt ixpa. Anê.

10Nê ja:

Kwa mẽ apê Ijaew kêt xwỳnh mẽ mẽ apê Ijaew. Kêr ka mẽ apiitã Tirtũm nhỹ hã akĩnh nê ri apa. Anê.

11 Nê mãânên ja:

E kêr ka mẽ apê Ijaew kêt xwỳnhjaja nê krĩ piitã hkôt mẽ apa xwỳnhjaja mẽ apiitã Tirtũm mã mex o mex ã harênh o ri apa.

Anhỹr o kot harênh. 12 Nê Tirtũm nhỹ hã kapêr o pa xwỳnh finat Ijais haxwỳja Ijaew mã Jejus jarênh o:

Koja nhỹrmã Jese kanrêhã htãmnhwỳjê hõja mẽ pahwỳr kato.

Hãmri nê mẽ pahpê Ijaew mẽ Ijaew kêt xwỳnhjê ho amnhĩptàr o pa.

Jakamã nhũm mẽ amnhĩ kaxyw hkôt hamaxpêr o pa. Anê.

13 Nê na pa hte tanhmã mẽ ato Tirtũm wỳr to ho ri ixpa nê kãm:

—Pa Tirtũm. Kwa kêr ka Rôm nhõ xwỳnhjê ho mex kê mẽ amnhĩ kaxyw Akra hkôt hamaxpêr mex o ri pa. Jao hkôt hkĩnh nê hamakêtkati nê ri axpên to pa. Nê kê Akarõ mẽ ho mẽ hihtỳx o pa kê mẽ amnhĩ kaxyw amã mãn hamaxpêr tỳx rãhã ho ri pa. Anê.

Pawre kot hprĩ hã amnhĩ jarênh

Sikũn Pêtre 1.12-13

14 E Kris kôt ixkwỳjaja. Nà ra ixte mẽ ajarênh mar mex. Na ka xep htem amnhĩ to mex o ri apa. Nê mẽmoj to axpên kutã anojarêt rãhã ho ri apa. Nê mẽ kot tanhmã Tirtũm kapêr kôt amnhĩ nhĩpêx to xàja ka mẽ omunh mex nê ho axpên jahkre ho ri apa. 15 Tã ot pa kagà ja kamã mẽ amã ixujarênh kãm ixihỳx nê. Tirtũm nhỹ hã. Ra mẽ ate mẽmoj mar mex tã pa axte mẽ amã harê. Mẽ ate mar tỳx nê hã anohtỳx kaxyw. Nà ã ixte amnhĩ nhĩpêx anhỹr kaxyw na pre Tirtũm mẽ akaxyw ixãm. 16 Ixte Jejus Kris mã mẽ apê Ijaew kêt xwỳnhjê mã kapêr jarênh o ri mẽ akôt ixpa kaxyw. Nê mẽ ato hwỳr o ri ixpa kaxyw. Tã pa hte krĩ hkwỳ kamã ã mẽ akwỳjê mã harênh anhỹr o ri mẽ hkôt ixpa. Nê Jejus jarênhja pa hte mẽ hkôt mẽ kãm harênh o ri ixpa. Mẽ kot mar nê hkĩnh kãm hkôt amnhĩ nhĩpêx mex kaxyw. Hãmri nhũm Tirtũm Karõ mẽ kãm mẽ hamaxpêr nyw jagjê nhũm Tirtũm hã mẽ omu nhũm ja kãm mex nê nhũm hkĩnh nê hamaxpêr o:

—Nà ãm hãmri. Koja mẽ nhỹrmã wa ixri htĩr tũm nê mex nê pa ho pa. Anê.

17 Tã na pa ixte Jejus Kris nhỹ hã Tirtũm mã tanhmã amnhĩ nhĩpêx to ho ixpa hã amnhĩ pumu nê ixkĩnh nê. 18-19 Na pa hte ã hã mẽ apê Ijaew kêt xwỳnhjê mã Tirtũm kapêr jarênh o ri mẽ akôt ixpa. Nê mẽ anoo mã tanhmã ri Kris kot mẽ amã amnhĩ nhĩpêx to hã harê. Nê mẽ amã aa mẽ kot mẽmoj pumunh kêt kwỳ ho anhỹr o ri mẽ akôt ixpa. Tirtũm Karõ nhỹ hã. Nhũm hte mẽ akwỳjaja amnhĩ jaêr pê omu nê kamã

no puma nê. Hãmri nê mẽ pahpyrà nê Jejus kôt amnhĩ xunhwỳ. Nom pa hte ã amnhĩ nhĩpêx anhỳr ã amnhĩ pumu nê ri hã amnhĩ to jarkrar kêt nê. ãm ixte Kris pix nhỹ hã mẽ kãm ixkapêr ã mẽ kãm amnhĩ jarênh o ri mẽ hkôt ixpa. Tã pa ra Jerujarê rũm Irir wỳr krĩ piitã hkôt mẽ kãm Kris kapêr jarê. Tĩrtũm Karõ kot tanhmã ixto hihtỳx to jakamã pa mẽ piitã mẽ kãm harênh mex nê. 20Na pa hte mẽ hwỳr inhnojarêr nê ã ijamaxpêr anê nê ijamaxpêr o:

— Kormã mẽ kot Kris jarênh mar kêt xwỳnhjê hwỳr kot paj mỗ. Nom ra mẽ kot harênh mar xwỳnhjê nhõ krĩ hwỳr inhmõrja inhmã prãm kêt. Anê.

21Tĩrtũm kapêr ã kagã htũm kot kapêr mar kêt xwỳnhjê jarênh kot: Kormã mẽ kot Tĩrtũm kapêr mar kêt xwỳnhjaja koja mẽ kuma nê hprĩ hã mar tỳx nê. Anê.

Pawre kot Rõm wỳr hkrà hã amnhĩ jarênh

Rõmãn 1.8-15

22Hêxta waa nê. Inhmã mẽ apumunh prãm tỳx nê Rõm kãm Jejus kôt ixkwỳjaja. Na pa hte xatã mẽ awỳr ixkrà nom kormã mẽ awỳr inhmõr kêt nê. Kormã ixte krĩ hkwỳ kamã mẽ kãm Kris jarênh o ri ixpa jakamã kormã mẽ awỳr inhmõr kêt nê. 23Na pa ra xatã mẽ awỳr ixkrà hã ixtã amgrà xohtõ nê. Tã ra jar mẽ kãm Kris kot mẽ panê tanhmã amnhĩ nhĩpêx toja jarênh pa. 24Jakamã kot paj tokyx ma mẽ awỳr mỗ. Hãmri nê mẽ awỳr pøj pu mẽ axpên pumu nê pahkĩnh nê axpên mã pakapêr o papa. Pa mẽ akôt ri ixpa tãmtã hamũ pyka pê Espãnhã wỳr ma mỗ. Nê kot paj inhnojarêr ka mẽ ixto Tĩrtũm wỳ nê inhmã ixàpkur xà hkwỳ gõ pa ma mẽ hwỳr pry hã hkur o mỗ.

25-26No na pa kormã mẽ awỳr inhnojarêr kêt nê. Kot paj ja rũm awjanã nê akupỹm Jerujarê hwỳr mỗ. Kamã Kris kôt mẽ pahkwỳjaja kêp amrakati nê ri pa nhũm pika pê Gres mẽ Masetõn kamã Kris kôt mẽ pahkwỳjaja mẽ harênh ma nê mẽ kãm kàxpore hkwỳ ho akuprõ nê mẽ kaxyw inhmã kugõ. Tã kot paj ma mẽ hwỳr o mỗ nê mẽ kãm kure nê rĩ kormã ma mẽ awỳr mỗ. 27Jerujarê kamã Kris kôt mẽ pahkwỳjaja Ijaew na mẽ. Mẽ kumrêx na prem Kris kôt amnhĩ xunhwỳ. Hãmri nhũm mẽ hkwỳjaja ma mẽ apê Ijaew kêt xwỳnhjê mã kapêr jarênh o ri mẽ akwỳ hkôt pa. Hãmri nhũm pika pê Gres kamã mẽ pa xwỳnhjaja mẽ kapêr ma nê mẽ uràk nê Kris kôt amnhĩ xunhwỳr kurê kumrêx. Jakamã amnhĩ xwar kãm nhãm krĩ hõ kamã Kris kôt mẽ pahkwỳjê ho mex prãm nê. Hãmri mẽ kãm kàxpore hkwỳ ho akuprõ nê mẽ kaxyw inhmã kugõ.

28-29Tã kot paj ma Jerujarê hwỳr mẽ kãm o mỗ nê mẽ kãm kure hãmri nê awjanã nê rĩ kormã ma Rõm wỳr mẽ awỳr mỗ. Hãmri nê mẽ awỳr pøj pu mẽ axpên pumu nê pahkĩnh nê. Nê axpên mã Jejus Kris mex

o mex ã harẽ nẽ kãm tanhmã amnhĩ jarẽnh to ho papa. Jao pahkĩnh nẽ papa. Tã pa hpãnhã hamũ ma Espãnhã wỳr mỗ.

30Nẽ na pu prem Jejus Kris o panhõ Pahihti. Jao te mẽ pahpê hkõt axpẽn to pahtõ nẽ pahtõx pyrãk o axpẽn nhĩpêx. Nẽ Karõ nhỹ hã pamã axpẽn kĩnh nẽ. Jakamã kwa Jejus kõt ixkwỳjaja. Kêr ka mẽ ixpê mẽ atõ hã ixto Tĩrtũm wỳr kãm axihtỳx nẽ. 31Kêr pa ma pyka pê Jutej kamã Jerujarẽ kamã Kris kõt mẽ pahkwỳjê hwỳr mỗ nẽ mẽ kãm kàxporeta gõ nhũm mẽ omu nẽ Ijaew kêt xwỳnhjê kot mẽ kãm õr ã mẽ omunh tã tee ri hamaxpêr kêt nẽ. ãm hkĩnh kãm mãmri ãmnhĩx hamỳ nẽ ho amnhĩm awjaprõ.

Nẽ kêr ka mẽ ixto awỳ kê inhnê mẽ kêp mẽ pahkwỳ hkêt xwỳnhjê pumunh mex nẽ.

32E kêr ka mẽ ã ixto Tĩrtũm wỳr anẽ. Kê ixte ma Jerujarẽ rũm ma Rõm wỳr pãr kãm inhmõrta ã kê ixpumunh mex nẽ. Pa inhmex pê mẽ kurũm ma mẽ awỳr mõn pøj pu mẽ tokyx axpẽn pumu nẽ pahkĩnh nẽ. Pa mẽ ate tanhmã amnhĩ nhĩpêx to ho ri apa hã mẽ apumunh o mẽ akõt ri ixpa nẽ ixkĩnh nẽ. 33Tã ãm ja pix. Kê Tĩrtũm mẽ akõt pa ho pa. Tãm na hte tanhmã mẽ pahto pu mẽ ý hã pajamakêtkati paxãmnhĩx ri pahkĩnh nẽ ri papa.

Pawre kot ahpỹnhã hkrãmnhwỳjê mã kapêr

16 1Ku nẽ mããnẽn ja. Ot pa mẽ awỳr Kris kõt pahtõx Pepreja mẽ awỳr kumẽ. Na hte krĩ pê Sênkrej kamã Kris kõt mẽ pahkwỳjê tanhmã mẽ ho mex to ho ri mẽ hkõt pa. 2Nẽ mããnẽn pa na hte tanhmã ixto mex to. Tã kê mẽmo arĩgro hã mẽ awỳr pøj ka mẽ kêp Kris kõt mẽ pahtõx ã omu nẽ ho mex nẽ tanhmã ho ajuta hto.

3Nẽ kêr ka mẽ atar Kris kõt ixkrãmnhwỳjê mã ijarẽ. Na pa hte mẽ kãm ijamaxpêr rãhã ho ri ixpa. Nẽ Akirti mẽ hprõ Prisireta ka mẽ wa kãm ijarẽ. Na pre hte wa inhĩhkõ hã Jejus Kris mã tanhmã amnhĩ nhĩpêx mex to ho wa pa. 4Jao wa amnhĩ grõnh kõt mẽ kãm ixkurê xwỳnhjê pê ixpytã. Pa amnhĩ tã wa omu nẽ inhmã wa hkĩnh nẽ. No ãm papxipix inhmã wa hkĩnh kêt nẽ. Na pre Ijaew kêt xwỳnh kwỳ pê Kris kwỳjaja ixtã wa harẽnh ma nẽ haxwỳja kãm wa hkĩnh nẽ.

5Nẽ na hte Kris kwỳjaja wa õrkwỹ kamã axpẽn wỳr akuprõ. Mẽ kot Tĩrtũm mã amnhĩ jarẽnh nẽ kapêr ã kagã hkwỳ mar kaxyw axpẽn wỳr akuprõ. Tã kêr ka mẽ mẽ kãm ijarẽ.

Nẽ Kris kõt mẽ pahtõ Epẽnre mã ijarẽ. Kêp ixkrãmnhwỳ mex na. Inhmã hkĩnh. Kumrêx na pre jar pika pê As kamã amnhĩ kaxyw Kris kõt hamaxpêr nẽ hkõt amnhĩ xãm.

6Nẽ Kris kõt mẽ pahtõx Marir ka mẽ kãm ijarẽ. Na xep hte tanhmã mẽ ato mex to rũnh o pa.

7Nē Kris kôt mē pahtō Ārōhti mē Jūhti wa kām ijarē. Ixpyrà nē wa kēp Ijaew na wa. Kormā ixte Kris kôt amnhĩ xām kêt ri na pre wa kumrêx hkôt amnhĩ xām. Na hte Jejus nhỹ hã mē ahkre ho mē pa xwÿnhjaja wa kot Kris kapēr jarēnh mex ã wa harē. Tã ã amnhĩ nhĩpêx anhỹrja mÿrapê na pre mē hkwÿjaja wa unê nē wa haxà pa prem ixpimràatã ixpê prês nē mē hagiênh xà kamã ixkrĩ.

8Nē Kris kôt mē pahtō Āpître mã ka mē ijarē. Kēp Kris kôt ixkràmnhwÿ mex na.

9Nē Kris kôt mē pahtō Upânre mã ijarē. Na hte ixpyrà nē Kris mã tanhmã amnhĩ nhĩpêx to ho ri pa.

Nē Kris kôt mē pahtō Etaki mē ijarē. Kēp ixkràmnhwÿ mex na.

10Nē Kris kôt mē pahtō Apes ka mē kām ijarē. Na prem ra Kris ã hipêx punuj nē no nhũm mē kutã amnhĩ to htÿx nē Kris kaga hkêt nē.

Nē Aristopti nhõrkwÿ kamã hkwyjê mã ijarē.

11Nē Kris kôt mē pahtō Erojàwti mã ijarē. Ixpyrà nē kēp Ijaew na.

Nē Nasisti nhõrkwÿ kamã Kris kwÿjaja ka mē kām ijarē.

12Nē Kris kôt mē pahtōx Xiripēre mē Xiripos wa kām ijarē. Wa kēp Pahihti Jejus mã tanhmã amnhĩ nhĩpêx mex to xwÿnh na wa.

Nē Kris kôt mē pahtōx Pesixti mã ijarē. Haxwÿja kēp ixkràmnhwÿ na. Na hte Pahihti Jejus mã tanhmã amnhĩ nhĩpêx mex to ho ri pa.

13Nē Kris kôt mē pahtō Rupti mã ijarē. Na hte Kris kôt amnhĩ nhĩpêx mex o ri pa. Nē katorxà mã ijarē. Na pre te ixpê hkra nhĩpêx pyrãk o inhĩpêx.

14Nē Kris kôt mē pahtō Asĩnre mã nē Prekõxti nē Emes nē Patopas nē Emas mē. Jajê piitã mē pahkwÿ kot mē hwÿr pikuprõnh xwÿnhjê mē mē ho apimràatã mē kām ijarē.

15Nē Kris kôt mē pahtō Pirorti mã nē mē pahtōx Juure mē Nērew wa nē htõxja nē mē pahtō Orĩpti wa mē kām ijarē. Nē mē pahkwÿ kot mē hwÿr pikuprõnh xwÿnhjê mē mē ho apimràatã mē kām ijarē.

E kêr ka mē jajê piitã mē kām ijarē. Na pa hte mē kām ijamaxpēr rãhã ho ri ixa.

16Nom mē tapxipixjaja kêt. Ā mē apiitã mã na pa hte ijamaxpēr rãhã ho ixa.

Nē ota jar Kris kwÿjaja mē awÿr hpēr mē.

17Kwa ixkràmnhwÿjaja. Na ka mē ra aprĩ hã Tĩrtũm kapēr mar tÿx nē. Tã kêr ka mē amnhĩ nê mē kot Tĩrtũm kapēr o hêx xwÿnhjê pumunh mex o apa. Mē kām axpên nê mē ato hpigrãnh par prãm. Nē mē ate Kris kaga nē hpãnhã mē kot amnhĩ nhĩpêx o amnhĩ nhĩpêxja mē kām hprãm jakamã kwa mē amnhĩ nê mē omunh mex nē axkãm ajamak rom. 18Na htem ã amnhĩ nhĩpêx anhỹr o Pahihti Kris mã tanhmã amnhĩ nhĩpêx to ho pa hkêt nē. Ām amnhĩ hkrã hkôt tanhmã ri hkwyjê jahkre hto ho pa. Kot mē no kupyw kaxyw tanhmã mē kām

hêx to ho ri mẽ hkôt pa. Te mẽ ahkre mex pyræk tã mẽ ahkre mex kêt nê. Jakamã nhũm htỳx ri mẽ pa xwỳnhjaja mẽ kot mẽ ahkreja ma nhũm te mẽ kãm mex pyræk. Jakamã kwa mẽ okora mẽ amnhĩ nê mẽ omunh mex nê. 19Na ka htem mẽ kurom Kris kôt amnhĩ nhĩpêx mex nê nhũm xep mẽ piitã mẽ apumu nê axpên mã ja hã mẽ ajarênh o ri pa. Pa mẽ ajarênh ma nê ixkĩnh nê. Tã kêr ka mẽ arĩ ajamaxpêr mex rãhã ho ri ajamaxpêr o apa. Nê amnhĩ nhĩpêx mex rãhã nê. No tanhmã ajamaxpêr punuj to ho ri amnhĩ tomnuj o ri apa hkêt nê. Ầ mẽ ate amnhĩ nhĩpêx anhỳrja na inhmã hprãm.

20Nê na hte Satanasti mẽ hkwỳjaja mẽ ate Jejus kaga hprãm xaj mẽ akôt tanhmã ri mẽ anhĩpêx to ho ri pa htã kêr ka mẽ amnhĩ tã mẽ omu nê tee ri amnhĩ kukamã ajamaxpêr kêt nê. Koja gaa nhũm Tĩrtũm mẽ hipêx o te mẽ kot kagã xoprê hkrã xôm nê hpĩr pyræk o mẽ hipêx. Jakamã ầ mẽ kot mẽ anhĩpêx anhỳr tã koja Tĩrtũm mẽ amã mẽ ajamakêtkati xàja gô. Tapxipix na kot mẽ pajamakêtkati xà nhôr kaxyw àhpumunh tỳx.

Nê na pa hte mẽ ato Pahihti Jejus wỳ nê kãm:

— Pa Pahihti. Kwa kêr ka Rôm kãm akwỳjê pumu nê mẽ ho mex nê mẽmoj to mẽ kutã anojarêr rãhã ho ri apa. Anê.

21Nê ota mẽ pahtô Ximotreja mẽ awỳr hpêr mẽ. Na hte inhĩhkô hã Kris mã tanhmã amnhĩ nhĩpêx to ho ri pa. Nê ixtô Rusti mẽ Jasãwti mẽ Sosipa wa mẽ haxwỳja mẽ awỳr hpêr mẽ.

22Nê kot inhmã ixkapêr ầ kagã xwỳnh Testi haxwỳja mẽ awỳr hpêr mẽ. Kêp Kris kôt mẽ pahtô na. 23Nê Kris kôt mẽ pahtô Gajre haxwỳja mẽ awỳr hpêr mẽ. Ôrkwỹ kamã na hte Kris kwỳjaja axpên wỳr akuprô nê kamã Tĩrtũm mã amnhĩ jarê nê kapêr ầ kagã kamã harê nê mar o hkrĩ. Ôrkwỹ kamã na pa pre pôj.

Nê mẽ pahtô Eras haxwỳja mẽ awỳr pêr mẽ. Na hte jar krĩ ja kamã Rôm nhô pahihti mã ô kàxpore jamãr pê ho mẽmoj to anhỳr o pa.

Nê Kris kôt pahtô Kwatre haxwỳja mẽ awỳr hpêr mẽ. E jajaja piitã na mẽ awỳr hpêr rê.

24E kê Pahihti Jejus Krisja mẽ akutã nojarêr rãhã ho pa.

Pawre kot Tĩrtũm mex o mex ầ harênh

Epes 1.3, 3.20-21; Wam Ximotre 1.17; Eprêw 13.20; Jutre 24-25

25Nê kwa kêr pu mẽ Tĩrtũm mã mex ầ harênh rãhã ho ri papa.

Nê ixte mẽ amã Jejus Kris jarênhhta ầ ka prem ama nê hkôt amnhĩ xunhwỳ. Tã koja mẽ ato mẽ axihtỳx ka mẽ hkôt axihtỳx kãm hkôt ri amnhĩ nhĩpêx mex o ri apa. Amnepêm na pre Tĩrtũm mẽ apê Ijaew kêt xwỳnhjê ho hkra kaxyw hã amnhĩ jarênh kêt nê. Kormã ja ho hpimxur ryy nê. 26Tã ầ mẽ anhĩpêx anhỳrja o amnhĩrĩt nê ỳ hã mẽ kapêr jarênh o ri pa xwỳnhjê mã kapêr nê mẽ kãm:

—E Jejus kot tanhmã amnhĩ nhĩpêx to ho pata kêr ka mẽ piitã mẽ kãm hã kagà kê mẽ pyka piitã hkôt kamã harẽ nẽ kuma. Nom kê Ijaew pixjaja mar kêr nẽ. Kê pika piitã hkôt kamã harẽ nẽ kuma. Panhĩ nẽ kupẽ nẽ kupẽ hkà htykre nẽ mẽ hkà haka nẽ mẽ hkà kamrêkjaja. Kê mẽ piitã Jejus jarênh ma nẽ amnhĩ kaxyw hkôt hamaxpêr nẽ hkôt amnhĩ xunhwỳ. Hãmri nẽ hkôt amnhĩ nhĩpêx mex o ri pa. Anẽ.

Nhũm pre ã mẽ pakaxyw mẽ kãm kapêr anẽ nhũm prem kuma nẽ hã kagà.

27Nà Tĩrtũmja tapxipix na àhpumunh tỳx xwỳnh ã ãm pyxi mex. Nẽ tapxipix kêp mẽ pahpiitã Mẽpahpãm. Tã kêr pu mẽ Jejus Kris kot mẽ panê htyk ã omunh xà hkôt Tĩrtũm pix mã mex o mex ã mãn harênh rãhã ho papa.

Tã ãm ja pix. Ixpê Pawre na pa ã mẽ awỳr ixpêr mẽnh anẽ. Na hapêx.